



K 62.644
2

მ. სახელი. გვ. მოცემა, № 173

მესამე წელი

კურთული კულტურის
მეორე გამოცემა

რ.

ტფილისი.


ქალაქთა კადრირის სტამბა.

1919

J. J. წერა-კითხვის გამ. საზოგ. გამოცემა, № 173


K62.644
K62.2

მესამე წიგნი



კალაქთა კავშირის სტამბა.

1919



ტყილისი.

პატარა შესეღა

(ეტიუდი)

— მოიწი ჩემკენ, მოიწი!.. შენ-კი არა გცივა?.. მე-კი, აი, სიცივისაგან მთლად და-ვიბუხე, ლამის არის გავშეშდე, სიცოცხლე შე-მიდგეს... — ეხვეწება პატარა, ფუნჩულა თეთრი პეპელა, რომელიც ყვითელ-ფოთლიან ჯაგს ამოჰტარებია, იქავე მჯდომ ჭრელ პეპელას და იმოდენა არაქათი აღარა აქვს, რომ თითონ მიი-წიოს იმისკენ...

წვრილი ფეტვის-მარცვალა წვიმა-კი და-უინებით თავს დასდის, და თან სუსხიანი ქარი უსისინებს...

— ლამის არის მთლად ზედ შეგდე, საღ-ლა მოვიწიო?

— არ გებრალები?! — კვნესით შესძახა ფუნ-ჩულა პეპელამ და ოდნავ პატარა ფრთები შეარხია...

— მებრალები, მაგრამ რა ვქნა, როდესაც მეც შენი დღე მადგას?! — გულ-მხურვალებით უპასუხა ჭრელმა პეპელამ და ცალი ფრთა ზედ გადააფარა.

— ჰომ, ეგრე, ეგრე... ოხ, რა მაღლობელი ვარ!..

— ეეეხ, მართლა-და, რა სულელი გამოვდექი, იმათ რომ დავუჯერე!.. — გულ-ამოსკვნით წამოიძახა ისევ ფუნჩულა პეპელამ რამდენისამე წუთის სიჩუმის შემდეგ.

— რა იყო?.. როგორ?.. — ეკითხება ჭრელი პეპელა და გადაფარებულ ფრთას უფრო უჭუჭკავს.

— ეხლა რომ მაგონდება, — კანკალით ამბობს ფუნჩულა პეპელა: — სირცხვილით ვიწვი...

— არ მეტყვი, რა იყო?

— ჯერ ახლად თვალი რომ გავახილე, — დაიწყო ფუნჩულამ: — და არემარეს გადავავლე, დავითვერი, სიამოვნების ურუანტელმა დამირბინა ტანში. ჩემ თვალ-წინ გადაშლილიყო... ბედ-შავს, ვეღარც-კი გამომითქვამს იმისი სიმშვენიერე!.. ათას-ფრად აყვავებული მდელო, რომელსაც შიგ შუაში მიუჩხრიალებდა ანკარა კამკამა წყალი და ნაპირებს აპკურებდა თავის გამაცოცხლებელი წინწკლებით, გადაჭიმულიყო ჩემ თვალ-წინ. ყოველ საგანს სინაზე, სიახლე ეტყობოდა. უთუოდ ისინიც ახლად იყვნენ გამოწვეულნი, გამოცოცხლებულნი, რომ პირველ მხის სხივზე მათ ცრემლვა დაიწყეს. გათი

კრემლი მზის სხივზე კრთოდა, ელვარებდა, და ის ანკარა წყალიც უთუოდ იმისთვის მოსთქვამდა ისე ნაზად და სასიამოვნოდ... არემარე ჩემ-სავით დამთვრალი იყო სიცოცხლის პირველი სხივით და სტიროდა სიხარულით!..

„...ახ, რა კარგია!.. გამოვერკვიე თუ არა, უნებურად წამოვიძახე და არ ვიცი, როგორ და რად დავიწყე ნავარდობა... მართლა-დაც, რა კარგი იყო!! ხან ერთს ყვავილს და-ვაკვდებოდი ზედ გულზე და ხან კიდევ მეორეს. მინდოდა, ყველას მივვალერსებოდი, ყველას გულში ჩავკროდი და ამისათვის არც ერთ ყვა-ვილთან, არც ერთ მცენარესთან დიდხანს არ გავჩერებულვარ.

„ასე ვნავარდობდი, ვიდრემდის ბინდმა არ შემაყენა. ვიძახდი, რად დაბნელდა, რომ კი-დევ მენავარდნა...“

„გათენდა. ისევ ის ნავარდობა, ისევ ის სიამოვნება. ყოველ დღე ვსიამოვნებდი და სამ-წუხაროდ მხოლოდ ის მქონდა, რომ ღამეც არ შემეძლო სიამოვნება.“

„ერთ ღამეს... ცოტა კიდევ ამომიჭუჭკე ფრთა... ეგრე, ეგრე... რანაირი სუსხიანი ღამეა!.. ჰო!.. ერთ ღამეს, მეთქი, ის იყო ბალახებში ჩავძვერი და ძილს ვაპირებდი, რომ

უეცრად რაღაც სინათლე თვალს მომადგა. გა-
ვიხედე იქით, საიდანაც შუქი მოდიოდა და,
ალარც-კი მიფიქრნია, მაშინვე იქითკენ გა-
ვეშურე. რას ვხედავ?! ირგვლივ ისხდნენ...
უთუოდ გენახვება სადმე: ისინი ხშირად დადიან
მინდვრად და მათი მსგავსი პატარები ჩვენს
ძმებს კიდევაც დასაჭერად დასდევენ... რა ვქნა,
რამ დამავიწყა მათი სახელი?!

— ადამიანები?

— ჰო, ადამიანები!.. არ გასაშვებმა მათმა
პატარებმა ერთხელ კინალამ დამიჭირეს... შე-
მოსხდომოდნენ მაგიდას და ვახშმობდნენ... მა-
გიდას შუა იდგა რაღაც პატარა თეთრი, რო-
მელსაც თავს დასობოდა მოელვარე, მოციმ-
ციმე ენა. მისი შავი ძარღვი ცოტათი წამოხ-
რილიყო და გაღვივებული წვერი გამოენაპირე-
ბინა... ახ, რა მშვენიერება რამ იყო!!.. ის, ის
ჰქონდა არემარეს მკრთალ ნათელს... ის ატკ-
ბობდა იმ საზიზლრებს!.. პირველი შეკრთომის
შემდეგ გავსრიალდი და თავს შემოვევლე...
მისი სიახლოვე ვიგრძენ... ფრთა შევახე და...
ოხ, რა ნეტარების ურუანტელმა დამიარა ტან-
ში!.. სიმწვავე ვიგრძენ, მაგრამ ნეტარი სიმ-
წვავე!.. ტანი მომეშალა და, დარეტიანებულმა,
მსწრაფლ ძირს ფორმატხიალი დავიწვე...

„... რა სულელები არიან ეს მწერები: სიცოცხლეს თითონვე ისპობენო, წამოიძახა ერთმა მაგიდის გარს მსხდომ აღამიანთა-განმა და იატაკზე გადამანარცხა...“


„ძალიან მეწყინა... სატრფო მთლად და-
მავიწყდა... „სულელები... მწერები!...“ ეს სი-
ტყვები-ლა მიტრიალებდნენ თავში... მოვიკ-
რიბე ძალ-ლონე და მედიდურად ავუფრინდი
მათ ცხვირ-წინ... მე დაგიმტკიცებთ, რომ მწე-
რები სრულებითაც არ არიან სულელები-მე-
თქი, თან ეს მივაძახე, და ის იყო და ის,
მას შემდეგ ყოველგვარ სიამოვნებას მოვშორ-
დი. ვერიდებოდი... „იგინი ჰკვიანები არიან,
სულდგმულთა მეფედ ითვლებიან, მაშასადამე,
უთუოდ სიცოცხლე სიცოცხლისთვის რაიმეს
წარმოადგენს-მეთქი,“ ვფიქრობდი და ყოველ-
თვის, როდესაც-კი შევნიშნავდი რაიმე სიმშვე-
ნიერეს, რომელიც მაფრთოვანებდა, მიზიდავდა
და გულს მიტოკავდა, დღე იქნებოდა ეს თუ
ლამე, ვერიდებოდი, ვუფრთხოდი და, აი, სი-
ცოცხლე დავიცევი ამ სუსხიანი ლამისთვის. სი-
ცოცხლე შევინახე, რომ იგი ტანჯვით მომსპო-
ბოდა!... ოოჳ, თუ გადავრჩი ამ სუსხიან ლამეს...
მაშინ... მცივა... მცივა... მაშინ...—შესწყვი-
ტა ფუნჩულამ ამბავი. ჭრელი სმენად იყო გა-

დაქცეული. დიდხანს ელოდა, ფუნჩულა რას იზამდა, თუ იმ ღამეს გადარჩებოდა, მაგრამ იგი მხოლოდ გაუგებრად წრიპინებდა. ჩქარა წრიპინიც შესწყდა...

— მაშინ რას იზამდი?! — ჩაეკითხა მოთმინებიდან გამოსული ჭრელი პეპელა, მაგრამ ფუნჩულა სდუმდა.

ჭრელმა პეპელამ შეარხია ფუნჩულა. ფუნჩულა ძირს ჩაგორდა.

— ველარ გადარჩა ამ ღამეს!.. — მწარედ წარმოსთქვა ჭრელმა პეპელამ და ლრმა ფიქრებს მისცა თავი.



ბუნების მეფენი

(ეტიუდი)

I

— ხედაავთ, გეყურებაათ?! — თამაღამ კე-
 კლუცად მორთულ ტყესა და მინდორზე და
 ტკბილად მოჩუხჩუხე ნაკადულზედ ხელი მიიშვი-
 რა: — როდესაც ყოველსავე ამას თვალყურს
 ათხოვებთ, — განაგრძო თამთღამ, — და როდეს
 არ ათხოვებთ?! ყოველთვის შაშინ, ვფიცავ...
 შაგრამ რა დავითიცო?!. . . ჰმ!.. ვჭიცავ კაცო-
 ბრიობას, კაცობრიობას ვფიცავ-შეთქი, რადგა-
 ნაც აღამიანისთანა ამ ქვეყნად არა არის-რა.
 აღამიანი მეფეა ბუნებისა. მისთვის არის ყოვე-
 ლივე დაბადებული, ყოველივე მისთვის არსე-
 ბობს. იმას ვამბობდი: როდესაც ყოველსავე
 ამას თვალ-ყურს ათხოვებ, ძალა-უნებურად შენ
 თავს, ესე იგი, აღამიანი თავის თავს მეფედ
 გრძნობს. აბა შეხედეთ ამ მდელოს, ტყეს, რო-
 გორ თქვენ თვალს ნაზად ეტრფის, ეალერსე-
 ბა, ან ყური დაუგდეთ მათ ოდნავ მოძრაობის
 სმას და ან კიდევ ამ ნაკადულის ჩუხჩუხს, რო-
 მელი უმაღლესი მუსიკა დაატკბობს თქვენს სმე-

ნას, როგორც ეს?! რომელი ხელოვნური დეკორაცია გააღიზინებს თქვენს თვალს, როგორც ეს?! ესე: ეს ბუნებაა...—თვალი გადაავლო არემარეს და უეცრად დაინახა იქავე ახლოს ვირი, რომელიც ყურებ-წინ-წამობერტყილი ქანდაკებასავით უმოძრაოდ იდგა და გაშტერებული გაიცემოდა. ამ არსებამ მასალა მისცა კიდევ უფრო გაეფართოვებინა თავისი სიტყვა:— განა მარტო უსულო ბუნება! მას ემსახურება ყოველი სულდგმულიც. აგერ, გეყურებათ ფრინველთ ქლივილი?!... ისინიც ადამიანს ემსახურებიან. თუ არ ემსახურებიან, შეუძლიან ადამიანს დაიმორჩილოს ყოველი სულდგმული და იმსახუროს, როგორც აგერ ის ვირი, რომელიც ფილოსოფოსი თავით ჩაფიქრებულა...

მოსაღილეთ ყველამ გაიხედეს ვირისკენ და ხითხითი ასტეხეს. ყველას მოეწონა თამაღისგან ვირის დახასიათება.

ვირმა ყურები სცევიტა, როდესაც თამადამ იგი ახსენა, და მის ხსენებას რომ ხითხითი დაატყდა, ისევ პირვანდებულად გაშტერდა.

— მაშ, ყმაწვილებო და ქალებო,—გაგულადებულმა თამაღამ ხმა-მაღლა დაიძახა: — გაუმარჯოს ადამიანს, რომელსაც ემსახურება ბუნება, და მასთან ერთად ჩვენც გაგვიმარჯოს!

— გაუმარჯოს, გაუმარჯოს, ურაა! — ერთ-ხმად დაიძახა ყველამ და სავსე ჭიქა გამოსცალა.

ამ სადღეგრძელოს შემდეგ ქალები გასასეირნებლად წამოიშალნენ. ყმაწვილები, თუმცა მათ კიდევ ბაასი და ლვინის სმა უნდოდათ, რალას იქმოდნენ, იგინიც წამოდგნენ. ერთ მათგანს მოავონდა, რომ თამადას სადღეგრძელო არ დაულევიათ. ამით ისარგებლა, რომ ერთი ჭიქა გამოეცალა. შეივსო ჭიქა და დაიძახა:

— ყმაწვილებო, დაიცადეთ!... ეს ჩვენი თამადის სადღეგრძელო იყოს!

— ოოო, გაუმარჯოს ჩვენ თამადას! ურაა! — დაიძახეს თითქმის ყველამ ერთად.

— ურაა! — თავისებურად დაიყროყინა მათთან ერთად ვირმაც და ყველას ხმა დაჰტარა.

— ურაა! — ხელმეორედ დაიძახა ერთმა მათგანმა ხარხარით. — ფილოსოფოსიც გვეთანხმება.

— ურაა! — ყველა ხარხარით ყვიროდა ურას.

ვირსაც ყროყინი არ შეუწყვეტია.

II

ცელქობენ, ხტიან ნაზნი არსებანი, ყვავილებში იფლობიან და ვინ ვის ეტრფის: ყვა-

ვილნი ქალთ თუ ქალნი ყვავილთ, ეს ძნელი გამოსაცნობია.

თითქოს თამაღის აზრი მართლდებაო, ბუნება მათ სიამოვნებას და ამაყობას ხელს უწყობს. აქნობამდის მოკრიალებული ცა წაიფერფლა და მჩის მწვავი სხივები გაანელა.

დასრიალობენ. დახტიან. მათმა სიცილკისკასმა არე მოიცვა. ხან „თავ-დავლას“ თამაშობენ, ხან კიდევ „ნიშხა-ნიშხა, ვისი ქალის“ და ხან კიდევ რას არა...

თამაღა თამაშობებშიაც თამაღობს. იგი მეთაურობს. თამაღას არც ვირი დაავიწყდა. იგიც ჩაურია ბოლოს ფერხულში. მოახტა და გაიჯირითა. თამაღას სხვებმაც მიჰპაძეს. ქალი და ვაჟი ერთი ერთმანეთს აღარ აცდის. ყველა ვირის ტვირთად ხდება. მხიარულობენ. ვირი წარბ-შეუხრელად ემსახურებათ. ბევრი ვაი დასტეხია თავს და ეს წვალება მისთვის სულ უბრალოა...

მეფობს აღამიანი. ყველა მისი მორჩილია, როგორც თამაღამა სთქვა, და რად არ უნდა იმეფოს?! არემარე, ყველა სულდგმული მას ემორჩილება, მისთვის, მის სასიამოვნოდ არის დაბადებული და სულელი იქნება, თუ არ ისარგებლა და არ დაიმორჩილა მთელი ბუნება...

ბუნება!.. დიდებული ბუნება, მისი დიდებული კანონი ადამიანის ხელთ არის!.. „როგორც ადამიანს სურს, ფიქრობს თამაღა და მასთან ერთად მისი მოძმენიც: ისე დატრიალებს ბუნების ჩარხს: უნაყოფო ნიადაგს განყიერებს და საღაც ქვისა და რიყის მეტი არა იყო-რა, იქ მშვენივრად შემკულ მცენარეულობას მოიყვანს, მოაშენებს ცხოველთ და აამოძრავებს ნაკადულს; იქ, საღაც არწივთაც უძნელდებათ მისვლა, ადამიანი გზას მიიტანს და აახმაურებს ბუნებას. საღაც სიმშვენიერეა, საღაც გული სიამით გაიშლება, იქ ადამიანს შეუძლიან სიკვდილი დაბადოს, იგი გაანადგუროს და გააოხროს, თუ-კი მისი გონება მოითხოვს. მაშ გაუმარჯოს ადამიანს — ბუნების მეფეს!..“

ისევ ის კისკასი, მხიარულება და ვირის მორჩილება...

III

არე-მარე მთლად ჩამობნელდა. ბუნებამ სული გაკმინდა. ფოთოლიც-კი არ იძვრის. ალგზნებული და სიამოვნებით გატაცებული ადამიანი არემარის ცვლილებას ვერ ამჩნევს, რომელიც თან-და-თან კუმეტდება და იქუშება...

ხითხით-კისკასი მათი-ლა არღვევს არემარის დუმილს... თითქოს თავიანთ საქციელით ბუნებას უმკლავდებოდნენ და მის შებლ-შეკრულობას არად აგდებდნენ, სიცილად არ ჰყოფნიდათ, რითაც ბუნება უფრო ბრაზდებოდა და მოთმინებიდან გამოდიოდა. არა, არ სცხრება აღამიანი. კიდევ ხითხითებს, კიდევ კისკასობს და თან ვირსაც დაარბევინებს...

„...აღამიანო, დასცხრი, დაწყნარდი!..— ყოველის მხრით ეჩურჩულება არემარე:— გეყოფა სიჯიუტე. კმარა, მონახე შენი ბინა და...

„მაშ კიდევ ჯიუტობ?!.. ა჊ა, ჯერ ესა სცადე!..“ — უეცრად გაირღვა: ცა ცეცხლის ხაზით, დასკუივლა ზევიდან და გრგვინვით განვლო კიდით-კიდე.

აილუფხა არემარე. თითქოს ცის ამ ნიშანს მოელოდაო, რომ მთლად არეულიყო და ახმაურებულიყო...

გრიგალმა მოიცვა ყოველი არსება და შეუბრალებლად შხეპავდა. მეტის-მეტად შეწუხებული დიდრონი ხეები, აგერ, როგორ კვნესით და გოდებით ერთი-ერთმანეთისაკენ იხრებიან, რომ ერთმანეთთან ჩახვეულნი გაორკეცებულის ძალით დაუხვდნენ მეღვარ გრიგალს, მაგრამ გრიგალი არ აცლის გადახვევნას. თითქმის ტო-

ტები შეახეს ერთმანეთს. ტოტების გახლართვასაც აპირებდნენ, მაგრამ ამ დროს გრიგალმა შუაში გაუელვა და ისევ-ისე კვნესა-ვაებით, წყევლა-კრულვით და სასოწარკვეთილებით გმინვით განშორდნენ ერთმანეთს...

ჯერ ისევ პირველ გაელვებაზე და ცის გრგვინვაზედვე ბუნების მეფენი შეკრონენ. მათი უდარდელი კისკასი კივილით შეიცვალა. ერთი მშვენიერთაგანი, რომელიც ვირით მიჯირითობდა, გაელვებაზე კივილით დედამიწას გაერთხო. მისი კივილი არავის გაუგონია. მხოლოდ ვირი, როდესაც ქალი ჩამოვარდა, მიტრიალდა მისკენ და მწარის ლიმილით მზერა დაუწყო...

„სადაა თქვენი. მედიდურება, ბუნების მეფენო?!... რატომ...“

გრიგალს წვიმა და ჩქარა ხშირი, საშინელი ხშირი და თანაც მსხვილი სეტყვა მოჰყვა... მაშინ ბუნების მეფეთ თაგვის სორო სამშობლოზე უძვირფასესად ულირდათ. სად წასულიყვნენ, აღარ იცოდნენ. ვინ ვის ეფარებოდა, აღარ იცოდა. ეხლა ყოველ მათგანს აზრად მხოლოდ ის-ლა ჰქონდა, რომ ერთი-ერთმანეთს ამოფარებოდნენ და სხვისა გვერდები სეტყვისთვის მიეგებებინათ, იმის მიუხედავად, სუსტი არსები-

სა იქნებოდა ეს გვერდები ფარად თუ მძლავ-
 რისა. სამარცვინო მათი კივილი იფარებოდა
 არემარის გმინვით. ერთი ერთმანეთისა არა
 ეყურებოდათ-რა...

IV

დაწყნარდა ბუნება. ფოთოლიც აღარ ირ-
 ხევა. მხოლოდ მოისმა ხევების ხრიალი. მთები-
 დან მომსკდარი ნიალვრები ქუხილით მიექანე-
 ბიან ქვევით. მოშავბნელებული ცა დაიშაშრა
 და ნაშაშრებიდან მზემ გამოიჭვრიტივა. ამოლუ-
 ფხულ ბუნების მეფეთ გული მოეცათ, ისევ და-
 უბრუნდათ იმედი. სასოწარკვეთილთ, მხდალთ,
 მზის სხივების დანახვაზე, მედიდურობა ისევ და-
 უბრუნდათ...

— ახ, მიყვარს ბუნების ამგვარი ბობოქ-
 რობა!... — დაიწყო თამაღამ.

— მე გულ-ხელ-დაკრეფილი ვიდექი და
 ცას მაღალი ხმით შევძახოდი: „ჰა, უფრო სას-
 ტიკად, უფრო სასტიკად დასკუივლე-მეთქი...“
 — ამბობს მეორე.

— ვერ წარმოიდგენთ, — ამბობს ქალი: —
 რომელიც ვირიტან, გადმოვარდა: — რა მშვენიე-
 რი სურათი იყო!... ჩეტავი კიდევ დიღხანს ეგ-
 რიალა ცას, ნეტავი ჩქარა არ შეწყვეტილიყო!..

მე ჩემს დღეში არ დამავიწყდება ას ჭრე. ამისთანა სიამოვნება ერთხელ არ გაძომივლია...

ერთი ერთმანეთს აღარ აცდიდნენ შთაბეჭდილების გამოთქმას. ყველა მათგანს კარგად გრძნობდა, რომ სინამდვილეს არ ამბობდა ნამდვილი შთაბეჭდილება იფარებოდა. ვერც ერთს მათგანს ვერ გამოეჩინა იმოდენა მოქალაქობრივი ძალა, რომ სინამდვილე ეთქვა, და ყველა მათგანი სცდილობდა, თავისი სიმხდალე და სილაჩრე გაექარწყლებინა...

ველარ მოითმინა ვირმა, რომელიც მოწმე იყო მათი მედიდური სიტყვებისა, სილაჩრისა და ცრუპენტელაობისა, ბრაზ-მორეულმა ძლიერად დაიყროყინა, რომ მათი საზიზლარი ბაქიობა შეეწყვიტა...

— თქმა, ჩვენი ფილოსოფოსი რაღაზედაც გვიწყრება!... — უნებურად წამოიძახა ქალმა, რომელიც ვირიდან ჩამოვარდა პირველ გაელვებაზე და შუბლ-შეკმუხვნილმა დანართის დახარა...

კავკაზი
1902



„მ ი წ ა ა!..“

I

— ბედშავს, გული ასე რაზედ მიკვნესის?—
 ხმა-მალლა დაიძახა ბერამ და ყრუდ, სულ ყრუდ,
 ხველა აუვარდა.—ბაბაი, რა უბრალოდ ფუჭ-
 დება ჩემი სიყმაწვილე! — განაგრძო ხმა-მალლავე
 ბერამ,— როდესაც ნახველი ამოიღო და ცივი
 ოფლი ხელის მოსმით შუბლიდან მოიწმინდა.

ბერამ თვალი გადაავლ-გადმოავლო გამუ-
 რული შუშიანი მხრჩოლავი ლამპრით ბუნდად
 განათებულ კარგა დიდ ოთახს და მწარის ლიმი-
 ლით თავი გაიქნ-გამოიქნია, როდესაც ძლი-
 ვას გაარჩია ჭერახებივით დაყრილი დაბორკი-
 ლი ტუსალები, რომელნიც უსუფთაობის შვი-
 ლთა—სხვა და სხვა მწერთა გამო მოუსვენრად
 მოძრაობდნენ. ხშირად იცვლიდნენ გვერდს,
 ხელებს დაუღალავად ამოქმედებდნენ და ზოგი
 ძილში, ზოგი კიდევ ცხადლივ თავისდა უნე-
 ბურად კბილთა ღრკენით ლოცვა-კურთხევას
 უგზავნიდნენ...

ვის? მწერებს, ბუნებას, თავიანთ ბედს
 თუ სხვას ვისმე?

თითონაც არ იცოდნენ, ვის? ისე გულის მოსაფხანავად, შეგუბებული ვარამის წამოსან-თხევად...

ბერა თავ-ჩალუნული ისმენს კვნესა-ღრჲე-ნას, ბორკილთ ჩხარუნს, ლანძლვა-გინებას და მწარე ლიმი ტუჩებიდან არა შორდება...

„...ასე არსად ამკვნესებია გული, — უსიტყ-ვოდ იძახოდა ბერა ხმაურობის დროს: — რას მი-ქადი, გულო, რას? ამაზე უარესი ხომ არა დამემართება-რა! იყუჩე... უჰუ, უჰუ... იყუჩე, გულო, დაწყნარდი, გულო!.. უჰუ, უჰუ!..“ შეწყვიტა უსიტყვოდ ბაასი თავის გულთან: ხველამ ნება აღარ მისცა განეგრძო.

დიდხანს ახველა ყრუდ, ხმელად და ძლივს ამოილო ნახველი, რომელმაც ტუჩები შე-უღება.

ბერა არ შეშინებულა, რადგანაც სამი თვე მეტია ეს ემართება: სიკვდილს დიდი ხანია მოელის.

დაატუსაღეს თუ არა, მაშინვე იმედ-გა-დაწყვეტილმა შესდგა ფეხი: მე ხომ ცოცხა-ლი ვეღარ გამოვალო! მაშინვე ესა სთქვა და ალარც მოჰქონია მის გულს სიმხიარულის შუქი ამის შემდეგ.

ერთ წელიწადს გასტანა ამის საქმის გარ-

ჩევამ. წლის თავზედ გადაუწყვიტეს ციმბირის
მაღნეულობაში მძიმე მუშაობა...

ბერა დაწყნარდა. ხველაც შეუდგა, თავი
კედელს მიჰყუდა, ეგონა, დაიძინებდა, მაგრამ
გული ისევ აუფორიაქდა...

— დედავ, დედავ, შე ბედშავო, რა მოე-
ლის შენს შვილს?! — სასოწარკვეთილებით წამო-
იკვნესა და სული ყელში მოებჯინა.

თვალები ხელის გულით მიიჭილიტა, თით-
ქოს ესენი იყვნენ დამნაშავენი მის მოუსვენ-
რობაში. ისევ ის ლრპენა, ისევ ის ლანძლვა-
გინება, ბორკილების ჩხარა-ჩხური მოისმის
ოდნავ განათებულ ოთახში. ბერა-კი თვალებს
იჭილებს და სასოწარკვეთილებით ეკითხება
თავის გულს: რას მიქადი, გულო, რას?..

— სიკვდილს, ბერა, სიკვდიიილს? — შემო-
ესმა ბერას უცნაური ხმა.

— ჰაა?! — საჩქაროდ წამოიჭრა ფეხზედ და
გაბრწყინვებული თვალები სარკმელს მიაპყრო.

— სიკვდილს, ბერა, სიკვდიიილს! — ისევ იმ
ხმამ, იმავე კილოთი გაპკივლა გარედ და უკა-
ნასკნელი ხმა სადღაც შორს მისწყდა.

შემოდგომის სუსხიანი ქარი-კი გამალებუ-
ლი ებრძოდა რკინის უჯრედებით დაცულს პატა-
რა სარკმელს და უხვად ასხამდა მის მინებს წვიმას...

— სიკვდილს!

— არა, არა, ლომისის მაღლმა, სიკვდილისა არ მეშინის, არა! გულჩაწყვეტით უპასუხა ხმას.

— ბერა, ვის ესაუბრები? — გაკვირვებით
დაეკითხა მეზობელი, რომელიც ბერას უკანას-
კნელ მოძრაობას თვალ-ყურს აღევნებდა.

— გივარგი, გივარგი! იქიდან ვიღაც მი-
კივის „სიკვდილს“, მაგრამ სიკვდილისა არ მე-
შინის! — საჩქაროდ გამოელაპარაკა გიორგის და
ხელები დაუჭირა.

— ვინ უნდა...

— გივარგი, სხვა რამ უბედურებას მიქადის
ჩემი გული. ასე არ უკვნესია, არა, არა!.. სიკვ-
დილი ხომ ჩემი ხსნა იქნება, გივარგი!

— ბერა, რას უნდა გიქადოდეს ამაზე
უარესს?! აბა რას უბნობ, შე ბერივო! ცოტა ტან-
ჯვა გაქვს, რომ შენც შენი თავი არ სტანჯო!

— არა, გივარები, არა! სხვა...

— კარგი, იყუჩე!.. — უძილობა გიშვრება.

III

— ბერა, ბერა!.. საწყალის, რა მაგრა სძინავს. ბერა, ჰაი, ბერა! — გაღვიძება დაუწყო დი-

ლა ადრიანად გიორგიმ, როდესაც მათთან
ბრახა-ბრუხით დარაჯნი და უფროსი შემოვიდ-
ნენ.

— საცოდავს ძლივას ჩაეძინა განთიადისას
და ისევ ჩქარა-კი უნდა გამოვალვიძო...

ტუსალები საჩქაროდ წამოიშალნენ. უა-
რესი ჩხარა-ჩხური ასტყდა ბორკილებისა, რასაც
ტუსალების ხმა-მაღლა ბუზღუნი და ყაყანი
უერთდებოდა.

— გაჩუმდით!.. — დაჰყვირა ერთმა დარაჯ-
თავანმა, რის შემდეგაც სწრაფ სიჩუმე ჩამოვარდა.

— პეტროვ, გალკინ, მამედ-ოლლი!..
ამოიკითხა უფროსმა.

სამი ტუსალი ახლოს მივიდა და იმის წინ
თავებ-ჩაღუნული დადგა.

— გაჩხრიკეთ, — უბრძანა თანამხლებლებს
უფროსმა.

საჩქაროდ გააძრეს ტანისამოსი; სულერ-
თიანად გაახოლოდ შობილეს და ტანისამოსის
ყოველი ნაკერი გაჩხრიკეს. მერე პირი და ყუ-
რებიც-კი გაუჩხრიკეს იმ აზრით, ვითომ იქაც
შეეძლოთ რისამე დამალვა. თითონ უფროსი
სასტიკად ადევნებდა თვალ-ყურს.

— ბერა, გაიღვიძე! — გაბედვით შეარხია
გიორგიმ და ხელი გამოსწია.

— რაია, გივარგი?! — გამოლვიძების უმაღლესი ცურავით დაეკითხა ბერა და ფეხზე წამოდგა...

— მაგათი ბარგიც გაჩხრიკეთ! — უბრძანა უფროსმა, როდესაც მორჩნენ ტანისამოსისა და სხეულის გაჩხრეკას.

— ბერა, ხომ არა გაქვს-რა? თუ გაქვს რამე, დამალე, თორემ წაგართმევენ.

— რაი უნდა მქონდეს, შენი კვნესა-მე?! — ნალვლიანის კილოთი უპასუხა ბერამ.

— როგორც ეტყობათ, დღეს გაგვგზავნიან იქედან; იმისთვის გვჩხრეკენ, — ცოტა სიჩუმის შემდეგ ჩაილაპარაკა გიორგიმ.

— სადღა უნდა გაგვგზავნონ?! უჰუ, უჰუ! რით ვერ მიველით?..

— უჰ, ჩემო ბერავ, ჯერ შორსა ვართ. ციმბირამდის ჯერ დიდი გზაა.

— ეჸ, სადაც უნდა გამგზავნონ! მე ხომ სამი პარასკევი აღარ მიდევს წინ...

— ბერა, ბერა, გული რისთვის გაგტეხია?! მე, აი, მეორედ მგზავნიან და გულს არ ვიტეხ. შენ-კი, შვილად შემთერი, ისე ყმაწვილი ხარ და ეხლავე იმედი დაგიკარგავს!

— რაღა იმედი მექნების! ნახევარი კაცი დავილიე ამ ორ წელიწადს.

— ობლაიძე, შუბინ, ბუქური! — გამოიძახა უფროსმა ახალი სამი კიდევ. წინანდელებიკი თოფებით შეიარაღებულ ჯარის-კაცებს გარდასცა. წარუდგნენ უფროსს წინ ბერა, გიორგი და შუბინი.

თანამხლებლებმა უფროსს პრძანება აღარცკი აცადეს, მაშინვე ჩხრეკა დაუწყეს. ბერას უბიდან ჭრელი ცხვირსახოცი ამოაცალეს, რომელშიაც რაღაცა ფხვიერი იყო გამოკრული. იქით გადასდეს. მთლად გაჩხრიკეს. ისევ ჩააცვეს. ახლა ბარგი უნდა გაესინჯათ. ამ დროს უფროსმა ხელი წამოავლო ბერას ცხვირსახოცს, გამოხსნა და ცნობის-მოყვარეობით მზერა დაუწყო.

— ეს რა არის? — ცოტა სიჩუმის შემდეგ დაეკითხა უფროსი ბერას.

— მიწაა!..

— რა მიწა?

— ჩემი ქვეყნის მიწა. ანანურს რომ ამოვიარე, იქიდან წამოვილე; ჩემი სოფელი იქავეა.

— მერე რად გინდა!..

— მე, შენი კვნესამე, ამ ქვეყანაში მოვკვდები. გული ამას მეუბნება. მინდა სიკვდილის წინად გულზე დავიყარო, რომ ჩემი ქვეყნის მიწა თან ჩამყვეს, — ბერამ თითქმის ცრემლ-მორე-

ულმა უპასუხა და ლმობიერად დაუწყო მზერა უფროსს.

გიორგასაც თვალებზე ცრემლები მოადგა, როდესაც უფროსს ბერას სიტყვებს უთარგმნიდა.

— სისულელეა! გიცნობთ, რა შვილებიცა ხართ! თქვენ...

ნუ იზამ მაგას, შენი კვნესა მე! — შებლავლა ბერამ და სწრაფ უფროსს ხელიდან ცხვირსახოცი მიწით წაგლიჯა, როდესაც იმან მიწის გადასაყრელად ხელის გაქნევა დააპირა.

— რაია, შე დალოცვილო, მიწაა სხო ხო არა არი-რა?! — ეველრებოდა ბერა და თან მიწას გულზედ იკრავდა.

უფროსს არ მოეწონა ბერას ამ გვარი საჭკიელი, თვალები აენთო, სახის ძარღვები საშინლად დაეჭიმა და ბრაზ-მორეულმა იჭექა:

— ეხლავ გადაყარე!

ყველა იქ მყოფთ ყურადღება მიიქცია უფროსის გრგვინვამ. ყველამ სული გაკმინდა და ცნობის-მოყვარეობით თვალების ცეცება დაიწყო.

— ლომისის მადლმა, მიწაა!..

— გადაყარე მეთქი! — უფრო მკვანედ დაუყვირა.

უფროსის მეორე დაყვირებაზე მხლებლები მისცვივდნენ ბერას; უნდოდათ ცხვირსახოცი წაერთმიათ, მაგრამ უფროსმა შეაყენა.

— თავი დაანებეთ!.. ეგ ეხლავე წამოაქციეთ და იმდენი ურტყით წკეპლები, რომ თოთონვე გეხვეწებოდეთ გადაყრას.

გიორგის ტანში ურუანტელმა დაურბინა. კარგად იცოდა გიორგიმ, თუ რას ნიშნავდა გაწკეპლა და მისთვის ხმის კანკალით შეევეძრა ბერას:

— ბერა, ბერა, თავს ნუ იკლავ!.. მიაშავე და მორჩი!

-- გივარგი...

სიტყვის გათავება აღარ დააცალეს. ბერა საჩქაროდ წამოაპირქვავეს: თავი და ფეხები ოთხმა კაცმა დაუჭირა, ორმა-კი რიგ-რიგობით რაც ძალი და ლონე ჰქონდათ კარგა მოზრდილი გრძელი წკეპლების კონებით ცემა დაუწყო.

პირველ დარტყმაზედ ბერამ შეჰკივლა; მერე-კი მხოლოდ გმინავდა, ვიდრემდის ხმა სულ არ მიუწყდა.

მთლიად დაეფლითა რბილი ნაშილი... წკეპლებს ხორცი თან ასდევდა. სისხლი-კი სჩქეფდა და სწუწავდა ახლო მყოფთ. რამდენიმე წვეთი უფროსსაც მოხვდა...

„უ! უ! უ!“ — გუგუნებდა ტუსალთა ბრძოლა ტალღად იწევდა წინ, მაგრამ შეიარაღებული დარაჯნი მკაცრად არღვევდნენ ტუსალთა ტალღას...

ბერას ხმა მისწყდა. ლეშად-ლა ეგდო ბერა.

— მოკვდა, მოკვდა! — სასოწარკვეთილებით გაიძახდა გიორგი და ცრემლად-ლა ილვრებოდა, რადგანაც მეტი აღარა შეეძლო-რა.

— კიდევ რო არ უშვებს! — გაკვირვებით წამოიძახეს მხლებელთ, როდესაც გონება მიხდილი ბერა გადმოაბრუნეს და ხელსახოცის განთავისუფლება დაიწყეს.

— ამისთვის რასა ჰკულავთ?! აჰა! — გიორგი მივარდა ამ სიტყვებით, საჩქაროდ გახია ცხვირსახოცი და სულ ერთიანად გულზე დაუბნია მიწა.

— ყოჩაღ, ბუქური! — მოუწონა უფროსმა, რომ მისი სურვილი ამან მოიყვანა აღსრულებაში.

„უ!.. უუ!.. უუ!“ — გმინავდა მაინც ტუსალთა ბრძოლა.

— ვინც ურჩობას გამოიჩენს, ამ დღეს დავმართებთ! — მრისხანედ მიმართა ტუსალებს უფროსმა.

„უუ!.. უუ!“ — უფრო უარესად წაიგმინეს ტუსალებმა.

— ეს-კი ცალკე ოთახში გაიტანეთ, მერე გავჩხრიკოთ დანარჩენები.

— მეც ამასთან მომათავსეთ, შენი კვნესა-მე, იქნება მობრუნდეს, მოვეხმარები...

— კარგი!.. ესეც იქ შეიყვანეთ! — უბრძანა დარაჯებს გიორგიზე თითის მიშვერით და გარედ გავიდა...

III

— ბუქური გონს არ მოსულა? — შემოალო თუ არა კარი, დაეკითხა დაბალი ხმით უფროსი და იქავე კარებთან შედგა, რადგანაც ოთახის სიპატარავის გამო ადგილი აღარ იყო, წინ წამდგარიყო.

— თქვენ ბრძანდებით?! — განცვიფრებით დაეკითხა ბუქური, რადგანაც სრულებით არ მოელოდა უფროსის შემოსვლას.

„ამ ერთი საათის წინად უწყალოდ გააწკე-პლინა, — უეცრად გაურბინა თავში გიორგის: — და ეხლა-კი კითხულობს: გონს არ მოსულაო. თუ შეინანა?!“

— როგორ არის? — ჰკითხა ხელმეორედ უფროსმა, რაკი პირდაპირი პასუხი ვერ მიიღო.

— ჯერ გონება არ დაპირუნებია. უაზროდ რალაც სიტყვებს გაიძახის.

— აბა, რა კარგია სიჯიუტის გამოჩენა?!
ერთი მუქა მიწისთვის რაზე იკლავდა თავს? —
იმ კილოთი უთხრა უფროსმა, თითქოს გამარ-
თლებას სთხოვს გიორგისო.

— ეჭ, შე დალოცვილო...

— უუ!.. ჰ! ჰ!.. — უეცრად წამოიკვნესა
ბერამ და ქვითინი მორთო...

— ბერა, ბერა, რა გატირებს? — მაშინვე
მიუჯდა გვერდით გიორგი და ჩაეკითხა.

— წაიღეს, წაიღეს?! — ქვითინებდა ბერა
და თან ცარიელა ცხვირსახოცა ფლეთდა.

— ბერა!..

— გივარგი, რად მიეცი, რადა? — მოკრია-
ლებული თვალები მიაშტერა გიორგის და, თუ-
კი რამ-ლა შეეძლო, მაგრად დაუჭირა ხელები.

— ბედ-შავო, როგორ დავანებებდი?!

— მაშ რა უყავი?

— გულზედ გაყრია!

— ჰა?! — სწრაფლ ხელი გულზე მოისო ბე-
რამ, უბეში ჩაიყო და მიწა შეაგროვა. — გი-
ვარგი! — აღტაცებით წამოიკვნესა და გიორგის
ხელს დაეკონა.

— რადა ტიროდა? — შეეკითხა უფროსი,
როდესაც ბერამ თვალები მილულა.

— მიწა მოიკითხა.



— მიწა?! შემოვატანინებ, უთხარით, ის
მიწაა-თქმ.

— არას უშველის. ეხლა აღარ უნდა.

— რო კიდევ მოიკითხოს?

— აღარ მოძებულის. იპოვა მიწა.

— როგორ?..

— წელან გულში ჩავუბნიე. ამის სურვი-
ლი ავასრულე. მეტიც არა უნდოდა-რა.

— მერე მაგან რა გაიგო? უგონოდ იყო.

— ეხლა ვუთხარი და ამისთვის დამშვიდდა.

— ბუქური, შენ ეშმაკი კაცი ყოფილხარ.

შეგონა, ჩემი სურვილი შეასრულე, თურმე მა-
გისი შეგისრულებია.

— ორსავე. ეგრე რომ არ მექნა, მომა-
კვდავს კიდევ დასტანჯავდით.

— ჰაა, ბუქური, ეჭიმისთვის გავგზავნი, იქ-
ნება მოსულიერდეს!

— არა, არა, შენი კვნესამე, ტყუილად
დასტანჯავს. ამას სააქაოს პირი აღარ უჩანს.
აბა, ამას დახედე! — გიორგიმ ამ სიტყვებით კარ-
გა ბლომად ნახველში შერეულ სისხლზე მიუ-
თითა.

— ეგ რა არის?

— ნახველი!

— ეხლა მოუვიდა? — განცვიფრებით ჰკითხა

უფროსმა და განცვითრებითვე განაგრძო კითხვა:—გულში ხომ არავის უცემია?

— არა, ეს კარგა ხანია სისხლს იღებს.

— საწყალი, ჭლექი ყოფილა!.. მერე რა ახალგაზდაა!..

— ახალგაზდაა, საწყალი!..

— ეხლავ, ეხლავ წამოვალ!..—თვალებ მილულულმა წაილაპარაკა.

— რას ამბობს?

— ბოდავს თავისთვის.

— მაშ, საწყალი, ჩქარა მოკვდებოდა, თუ ჭლექია?

— ორი პარასკევი აღარ ედო წინ.

— საწყალი! რო მულდნოდა, არ ვაცემინებდი... რძეს გამოგიგზავნი, დაალევინე.

— კარგი იქნება.

— მაშ ნახვამდის, რძე თუ შინ არა მაქვს, მოვატანინებ და ჩქარა შემოგიგზავნი.

— ეგრე,

უფროსმა კარი გაიხურა. გიორგი კედელს მიეყუდა და უმწეოდ მზერა დაუწყო ბერას, რომელსაც ტუჩები ხან ღიმად ეშლებოდნენ და ხან კიდევ მრისხანედ ეკუმვოდნენ...

— გივარგი, ხედავ მამა-ჩემს?

— მამა-შენს აქ რა უნდა? უფროსი იდგა ეხლა და წავიდა.

— ეეეჭ! მამა-ჩემს ვერა ვცნობ, თუ?! მი-დის!.. მამი! — სასოწარკვეთილებით წაიკვნესა და თვალები ისევ მიღულა.

გიორგიმ პირი მოარიდა და უჩუმრად ცრემ-ლები ცერა თითით მოიწმინდა...

--- ბერა, ბერა, საით მიექანები?

— აუუ, შენი კვნესამე, საიდან გამომეც-ხადე?! რამდენი ხანია, გოგოვ, დაგეძებ და ეხ-ლა-კი მოულოდნელად წინ დამხვდი!

— რაისთვის დაგჭირვებივარ, რომ და-მეძებ?!

— თინავ, თინავ, ლამის არის დავილიოდ და შენ-კი მკითხავ; რაისთვის დაგჭირვებივარო.

— ხა, ხა, ხა, ბერა, ეგ რა გაცვია?!

— ეს, რაი ვიცი, მგონი, სამგზავროა, აი თანა მაქვს ტანისამოსი. შენთვინაცაა, აი, ბოხ-ჩაში გამოკრულია... შენ აქ ჩაიცვი, მე-კი არაგვზედ ჩვალ, ვიბანავებ, თორემ ნამგზავრი ვარ, მტვერითა და ვაი-ვაგლახით გაგუნგლუ-ლი...

— ჩემო ბერა, რა მშვენიერი ხარ მაგ ტა-ნისამოსში!.. მე როგორლა მიხდება შენი მო-ტანილი კაბა?

— დახატული ხარ, თინავ, დახატული!..
აი, მზე როგორ შეგედრების!

— უი, ბერა, ცხორი დამრჩება გადმოსალალი!

— საითაა შენი ცხორი?..

— აი, იმ მთის იქით!

— ჩემი ცხორიც იქით იქნების, წავიდეთ.

— ბერა, შავი ხილი არ გინდა?..

ჟამე!

— შენი ხელით მოწყვეტილი შხამიც მიამების! რატომ არ მინდა?

— მოიცა, მოიცა, შენი ხელები უკან წაიღე. პირი დააღე, ჩემი ხელით გაჭმევ!

— თინავ, შენი თოლები მწვავენ. შავ ხილზედ უშავესნი არიან შენი თოლები!

— ბერა, გაჩუმდი, თორე ალარ გაჭმევ!..
ჰა, თითი არ მამკვნიტო!..

— ქალავ, ნუ მაცინებ?!.

— უი!.. ეს რაა!!.

— ქალავ, რამ შეგაშინა?!.. მამეკარ, მამეკარ, ნუ გეშინიან?!.. რანაირად თრთი?!..

— გავიქცეთ, ბერა, გავიქცეთ!.. აგერ ჩენკენ მოქმუის...

— სადაა?

— აგერ!

- უჰ, წმიდა გივარგი, შენ დაგვიფარე!..
 შეევედრე, თინავ, შეევედრე წმიდა გივარგის!..
- ბერა, რა არის?
- გველაშაპია!..
- ლომისავ!..
- ლომისავ!..
- თინავ, მივეგებნეთ, მივეგებნეთ!.. აი,
 იხაროს შენმა მარჯვენამ!..
- ბერა, წმიდა გივარგია, რა მარჯვედ
 ჰყრა გულში!..
- უჰ, რა სისხლის ღვარი მიდის!..
- გავიქცეთ!..
- წმიდა გივარგი, ნება გვიბოძე, შენ.
 ფეხთა მტვერს ვემთხვიოთ!..
- ადექით, ადექით, შვილებო, აგერ იმან
 გამომგზავნა! წავიდეთ იმასთან.
- დედა ღვთისაა, თინავ!..
- ის გაკურთხებთ!.. მუჭაში რა გაქვს,
 ბერა?
- მიწა!.. მამა-პაპის საფლავის მიწაა. დე-
 და ჩემს მოვატანინე.
- გაუფრთხილდი, გაუფრთხილდი, წავი-
 დეთ!..
- რა მემართება?!.. თინავ!.. გული მი-
 ნათლდება!.. უჰ, რა ბრწყინვალებაა?!.. აღარას

ვხედავ!.. ბრწყინვალება, ბრწყინვალება! თინავ, შენც ბრწყინვალებაში იძნევი? სადა ხარ? ვეღარა გხედავ, სადა ხარ? ჩემ თავსაც ვეღარა ვხედავ, აღარა ვგრძნობ თავს!.. ვიძნევი ბრწყინვალებაში? ჰაააჲა?!.

— ეს რძე უფროსმა გამოგზავნა და შემოგითვალა: დაალევინე და მეც ჩქარა მოვალო! — კარები შემოალო თუ არა დარაჯმა უთხრა დაპირქვავებულ გიორგის და ტოლწით რძე გაუწოდა.

ამ სიტყვების გაგონებაზედ გიორგი შმაგივით წამოვარდა, თვალები მიანათა დარაჯს; წამს უნდოდა მივარდნოდა და მიეხრჩო დარაჯი, მაგრამ უეცრად სხეული მოუდუნდა, ისევ ბერას უსულო გვამს დაემხო და ხმა-მაღლივ ქვითინი დაიწყო.



„ჩემი სამშობლო ჩემი გულია!..“

I

— ააა, რას მივაწეროთ, ზდის, რომ მოგ-
 გონებივარ?! — გაკვირვებით შევეკითხე ზდისლავ
პშივალსკის, როდესაც იმან კარი შემოაღო.

მე და პშივალსკი რუსეთში სწავლის დროს
 პირველ კურსზე დავმეგობრდით, და ჩვენ
 დამოკიდებულებას სწავლის გათავებამდის ერთ-
 ხელაც ფერი არ უცვლია. ერთმანეთის აზრი,
 სული და გული კარგად გვქონდა აწონილ-და-
 წონილი და ოთხი წლის განმავლობაში თით-
 ქმის სულ ერთად ვიყავით, ერთადვე ვმეცა-
 დინეობდით და ჩვენს საიდუმლოს უტყუვრად
 ერთმანეთს ვუზიარებდით...

ექვსმა თვემ განვლო, რაც მე და პშივალ-
 სკი გავშორდით სწავლის დამთავრების შემდეგ.
 ჩვენ ერთმანეთისა აღარა ვიცოდით-რა. მე ტფი-
 ლისში ვიყავი, ის-კი, არ ვიცოდი, იმავე ქა-
 ლაქში დარჩა თუ გაემგზავრა საითმე. ვფიქრო-
 ბდი კია, რომ იქავე უნდა დარჩენილიყო. ყო-
 ველ დღე წერილის მიწერას ვაპირებდი, მაგრამ

დღეს-ხვალიობით ექვსმა თვემ გაირჩინა და მე-კი ერთი წერილიც ვერ მივწერე.

ექვსი თვის შემდეგ ქუჩაში უეცრად სისინი შემომესმა დაძახების ნიშნად. თუმცა დარწმუნებული ვიყავი, მე არავინ დამიძახებდა, მაინც უნებურად მივიხედე და ჩემ თვალს არ დავუჯერე: ზდისი მოეჩინებოდა ჩემკენ. სიხარულით გადავკოცნეთ ერთმანეთი. თითქმის ისევ ძველებური მეგობრობა დამყარდა ჩვენ შორის. თითქმის ყოველ დღე ვხვდებოდით. ხან ის იყო ჩემთან, ხან კიდევ მე მივდიოდი იმასთან. ერთად დავიარებოდით, ვშინჯავდით ყოველსავე, რაც კი საყურადღებო იყო ტფილისში. რასაკვირველია, მე ვწინამძღვრობდი, ვუამბობდი წარსულს, აწმყოს ამა თუ იმ საგნის შესახებ. ყველაფერს გაფაციცებით ათვალიერებდა და დიდის აღტაცებით მისმენდა...

ერთი წლის განმავლობაში თითქმის ყოველ დღე ვხვდებოდით და ხშირად სული და გული ერთმანეთისათვის გადაგვაშლია.

ზდისი მოხდენილი ვაჟკაცი იყო, კარგი მოსაუბრე, და, რასაკვირველია, ვისაც-კი გავაცანი, ყველაზე, ნამეტნავად ქალებზე, სასურველი შთაბეჭდილება მოახდინა. როგორც ქინქლა ზაფხულის ღამეს სანთლის შუქს, ისე

ეხვეოდნენ ქალები. ჩვენმა ქალებმა ომელიმე ყმაწვილისა „მოდაში“ იციან შემოღება. ყველანი იმაზედ ლაპარაკობენ, ყველანი ცდილობენ იმასთან იბასონ, იმასთან ერთად დრო გატარონ და... ზდისიც „მოდაში“ იყო ამ ერთ წელიწადს...

— იცი, ჩემო მეგობარო,—დაიწყო ერთ საღამოს ამ ტაციაობის შემდეგ:—უბედური. ადამიანი ხარ!

— რაო?!—განცვიფრებით შევეკითხე და თვალები მივაცეცე.

— უბედური ხარ-მეთქი!..—გაიმეორა და ოთახში სიარული დაიწყო.

— სრულებითაც არა ვთვლი ჩემ თავს უბედურად!.. მე... ჩემ სამშობლოში ვარ და ამით ვარ ბედნიერი!—ცოტა არ იყოს წყრომით ვუპასუხე და პირი მოვარიდე.

— კიდევაც მაგისათვის ხარ უბედური!..— ჩემდა საუბედუროდ კიდევ ახსენა სიტყვა „უბედური.“

— რატომ ყვავივით დამჩხავი?! გთხოვ, აღარ ახსენო ეგ სიტყვები!..—ეხლა-კი მთლად მოთმინებიდან გამოსულმა ხმა-მაღლა წამოვილაპარაკე და სიარული დავიწყე.

— ჩემო მეგობარო, ჩემო გაბრო! შემო-

მეხმაურა ზდისი და წინ გადამიდგა:—განა შენ გასაჯავრებლად გეუბნები: „უბედური ხარ.“ დაკვირვება მაიძულებს ეს გითხრა. აგერ, ერთი წელიწადია შენთან ერთად ქართველ საზოგადოებაში ვტრიალებ და, მგონი, საკმარისია ჩემი შეხედულობა ვიქონიო...

— მერე მაგის წინააღმდეგი ვინ არის?

— შენი წყრომა.

— ყვავივით ნუ დამჩხავი, ამას გეუბნები მხოლოდ.

— ყვავობისაგან ლმერთმა დამიფაროს!.. ცოტა მომისმინე და შემდეგ გინდა ყალხზე შედექი.

— ცოტათი კი არა, გინდა მთლად სმენად გარდვიქმნები. დაიწყე!

— მასხრობაც დაიწყე, მაგრამ მაინც გეტყვი!

— გისმენ.

— ბედნიერად გთვლიდი იქ, როდეს შენს ალტაცებულ სიტყვებს შენი ერის შესახებ ვისმენდი და ვუმზერდი იმავე დროს შენს თვალებს. ვთვლიდი ბედნიერად იმ ერსაც, რომელსაც შენ ეკუთნოდი. დღეს-კი, სამწუხაროდ, ძალა უნებურად წინააღმდეგი უნდა გითხრა. რა უნდა გაარიგოს ადამიანმა იმ ერში, რომელსაც

ჯერაც არ შეუგნია ის უბრალო ჭეშმარიტება, რომ თავის დედა ენით უნდა იღაპარა კუს, უნდა...

— ეგ შეუგნებლობით სრულებითაც არ ემართებათ! — შევაწყვეტინე ბაასი: — შეგნება-კი აქვთ, მაგრამ გარემოების ბრალია, არ ეხერხებათ, რადგანაც სასწავლებლებიდან თითქმის განდევნილია ჩვენი ენა... სკოლები-კი...

— ვიცი, ვიცი, რაც გინდა სთქვა!.. ოჯახები ვიღას ხელშია?!.. იქიდან ვიღამ გასდევნა?..

— არავის გაუდევნია და ლაპარაკობენ კიდევაც.

— გაბრო, რას მოასწავებს შენგნით განგებ თვალებისა და ყურთა დახშობა?!.. ან რა გაიძულებს ჩემთან სიტყვის გადაბრუნებას?! ვინ ეცმის ხოლმე ჯვარზედ თითქმის ყოველ ნაცნობის ოჯახში ენის შესახებ?! მე თუ შენ და რამდენიმე შენი მეგობარი? ენა ვის გახდომია ერთად-ერთ სალაპარაკო საგნად ნაცნობებთან? და ეხლა-კი იძახი: ლაპარაკობენო. რომ ლაპარაკობდნენ, მაშ რაღა ტყუილად თავს იხე-თქავთ ენის შესახებ ბაასით?

— ეგ სულ მცირედი ნაწილია ჩვენი ერი-სა და, მაშასადამე, ერზედ აქ ლაპარაკი არ შეიძლება.

— ეგ მცირე ნაწილი, ჩემო გაბრო, განა-

თლებული ნაწილია. თუ ყველა უმაღლეს სასწავლებელში არ ყოფილა, საშუალოში, დაბალში მაინც ყოფილა. ერთი სიტყვით, ვისაც-კიცოტა რამ სწავლა მიუღია და ნასწავლ საზოგადოებაში გარეულა, ყველას დედა ენაზედ ხელი აუღია. კარგა იცი, შენი ერი ეხლა სწავლა-განათლებას ძალიან ეტანება. მოსალოდნელია, უმრავლესობა შენი ერისა ისწავლის, და სწავლა-კი, როგორც ხედავ, უკულმა მოქმედებს შენს მოძმევებზე. მაშინ მცირედი ნაწილი-ლა დაგრჩება დედა ენაზედ მოსაუბრე...

— ის ერი, რომელსაც წარსული დიდებული აქვს, რომელსაც თავისი ლიტერატურა აქვს, არ მოისპობა! — გაბრაზებულმა კიდევ შევაწყვეტინე სიტყვა და აჩქარებულის ნაბიჯით დავიწყე სიარული ოთახში.

— თუ წამკითხველი არა ჰყავს, თუ ხელის შემწყობი არა ჰყავს ლიტერატურას, მალე მოისპობა. ორ მილიონამდის ხართ და ორი მილიონი რვაასიდან ათას ხუთასამდის მკითხველს იძლევა. ნუ თუ მართლა წერა-კითხვის მცოდნე ათას ხუთასზე მეტი არა გყავთ? არა, ბევრია მცოდნე, მაგრამ სულ მცირედი-ლა ეტანება თქვენ უურნალ-გაზეთობას. ისიც, მგონი, მომეტებული ნაწილი ამათგან ძალდატანებითი



ხელის მომწერია. მე დარწმუნებული ვარ, რა-
დგანაც ბევრჯელ მქონია შემთხვევა თვალ-ყუ-
რი მედევნებინა, ვინც იწერს, არა კითხულობს
და არც სურვილი აქვს წაიკითხოს. რაა ამისი
მიზეზი?! თუ შენ გეძნელება ამისი თქმა, მევე
გიპასუხებ: თქვენ ჯერ ეროვნული თვით-შეგ-
ნება არა გაქვთ...

ვვრძნობდი მის სიმართლეს; ყოველი მი-
სი სიტყვა გულს მისერავდა, მაგრამ მე მაინც
ვცდილობდი როგორმე გამექარწყლებინა...

— იცი, გაბრო, ერთად-ერთი თანამგრძ-
ნობელი გყავს, შენი აზრები მოსწონს. ეს — მა-
რთა. მართლა, რა კარგი ადამიანია!.. — უეც-
რად შესცვალა ლაპარაკის კილო და მეგობრუ-
ლად ხელი გადამხვია.

თავისუფლად ამოვისუნთქე. გამეხარდა
ლაპარაკის კილოს შეცვლა. თვით მე ბევრჯელ
მიფიქრია ამ საგნის შესახებ და ყოველთვის სა-
ხე დამღრეჯია, მწარე ფიქრები მომწოლია მო-
მავლის შესახებ. გადავწყვიტე მომავალზედ ალარ
მეფიქრა და მხოლოდ აწმყოში ოდნავ მბუუ-
ტავი ცეცხლის ალით გული მომეთბო და შეძ-
ლებისადა ჭვალად მეკეთებინა რამ მომავლის
ასაცდენად.

ზდისის მართალმა სიტყვებმა სუნთქვა შე-

მიყენეს და არ ვიცი, რითი გათავდებოდა ჩე-
მი და მისი დამოკიდულება, რომ ლაპარაკის
კილო არ გამოეცვალა.

— მართალი ხარ, ჩემო ზდის, მართ კარ-
გი ადამიანია. ნამდვილი ქართველი ქალის ტი-
პია. — გაბრწყინვებულმა ვუპასუხე და პირდაპირ
თვალებში მზერა დავუწყე.

— მეონი, არც მაროსა აქვს ეროვნული
თვით-შეგნება.

— არა, ზდის, მაროს-კი ცილსა სწამებ!

— ნეტა არ იქნება! მაგრამ აი რას გეტ-
ყვი. მართ მხურვალე მიმდევარია ეროვნული
საქმეებისა მხოლოდ იმისთვის, რომ შენ ხარ
მიმდევარი. შენ-კი, როგორლაც ვატყობ, მოს-
წონხარ მაროს.

— ერიჰაა, ეხლა-კი სინამდვილეს ძალიან
შორს გაუსხლტი, ჩემო ზდის!..

ამ ბაასის შემდეგ ზდისი დავკარგე. რამ-
დენჯერმე მივედი იმასთან, მაგრამ შინ არ და-
მიხვდა. ის კიდევ ჩემთან აღარ მოდიოდა. ერთი
ორჯელ ქუჩაში შევხვდი. შევეკითხე: „რატომ
მოსპე სიარული?“ „საქმეები მაქვს, საქმეებიო,“
მიპასუხა მოკლედ და გამშორდა. რა გაეწყო-
ბოდა. ძალა-უნებურად შევწყვიტე ზდისთან მე-
გობრობა და ჩქარა სულ გადამავიწყდა...

რასაკვირველია, გავცვიფრდი, როდესაც
ერთი წლის შემდეგ ზღისი შემოვიდა ჩემ-
თან.

— რას მივაწერო შენი დაკარგვა? — ვკით-
ხე მე.

— რა ვიცი, რას უნდა მიაწერო! .. — მიპა-
სუხა მოკლედ და მოწყვეტით სავარძელზე და-
ეშო.

ლოდნა დავუწყე, რას მეტყოდა, რადგა-
ნაც ჩემ კითხვაზედ პირდაპირ არ მიპასუხა.

ზღისმა-კი რამდენჯერმე შუბლზე ხელი
გადისო, ერთი ორჯელ ლრმად ამოიოხრა და
უცნაურად ბორგვა დაიწყო ...

— გაბრო! — კარგა ბორგვის შემდეგ წამო-
დგა და ხელი დამიჭირა: — პატარა გავიაროთ,
აქ ჰაერი არა მყოფნის! ..

ცოტა არ იყოს, ზღისის უკანასკნელმა სა-
ქანიელმა მაწყენინა და ჩემდა უნებურად გამა-
ფიქრებინა: „გასჭირებია რამ და ამისთვის მოვუ-
ნახივარ, თორემ რატომ ამ ერთი წლის განმა-
ვლობაში, თუ-კი მეგობრად მთვლიდა, ერთხელ
მაინც არ მიკითხა! ?“ მინდოდა უარი მეთქვა,
მაგრამ მისმა ბორგვამ გამაბედვინა და ცოტა
ყოყმანის შემდეგ ვუპასუხე:

— კარგი, გავიაროთ! ..

II

ქალაქის განაპირას ვცხოვრობდი და ჩემი გასართობი იქავე ახლოს სასაფლავო იყო. ხშირად, ხშირად, თუ-კი ამინდი ხელს მიწყობდა, იქ ვათენებდი ღამეს და იქ ვეძებდი სულის სიმშვიდეს. ასეც იქმნება. მხოლოდ იქ ვპოვებ სიმშვიდეს, საუკუნო სიმშვიდეს.

მე და ზდისს ბევრჯელ გაგვივლია იქით და ეხლაც სახლიდან გამოსვლის უმაღლ ორმავე პირი იქით ვიბრუნეთ.

გაჩუმებულები მივდიოდით. ის არ ვიცი, რაზედ ფიქრობდა, მე-კი თვალს ვადევნებდი ჩამავალ მზის სხივებს, თუ იგინი როგორ ეალერ-სებოდნენ არემარეს, როგორ ენანებოდათ მასთან დაშორება...

ჩქარა დავიწყებულ სასაფლავოს ავუდექით... მინგრეულ-მონგრეული საფლავები, ზოგან კიდევ გადათხრილი, აქა-იქა მიყრილ-მოყრილი საფლავის ქვები სახითათოდ ხდიდნენ სასაფლავოზე სიარულს. სასაფლავოს გვერდით გავუარეთ და ხევის პირას მდგომი ხისკენ, რომლის ქვეშაც ერთი საფლავის ქვა მოჩანდა, წავედით.

ზდისი ჩამოჯდა საფლავის ქვაზე, მე-კი იმის იხლოს მხარ-თეძოზე მწვანეზე წამოვწექი

და პირდაპირ ხევის მეორე ნაპირს დაბინაუებულს, საზაფხულოდ მთებისკენ მიმავალ თათრის ოჯახობას დავუწყე მხერა.

ურმები, საქონელი, ძალლები, აღამიანი ორივე სქესისა სხვა-და-სხვა ფერადი ტანისამოსით არეულიყვნენ ერამანეთში და ფუთფუთებდნენ; მოისმოდა ყმუილი, ბლავალი, ყეფა, ყვირილი...

სულ მიმავიწყდა ზღისი. დამავიწყდა, რომ ზღისმა წამომიყვანა აქ და რაღაც უნდა ეთქვა ჩემთვის.

მთლად ჩამნთქა უბრალო, შეუხამებელმა ცხოვრებამ, ფრინველივით ზამთარ-ზაფხულ შესაფერი ჰავის მაძიებელთა ცხოვრებამ.

„ვინ იცის,“ ვფიქრობდი ამ დროს: „რა-მდენი ვაი-ვაგლახი ატყდებათ თავს, რანაირად სჯის ბუნება ამ ბუნების შვილთ, მაგრამ, ვგონებ, ბედის ისე მომდურავი არავინ იქნება მათვან, როგორც ჩვენ, ვითომ და უკეთეს პირობებში ჩაყენებულები, რთული ცხოვრების შვილნი... მცირეოდენ შეფერხებას სასოწარკვეთილებამდის მივყევართ, სასოებას ვკარგავთ, და ესენი-კი სიკვდილსაცა და სიცოცხლესაც სიხარულით ეგებებიან. ჩვენ წყვდიადში დავფათურობთ, დავეძებთ, მაგრამ რას? არ ვიცით. ესენი-კი გარკვეული გზით მიდიან და იციან კი-

დევაც, საით...“ მაგრამ ამ დროს უნებურად
მიიქცია ჩემი ყურადღება ჩარჩების, მერძევების
და ქალაქის სხვა მცხოვრებთა, ქალთა თუ მამა-
კაცთა ტაციობამ, რომელნიც ამათ შორის ირე-
ოდნენ და ყიდულობდნენ ყველს, ქათამს, რძეს,
კვერცხებს და სხვა ნაწარმოებს, და უეცრივ
გულს ჩამწყდა. „ჩაითრევენ, ჩაითრევენ ამათაც
წყვდიადში და ესენიც ჩვენსავით ხელების ფა-
თურს დაიწყებენ. ამათი მომავალიც ისევ ის...“

ველარ დავათავე, თვალები მაგრა მოვიფუნიტე,
თავი გავიქნიე, რომ იქიდან იმათ ხვედრზედ
წარმოდგენა გამომედევნა და ზდისს მივხედე,
რომელიც ისევ ერთ წერტილს მისჩერებოდა...

— ზდის, რატომ მაგრე საიდუმლოების
ბურუსში გახვეულხარ და არას იტყვი? — და-
ვეკითხე, რაკი ზდისი დავინახე; მომაგონდა მი-
სი აღელვება და აქეთ წამოსვლის მიზეზი.

— რა საიდუმლოების ბურუსში?! ისე! —
ხელები გაასავსავა ჩემ შეკითხვაზე და დაბნევით
მიჰასუხა.

— ხომ სიყვარულის ბადეში არ გაები?!

— ვინ გითხრა?! — გაოცებით დამეკითხა.

— ვის უნდა ეთქვა?! შენი გამომეტყვე-
ლება მეუბნება.

— ვითომ რაზედ მატყობ?

— ისე ხარ გაბუებული, რომ ძალა-უნებურად ეგ უნდა ვიფიქროთ.

— როგორდა ისე? მგონი ჩვეულებრივადა ვარ!

— ინდოურსავით გაბუება ჩვეულებრივი მოვლენაა შეყვარებულთათვის.

— დაგლახვრა ღმერთმა! რალა ინდოურებს შეადარე შეყვარებულები! — ღიმილით შემომეხმაურა.

— მე-კი არ შევადარე, თითონ ედრებიან.

— იმის დასამტკიცებლად, რომ შენ სცდები, ეხლავე გეტყვი, რისთვისაც მოვედი შენთან.

— ვნახოთ.

— ხვალ სამშობლოში მივდივარ.

— დროებით?

— არა, სამუდამოდ.

— ჩემ მოსაზრებას უფრო ამტკიცებ.

— სრულებითაც არა.

— როგორ თუ არა? ეგ მოვლენა უნდა გახარებდეს და არ გალონებდეს. შენ-კი...

— სულ სხვა აღელვება მეტყობა, არა?...

— დიალ, უთუოდ გული აქა გრჩება!

— თუ არას მათქმევინებ, როგორ გაგაგებინო ჩემი აღელვების მიზეზი!

— მაშ გისმენ.

— ეს ერთი წელიწადია, — დაიწყო ზდის-
 მა, — რაც ჩვენ, არ ვიცი რად, ერთმანეთთან
 სიარული მოვსპეთ. ეხლა-კი, როცა გამიჭირდა,
 შენთან მოველი, და აი ეს გარემოება მაღელ-
 ვებდა...

— მერე, რა გაგიჭირდა?

— საგზაო.

— ხა, ხა, ხა!... — გულიანად გადვიხარხარე
 და ხარხარითვე განვაგრძე: — არა, ჩემო კარგო,
 საგზაო მაგრე არ აგალელვებდა! ცოტათი მაინც
 სცრულა.

— მართალს გეუბნები და ეხლა შენიცი,
 გამიმართავ თუ არა! ხვალ-კი უეჭველად უნ-
 და გავიდე, — ცოტა დარცხვენით მიპასუხა და
 თვალი ცის სივრცეს გააყოლა.

უკვე დაღამებული იყო. ცა ციაგი ვარს-
 კვლავებით მობნეულიყო და ქალაქს ადევნებდა
 თვალ-ყურს, რომელიც თითქოს ეხლა იწყებს
 ცხოვრებასო, ისე ხმაურობდა. ჩვენ პირდაპირ
 ბინები ლრმა ძილს მისცემოდნენ, და მხოლოდ
 დრო-გამოშვებით ძალლის ყეფა-ლა გამოისმოდა
 იქიდან.

— ხელს გაგიმართავ, მაგრამ სცრულ-კი!...

III

სწორედ ერთი თვის შემდეგ, რაც მე და ზდისი უკანასკნელიდ ერთმანეთს გავშორდით, ფოსტიდან ფულის შესახებ უწყება მომივიდა. თუმცა სულ გადავიწყებული მქონდა ეს გარე-მოება, მაშინვე მივხვდი, ვისი გამოგზავნილიც იქნებოდა, რადგანაც უწყებაში აღნიშნული რა-ოდენობა ფულისა ეთანხმებოდა, რამდენიც ზდისს მევეცი საგზაოდ.

ბევრი ვაი-ვაგლახის შემდეგ ძლივს მივი-ლე წერილი ფულით და იქვე გავხსენი. ხელში ბლომად მომხვდა წერილის ფურცლები და მა-შინვე წერილის კითხვა დავიწყე.

„უკაცრავად, ძვირფასო მეგობარო გაბრო, რომ ფულის გამოგზავნა დაგიგვიანე, — ასე იწყე-ბდა ზდისი წერილს: — მართალია, მეორე დღესვე შემეძლო ფულის უკან დაბრუნება, მაგრამ არ დაგიბრუნე, რადგანაც არ მინდოდა ისე სწრაფად სიცრუვე გამომემულავნებინა... „ხელს, — თუ გახსოვს შენი სიტყვები, — გაგიმართავ, მაგრამ სცრულბ-კი,“ მითხარი, როდესაც გემშვიდო-ბებოდი. მართალიც იყავი. როდესაც შენთან წამოველ, სრულებით ფული არ გამხსენებია, არც მიჭირდა. ფული ბლომადა მქონდა. სულ

სხვა განზრახვით მოვედი შენთან და ფულზე-
კი მოვჩინახე. რა იყო მიზეზი?.. რა ვიცი. მგო-
ნია-კი, ისევ ის, რის თქმაც მინდოდა შენთვის.
მაშინ ძალიან აღელვებული ვიყავი და უთუოდ
ამან შემიშალა ხელი. ეხლა-კი, ცოტა არ იყოს,
დამშვიდებული ვარ, სულ სხვა გარემოებაში ვარ
და თავისუფლად შემიძლიან მოგითხრო ყველა-
ფერი, თუმცა სასიამოვნო იქნებოდა ჩემთვის,
ამ წუთს ჩვენ შუამავლობას ქაღალდი არ გვი-
წევდეს...

„უეჭველია, გაგიკვირდებოდა ჩემი დაკარ-
გვა იმ დღის შემდეგ, როდესაც მე შემომწამე,
ვითომდა „ყვავივით დაგჩხაოდი“. გამიწყერი კი-
დევაც. გახსოვს, განა? ამ დღეს ერთი პდამიანიც
ვახსენეთ, რომელიც ლმობიერად დაახასიათე და
სთქვი: ნამდვილი ტაპია ქართველი ქალისაო...“

„ვერ წარმოიდგენ, ჩემო მეგობარო, რა-
ნიირად მიზიდავდა მისი კვიმეტი, დიდრონი,
საიდუმლოებით სავსე თვალები! ბევრს ვიცნობ
და მაგვარი თვალები მხოლოდ ქართველებში
შემხვედრია. მაროს მართლა და ტიპიური თვა-
ლები აქვს. დანარჩენ მის სილამაზეზე აღარას
ვამბობ, რადგან მარო იშვიათის სილამაზისაა.
რას გეუბნები, როდესაც შენ თითონ კარგად
იცნობ და ჩემზე აღრეც გყავს გაცნობილი.

„მე ყოველთვის ცნობის მოყვარეობას მიძღვდა მისი საიდუმლოებით მოცული თვალები, და, აი, სწორედ იმ დღიდგან შევუდექი გამოცნობას. მინდოდა შემეტყო, რა იმარხებოდა იმის თვალების სილრმეში. მეგონა, შენ მოსწონდი და ამისთვის გერიდებოდი და ვცდილობდი როგორმე ისიც არ შეგხვედროდა, რომ ხელი არ შეგეშალა ჩემთვის. როცა გიყვარს ვინმე, გულწრფელი მხოლოდ იმასთან ხარ. მეც პირველადვე შევეცადე, რომ მაროს შევყვარებოდი. მე ხომ გადვირიე, ისე შემიყვარდა. ერთხელაც ალარ გამხსენებია ვანდა, რომელსაც პირობა მივეცი ცოლ-ქმრობისა. წერილებსა მწერდა ვანდა, მე-კი პასუხსაც ალარ ვწერდი. თუ მივწერდი, იმასაც ამინდზე.

„ჩქარა დავრწმუნდი, რომ შენ მაროს სრულებით არ მოსწონდი. შენ ხომ ხუთშაბათობით დაიარებოდი იმათსა? მე მხოლოდ ხუთშაბათობით არ მივდიოდი იმათსა, რომ შენ არ შეგხვედროდი...“

აქ შევდექი. შუბლზე ხელი გადავისვი და მძიმედ ამოვიხვნეშე. საშინლად მეწყინა. მაროს რამდენჯერმე შევეკითხე: ზღისი ხომ არ გინახავს მეთქი, და იმან ყოველ ჩემ შეკითხვაზე უარი მითხრა. ერთხელ კიდევაც დამავალა მა-

რომ, მიმეყვანა ზდისი. სულ დავკარგეთ, აღარ გვეჩვენება, გეთაყვა, გაბრო, შემდეგ ხუთშაბათს უეჭველად მოიყვანეო. მე განგებ ზდისთან წავედი და, რაკი შინ არ დამიხვდა, ბარათი დავუტოვე, რომ მაროსთან მოსულიყო. მაგრამ ის არ მოვიდა. მე ბოლიში მოვიხადე მაროსთან და დავძინე, რომ ზდისი მეც მემალება-მეთქი.

„ცბიერი!“ წამოვიძახე, ეს რომ მომაგონდა, და ბრაზით ავივსევი.

მართლა და, რა გულ-უბრყვილობა იხატებოდა იმის თვალებში მაშინ!.. მე ჩემ დღეში ვერ წარმოვიდგენდი, რომ იმას ცბიერება შეეძლო. მაგრამ...

„დანარჩენი დღეები,—დავიწყე ისევ წერილის კითხვა და თან სიბრაზით კბილებს ვუკერდი:—სულ ჩემ ხელთ იყო...“

„—ზდის, ხვალ საღამოს უეჭველად მოდი!—მითხრა მარომ რამდენიმე თვის შემდეგ, რაც დაგშორდი.

„— ხვალ ხომ გაბრო მოვა? უთუოდ დაგვიწყდა, რომ ხვალ ხუთშაბათია.

„— არა, მე არ დამვიწყებია. გაბრო მოვა, მაგრამ ავადმყოფობის მიზეზით არ მივიღებ.

„იმ დღეს-კი დავრწმუნდი, რომ შენ სრულებით არ მოსწონდი მაროს. შენ მაგივრად

ერთ წამს გული მომეწურა, მაგრამ ამავე დროს აღვფრთოვანდი კიდევაც.

„უთუოდ გეხსომება ეს სალამო?!“

მახსოვს, მახსოვს მეორე ხუთშაბათიც, როდესაც შინ არავინ არისო, მიპასუხეს. მახსოვს ის დღეც, როდესაც მაროს შემთხვევით ჭუჩაში შევხვდი და დავეკითხე: რატომ ხუთშაბათობა მოსპევი მეთქი, და იმან მიპასუხა: სალამოობით საქმე გამიჩნდა და ამისათვის თავისუფალი დრო აღარა მაქვსო, უნებურად წამოვიძახე ხმა-მაღლა და ისევ წერილის კითხვა დავიწყე:

„ამის შემდეგ ყოველი დღე ჩემ ხელთ იყო...“

„მე განზრახვა მქონდა ამომეკითხა მისი თვალის სილრმიდან ყოველივე საიდუმლო, მაგრამ ისე დავბრმავდი, რომ ზედა კანსაც ვეღარ ვარჩევდი; ზედა კანიც საიდუმლოებით მოიცო....“

„ხედავდა იგი ჩემ გადარევას თუ არა, არ ვიცი. მე-კი მეგონა, მარო ვერ ამჩნევდა ჩემ გრძნობას და, აი, გადავწყვიტე, სწორედ იმის წინა დღეს, როდესაც შენ ფული გამოგართვი, გამომერკვია ჩემი მდგომარეობა. გარემოებამაც ხელი შემიწყო.“

„სტუმრად ვიყავით. ლამის თორმეტი საა-

თი იქნებოდა, რომ მარო მე გავაცილე სახლში. გზაში ჩემდა უნებურად შევეკითხე: „მშვენიერი ლამეა, ეტლით ხომ არ გაისეირნებთ?“ სიამოვნებით დამთანხმდა მარო.

„—ი, ი... მარო!..—ხმის კანკალით მივმართე მაროს, როდესაც ჩვენ უკვე საბურთალოს გავცდით და ხელი დავუჭირე.

„მარომ თავი ჩემკენ მოიღო და ისეთი თვალით შემომხედა, რომ მეტი აღარა მინდოდა-რა. მისი თვალები სილრმე-სიგანით დავინახე. რასაც ვეძებდი, ვპოვე. აღარ იყო ჩემთვის დაკარგული მისი საიდუმლოებით მოცული თვალები. ეხლა ყოველივე ცხადი იყო ჩემთვის. მხოლოდ გულის-თქმას აევსო მისი არსება და სხვას ადგილი აღარასა ჰქონდა. ყოველისფერს დაგმობდა, ოღონდ გულის-თქმისათვის გზა მიეცა. მის თვალებში პირუტყვი დაცურავდა...“

„საკვირველია, იმ წამსვე, რა წამსაც მარო ჩემთვის ცხადი შეიქნა, უეცრად ცივი წყალი გადამესხა და გამოვთხიზლდი, გამოვერკვიე. სად გაჰქირა ჩემი აღტაცება, აღფრთოვანება ასე უეცრად?! რად გამაგრდა ჩემი მთრთოლვარე სხეული?! ასე უეცრად მჩქეფარე გულშა დონეზე ცემა რად დამიწყო?!“

ჭისე გულცივი ჩემ დღეში არა ვყოფილვარ,
 როგორადაც იმ წამს გარდვიქმენ...

„— მოაბრუნე ცხენები!..— ვუთხარი მეე-
 ტლეს, რომელმაც მყისვე შეასრულა ჩემი სიტ-
 ყვა..“

„მაროს ისევ შევხედე. მინდოდა, ჩემი ამო-
 ცანა ისევ ამოცანად დარჩენილიყო, მარო ისევ
 წინანდელ მარტოდ მჩვენებოდა, მაგრამ არა,
 არა და არა!.. მის თვალებში ისევ პირუტყვი
 დაცურავდა...“

„— ზდის, ჩემო კარგო! — თრთოლით და-
 იწყო მარომ და ხელი მხარზე დამადო, თვა-
 ლები-კი პირდაპირ თვალებში გამიყარა...“

„— მარო, — ცოტა დარცხვენით დავიწყე
 და ხელი წელზედ შემოვურკალე: — მთლიად გა-
 დარეული ვარ სიყვარულით, მაგრამ ვერა ვბე-
 დავდი აქნობამდის ცოტაოდნავ მაინც მეგრძნო-
 ბინებინა თქვენთვის ჩემი სულის კვეთება. დღეს-
 კი სრულიად დავრწმუნდი, რომ ყოვლად შე-
 უძლებელია ჩვენი შეუღლება...“

„— მერე რამ დაგარწმუნა? — ლმობიერად
 დამეკითხა მარო და უფრო ძლიერად მომეკრა.

„მინდოდა ზრდილობიანად შემეწყვიტა მა-
 როსთან კავშირი. მინდოდა არა ეგრძნო-რა,
 ისე დავშორებულიყავ მას, მაგრამ ეხლა გვიან-

ლა იყო. მარო მევე გამოვიწვიე გრძნობის გა-
მოსათქმელად და ეხლა ჩემი შხრით უკან დახევა
ძნელი იყო. კიდევ ჩავაშტერდი თვალებში,
იქნება პირუტყვი საღმე განქრა-მეთქი, მაგრამ
ამაოდ. პირუტყვი ისევ დაცურავდა...

„— რამა და სულ უბრალო გარემოებამ: მე
ამ დღეებში იძულებული ვარ წავიდე სამშობ-
ლოში. თუ გითხოვეთ, მაშინ მე იმედი უნდა
მქონდეს, მოგაშოროთ თქვენს სამშობლოს. ეს-
კი თქვენთვის, რამდენადაც გიცნობთ, ძნელი
იქნება. მართალიც ხართ...

„— ზდის, უთუოდ კარგად ვერ მიცნობთ,
რომ მაგას მეუბნებით!..

„— არა, მარო, ძალიან კარგად გიცნობთ
და ამისათვის გეუბნებით... .

„— ნუ-თუ გვინიათ, მე გაბროს დამჟა-
ვებულ აზრების მიმდევარი ვიყო?!.. თუ ასე
ფიქრობთ, სცდებით... .

„— დამჟავებულ აზრებზე არ მოგახსენებთ.
მე მწიმს, რომ სამშობლო ყოველისფერზე უძ-
ვირფასესია და ამისთვის მოგახსენებთ... .

„— ჩემი სამშობლო ჩემი გულია და სა-
დაც მე ვიქმნები, სამშობლოც იქ იქმნება! —
აღგზნებით წამოიძახა და თავისი მთრთოლვარე
ტუჩები ჩემ ტუჩებს შეახო.

„— ხვალ, ხვალ!.. — კოცნის დროს ვცდი-
ლობდი ჩამეგონებინა, რომ ხვალ გადავწყვი-
ტოთ უველაფერი-მეთქი, მაგრამ ვერ შევაგნე-
ბინე.

„— სადაც გინდა, იქ წამოვალ!.. უველა-
ფერს დავივიწყებ!.. — შმაგივით მეხვევოდა და
და თან ამას გაიძახოდა.

„— მარო, ხვალ მოვალ და უველაფერზედ
მოვილაპარაკოთ!.. — მკვახედ უთხარი და შევა-
ჟენე ეტლი იმათ კარებზედ. თან-კი მის თვა-
ლებს თვალს არ ვაშორებდი...


„მეგობარო, ერთ წამსაც არ მოშორებია
მის თვალებს პირუტყვი! დავალწიე თუ არა
თავი, მაშინვე გადავწყვიტე, თვალით აღარ
დავნახვოდი და მეორე დღეს შენთან წამოვედი
ამის სამშობლად. მაგრამ ვეღარ მოვახერხე და
საგზაო მოვიგონე. სამაგიეროდ ეხლა გწერ...

შენი ზდისი.“

„წ. კ. მინდოდა კიდევ მომეწერა, მაგრამ
წერილი ისეც გაგრძელდა. თითონ შენ დაასკვნი
და ამისთვის მე აღარას გწერ. მხოლოდ ამას გე-
ტყვი, რომ ჩვენი ქალები სულ სხვას იძახიან
ამ შემთხვევაში: „ჩემი გული ჩემი სამშობლო-
სია და თუ ჩემი სამშობლო არ იქნება, ნურც

ჩემი გული იქნებაო“... აი, ჩვენი ქალების
წმინდათა წმინდა და თავიანთ გულს კიდევაც
ანაცვალებენ სამშობლოს... მგონი, თქვენი ვაჟ-
კაცებიც ეთანხმებიან მაროს აზრს. ჰომო?!

ზღისი.“



ყოჩის გოდება

(ეტიუდი)

I

— წამო, წამო აქეთ და ყველაფერს გიამბობ!...—ეუბნება ყოჩი თავის სატრფოს და თან წინა მარჯვენა ფეხს გვერდში უბრავუნებს.

— სად წამოვიდე?!. აქ მიამბე!—უპასუხებს დედა-ცხვარი და ეურჩება.

— არა, ჩემო კარგო, მოვშორდეთ ამ ფარას. აქ დაგვიშლიან. აგერ, იქით ჯაგს მოვეფაროთ. იქ არავინ შეგვაწყვეტინებს ლაპარაკს. იქ გულ-დამშვიდებით გიამბობ ყველაფერს, ეხვეწება ყოჩი და ახლა ფეხის მაგივრად ცხვირის შეხებით იწვევს ფარის კარგა მოშორებით ჯაგისკენ.

— კარგი, წავიდეთ!...—დასთანხმდა დედა-ცხვარი და შემდეგ ორივე ერთმანეთს გაეკვრნენ და თავ-ჩაღუნულები ტუსტუსით ჯაგისკენ გაეშურნენ.

ფარა-კი, თითქოს ზღვა ოდნავ ირყევაო,

ჰევით და ჰევით ოდნავის მოძრაობით მიღის, მთის წვერისკენ, სადაც მწვანე ხავერდში ჩაფლული მწყემსი სალამურს გულსაკლავად აკვნესებს და ამ კვნესით თავის მწირ ცხოვრებას აუწყებს ცას და თავის ცხვრის ფარას...

— ხომ გახსოვს, გუშინწინ რომ წამიყვანეს აქედან?! — დაიწყო ყოჩია, როდესაც ჯაგს ამოეფარნენ და წამოწვნენ მწვანეზე.

— როგორ არ მახსოვს!.. იცი, მერე რანაირად ვიტირე, როდესაც შენ წაგიყვანეს?! მეგონა, აღარ დაბრუნდებოდი, როგორც ჩვენი საწყალი ბატკუნა...

— მართლა, მისი გზა და კვალი სულ დაიკარგა!.. მაგრამ... — მწარედ დაიღრიჯა ყოჩი, შუბლის კანი სიმწარით შეეჭმუხნა, რომ იმ ბატკუნას ხვედრის წარმოდგენა თავიდან გაედევნა, მოეშორებინა და თან ამას უსიტყვოდ გაიძახოდა: ნეტავი შენ, რომ ბატკუნას ხვედრი წარმოდგენილი არა გაქვს, თორემ მაშინ უფრო ბევრს იტირებდიო... — ჰო, დავანებოთ ბატკუნას ხვედრს თავი და, ი, რას გეტყვი, — ცოტა ჭმუნვის შემდეგ განაგრძო ყოჩია...

— თქვი, თქვი, ყურს დაგიგდებ!

— გული თუმცა მეთანაღრებოდა, — მოჰყვა ყოჩი: — როდესაც ფარას გაგვაშორეს ათამდის

ყოჩი, მაინც მხიარულად ჩავიარეთ ეს გვერდა. შევედით სოფელში და ვინც შეგვხვდა, ყველა ამას გაიძახოდა: საწყალი, დაიღუპა, დაიღუპა!.. მერე, რა ახალგაზღა იყოვო!.. „იქ მიგიდის?!“ ამ სიტყვების შემდეგ უეჭველად დაეკითხებოდნენ ჩვენს... იმას-კი არა, აგერ, იქ რომ უკრავს გულის საკლავად!.. ოთ, რა მწვავედ მოსთქვამს?!.. ხომ გეყურება? მაგრამ ეხლა მაგისი მოთქმა გულს მიმღვრევს... ეგ რაა?.. უარესი სიმწარე, უარესი ტანჯვა და ვაება უნდა ხვდეს, რომ მაშინ მიხვდეს სხვის ტანჯვასაც! მაგათ გონიათ, მარტო ეგენი იტანჯებიან და ჩვენ-კი ყურს აღარ გვათხოვებენ, ჩვენი კვნესა კვნესად არ მიაჩინიათ... ეგენი ცდილობენ, თავიანთ სასარგებლოდ სხვას ყოველგვარი უსამართლობა მიაყენონ, ამას კანონიერად სთვლიან, და თუ მაგათ სულ ცოტა უსამართლობა რამ მიაყენეს, სასოწარკვეთილებით გაიძახიან: ღმერთო, ჩამოიქცეს შენი სამართალიო!.. ღმერთსაც-კი გმობენ. რად მოსთქვამს მაგრე მწარედ, აგერ ის, მთის წვერზე რომ წამოსკუპებულა?! რა აწუხებს? რა და ის, რომ რად გვყარაულობს ჩვენ, დღე-ლამე რად გვივლის, წვიმა-ქარიშხალში გარედ ყოფნა რად უხდება... იმას-კი არა ხედავს, რომ ჩვენ, ჩვენ მოკლებუ-

ლნი თავისუფლებას, წელიწადში ორჯელ გვკრე-
ჭავს, გვწველის და ყველაფერი თავის სასარ-
გებლოდ მიაქვს. ჩვენ სამაგიეროდ? ჩვენ თავი-
სუფლების მოკლება და ზედ დამატებით...

„მაგრამ ზედ დამატებით რაც მოგვდის,
ამაზე მერე ვიტყვი. ეხლა-კი, ცოტა არ იყოს,
გავები იმისთვის, რომ გული მომივიდა, ტან-
ჯვის ფიალა ამევსო, და საუბარმა გადაუხვია...

„იმას ვამბობდი: ეგ-კი არ იყო, რომე-
ლიც კვნესის, მეორე, ჩიტუას რომ ეძახიან, ის
მოგვაჯვდა უკან და სოფლელებს უპასუხებდა
იმათ კითხვაზედ: ჰო, იქ მიშიდისო...

„კითხვა-პასუხი მეყურებოდა და იმას-კი
ვეღარ მივხვედროდი, თუ სად და რისთვის
მივუდიოდით. ცოტა არ იყოს, ამ კითხვამ
შემაფიქრიანა და დამავიწყდა, რომ უკან
ჩიტუა მოგვდევდა. თურმე შევმდგარიყავი, ფი-
ქრში გავრთულიყავი, და სხვა ყოჩებს ჩამოვრჩი.

„— აი, შე ვერანავ, შენა!..— შემომესმა ჩი-
ტუას ჭყივილი და იმავე დროს კომბალი ისე
ძლიერად მომხვდა, რომ თვალიდან სიმწვავით
ნაპერწკლები წამომცვივდა.

„ცუხცუხით მოვეწიე სხვებს და შიგ შუა-
ში შევერიე. მეტს რას ვიზამდი?! ჩქარა წამოგ-
ვსისინა და ერთი სახლის წინ ბაკში შეგვლალა.

საღამო ხანი იყო. ხალხი ბევრი ირეოდა. ყველას თავ-პირი ჩამოსტიროდა. სახლში? სახლში არ ვიცი, რა ხდებოდა, და იქიდან-კი გულ-საკლავი ხმა გამოისმოდა: ტირილი, გამწარებული კივილი, სასოწარკვეთილებითი ოხვრა და გმინვა, აი, რა მოისმოდა სახლიდან. ამის გამგონს მეც თვალი ამიცრემლდა და ბაკის კუთხეში მივიჭუჭე.

II

„მიწყნარდა ფეხის ხმა. ბინდი წყვდიადმა შესცვალა. იმოდენა ლრიანცელის შემდევ ისეთი სიჩუმე, როგორიც იქ ჩამოვარდა, ტანში ერუანტელს მგვრიდა.

„აქნობაძის განაპირის მწოლარეს, შიშის ზარი თავს დამეცა და მაშინვე უნებლივთ სხვების შუაში ჩავერიე. ისინი მომესალმნენ და ისევ ძილს მიეცნენ.

„შუალამე მოტანებული იყო. ოთხფეხის ყეფა-ყმუილიც-კი არ მოისმოდა...

„წინად, ვიდრემდის ხალხის ფეხის ხმა მისწყდებოდა, სახლის სარკმელს კაშკაში გაჰქონდა, ისეთი ძლიერი შუქი გამოდიოდა. ეხლა-კი ოდნავად იყო გაშუქებული. უეცრად სახლის

კარის ჭრიალი შემომესმა. იქით მივიხედვე და
მოხუცებული, ძაძებში გახვეული და ომა-გაშ-
ლილი მანდილოსანი სწორედ აჩრდილივით
სარკმლის შუქზე გაჩერდა. დიდხანს უძრავად
და ხმის ამოულებლივ იდგა და პირდაპირ საყ-
დარს გაშტერებული გასცემოდა.

„— ჩამოიქცეს შენი სამართალი, ღმერთო, რომ მე ცოცხალი დამტოვე და ჩემი ვაჟკაცი-კი, ჯერ სიცოცხლით გაუხარელი, ამ წუთი-სოფელს მოაშორე! — ბოლოს სასოწარკვეთილებით წამოიძახა და ქვითინით იქავე ჩაეხვია.

„მართალია, იმ შუაღამეს მეტეპუნდუმლდე
საშინლად შემეცოდა ის დედაბერი, ჰერციგაში, ამაშის სა-
ვე დროს უნებლიერ თავში კითხვა დაიყენდა:
პო, ყველა ეს კარგი: დედაბერს შვილი
მოუკვდა, ხალხი მოვიდა და სწუხს, მაგრამ ჩვენ
რაღად მოგვლალეს-მეთქი?! ვეკითხებოდი მა-
ლი-მალ ჩემ თავს და პასუხი-კი არსად იყო.
რად? ვერ გავიგე კია და რა წამსაც-კი გავიგე,
იმ სახლში რაც მომხდარიყო, შიშმა ამიტა-

ნა. თან-და-თან ისე გამიძლიერდა შიში, რომ
 ტანჩა თახთახი დამიწყო. თითქმის აღგილზე
 ვხტოდი, ჩემ თავს ვეღარ ვიმორჩილებდი. ჩემ
 დღეში არ შემცივნია ისე, ზამთარშიაც-კი, რო-
 გორც იმ ღამეს. კინალამ გადავირიე. არ ვიცო-
 დი, რა მექნა. რისთვის დამემართა ეს?!.. ოპ,
 რანაირი ტანჯვა გამოვიარე იმ ღამეს, ჩემო კარ-
 გო!.. დედაბერი დამშვიდდა, სახლში შევიდა.
 მე-კი ვთრთოდი, ბეჭვიც-კი მიხტოდა და, რაც
 დრო გადიოდა, თრთოლა, სხეულის წვა და
 ჩხვლეტა უფრო მემატებოდა...

III

„მტრედის ფრად გათენდა თუ არა, ხალ-
 ხის ფეხის ხმა ისევ ასტყდა. ჩქარა ეზოში, ხეე-
 ბის ქვეშ ცეცხლი რამდენსამე აღგილს გააჩა-
 დეს, გვერდით დიდრონი ქვები მოუწყეს და
 ზედ წყლით სავსე ქვაბები შემოსდგეს. მე ყო-
 ველივე ამას რომელით თვალ-ყურს ვადევნებ-
 დი და გონს ვერ მოვდიოდი...“

„ახმაურდა სოფელი; მოისმა ხალხის ლა-
 პარაკი, საქონლის ბლავილი, ძალლების ყეფა,
 და სადაც ჩვენ ყიყავით, იმ ეზოდან ფრთოსანთ
 რუკ-რუკ-კურ-კური. იქ მამალს გარს ქაომები

შემოეხვია და ერთის ამბით და კიუინით ნაგავს გამალებული ქექავდა, აქ ინდოურს თავი მაღლა აეღო და „ყიავ-ყიავს“ უდარდელად გაიძახდა, იქით კიდევ დედალი სეირნობით „კააა-კა-კას“ ინდოურივით უდარდელად მოსთქვამდა და დრო-გამოშვებით შეაყენებდა თავის გალობას და გაშტერებით ძირს დედამიწას დააცემდებოდა, ფეხს გაუსვ-გამოუსვამდა და ისევ თავის გალობას აგრძობდა...

„თანდათან ცაც ფერადდებოდა და...

— მოიცა, — უეცრად გააწყვეტინა ყოჩის სიტყვა დედალმა ცხვარმა: — მთელ ლამეს ტანის თახთახი არ შეგწყვეტია?

— არა, მაშ!.. მთელ ლამეს კბილს კბილზე მაცემინებდა და მხოლოდ, ხალხის ფეხის ხმა, ნამეტნავად ინდოურისა და დედლის მოთქმა რომ ასტყდა, ცოტა არ იყოს, გავერთე და, არ მახსოვს, მაშინაც მითახთახებდა ტანი თუ არა.

— მაშ მთელ ლამეს არა გძინებოდა?

— ერთ წუთს რომ თვალი მომეხუჭნა, რაღა მინდოდა!..

— საწყალი, რანაირად დაიტანჯებოდი!..

— დავიტანჯებოდი?! დავიტანჯე კი არა, მეტიც მომივიდა. მთლად დავდნი, დავდნი-

მეთქი; გონება სულ ამიხდა... აკი გეუბნები, ცოტათი ხმაურობამ გამართო განთიადისას. მაგრამ, როდესაც სახლის კარი გაჭრიალდა და ისევ მანდილოსანი გამოჩნდა, რომლის ხილვის შემდეგ შუალამისას ტანის თახთახი ამივარდა, და მთლად ჩაფუფქული ოდნავის ნაბიჯით წინ წამოდგა და იქავე ხეების ქვეშ მოფუსტუსეთ მიაძახა: გეთაყვათ, მეზობლებო, ყველაფერი წესიერად დაიჭირეთო, უარესად ცეცხლი მომეკიდა. სად ვიყავ და სად არა, აღარა მეყურებოდა-რა. ჯერ არა მენახა-რა იმისთანა, რასაც უნდა შევეშინებინე, მაგრამ მე შიშმა უკვე მომითავა. რაც მაშინებდა, ჩქარა ისიც ვიხილე. თურმე ჩემ სხეულს წინადვე უგრძენია, რაც მომელოდა, მაგრამ შემთხვევით გადავრჩი და, აი, ეხლა შენ გვერდით ვარ. იმავე ბაქში, რომელშიაც ჩვენ ვიყავით გამომწყვდეული, ერთი ისეთი უშობელი ება, რომ თვალს ვერ მოაშორებდი. მშვენიერი ტანი, მთლად ჩარგვალებული სხეული, მშვენივრად დაწმენდილი ბეწვი, მშვენიერი რქები, მსხვილი, მორღვეული, გონივრული თვალები, აი, რა ამკობდა უშობელს და რა იტაცებდა მაყურებლის თვალს!

„სულ არ გაუვლია რამდენსამე წუთს, რომ ბაკის კარი შემოაღეს და უშობელი წამოაყენეს.

მძიმედ, სულ მძიმედ გონივრული თვალები გა-
დატრიალ-გადმოატრიალა და წელში გაიზნიქა.
გაზმორება არც-კი დააცადეს, დაუნდობლად სა-
შინლად სახრე გადუჭირეს ბეჭებში და, საცო-
დავი, საჩქაროდ ბაკიდან გაიყვანეს. „გაგიხმეთ
ხელები!“ უნებლივ დავწყევლე სახრის გამრ-
ტყმელი. მგელიც-კი შედგებოდა იმის სილამა-
ზის წინ და იგი ხომ ადამიანი იყო, რომ ისე
გამომეტებით გაარტყა სახრე. მაგრამ შემდეგ
ნახულმა სახრის დარტყმა დამავიწყა. წამოაქ-
ციეს საცოდავი და, ოხ, ნეტავი არ გამეგონა
იმისი სასოწარკვეთით წაზმუვლება, ყელში ხან-
ჯალი გაუყარეს!.. სისხლმა ჩქეფა დაიწყო,
იქაურობა შეღება. მოისმა ხრიალი. ვხედავდი,
როგორ თრთოდა მისი სხეული. ამის მნახველს
ტანი მომელეშა, უგრძნობლად გარდმექმნა. მა-
შინ-კი მივხვდი, რისთვისაც მიგვლალეს, რისაც
მეშინოდა...

„სახლში ისევ ტირილი, ღრიალი ასტყდა.
სტიროდნენ ვაჟკაცს, რომელსაც სიცოცხლე
მოესპო, რომელიც უდრო-უდროოდ ამ წუთი-
სოფელს გამოესალმა და გარედ კიდევ თითონ-
ვე უდრო-უდროოდ სიცოცხლე წარბ-მოუხრე-
ლად მოუსპეს უმშვენიერესს ქმნილებას... ოჰ,
რანაირად გულს მისერავდა სახლიდან ტირი-

ლის ხმა!.. ვიძახდი: „რატომ სახლი არ ჩამოინგრევა და ყველას არ ამოგელეტავთ, რომ ერთის სიცოცხლის მოსპობას სტირით და მეორეს-კი თქვენ განგებ უსპობთ?! რას ემსგავსება თქვენი ტირილი?!“

„დედაბერი საშინლად შემებრალა, ღამე რომ აჩრდილივით გამოვიდა და ღმერთს სამართალი უგმო. ეხლა-კი შემეზიზლა, და სწორედ საგმობელია ადამიანთა სამართალი და არა ღვთისა...“

„აკაფეს უშობელი... მგლებივით დახვეოდნენ და ზოგი ბარკალს მიარბევინებდა და ზოგი კიდევ სხვა ნაჭრებს.“

„— ბიჭებო,— დაიძახა ერთმა მათგანმა: — ეცვლებიც გამოლალეთ და დაკალით!..“

„წამოგვესივნენ ჩვენც. წაგვავლეს ზოგს ქეჩოში, ზოგს კიდევ ფეხში და თრევით გაგვიტანეს.“

„— ეგ ორი ყოჩი გაუშვით, ნუ გამოსჭრით ყელს. ხალხი ცოტაა და ხორცი ტყუილად გაფუჭდება... — ამას-ლა მოვკარი ყური და გამოვერკვიე. მანამდის ვერც არას ვგრძნობდი და ვერც არას ვხედავდი. მხოლოდ მაშინ დავინახე, რომ მე და ყომრალა ყელ-გამოლადრულ ჩვენ მოძმებს დავცეკეროდით...“

— ვაი შენ დედასა, ჩემო ბატკუნიავ, იქ
ნება შენც ეგრე ყელი გამოგლადრეს!.. — მწა-
რედ წამოიკვნესა დედა ცხვარმა და ცრემლები
წამოსცვივდა.

— მაშ არა და...

— აი, თქვე ვერნებო, თქვენა!..

უეცრად მოესმათ ჩიტუას ხმა და ნერწ-
ყვი გაუშრათ:

— თქვე სამგლეებო, ფარას რას ჩამორ-
ჩენილხართ!.. — დასჭივივლა ჩიტუამ და კომბალი
მოუქნია, მაგრამ ცხვრებმა დროით უშველეს
თავს.

ისინი დაეშვნენ ქვევით და ჩიტუასაგან
მოქნეული კომბალი ჯაგში შეიჭედა.



„შალღი ყოფილხარ!“

(ეტიუდი)

I

სასიამოვნო სჯა-ბაასისა და ნარდის თამა-
 შის შემდეგ ვახშმად მიგვიწვიეს მე და არჩილი.
 შევედით სასადილო ოთახში, და კოპტია დია-
 სახლისს კოპტიადვე გაეწყო მაგიდა. სიმდიდრით
 ვერ გაგაკვირვებდათ, მაგრამ სიფაქიზით-კი.
 ყოველისფერს დიასახლისის მშვენიერი ხელი
 ეტყობოდა...

— ცოტაზე-კი ნურას უკაცრავად! — ლი-
 მილით წამოიძახა დიასახლისმა და გვიჩვენა,
 ვინ სად უნდა დამსხდარვიყავით.

— რას მიბრძანებთ, ბატონო, ჩვენთან...

— ელო, ამხანაგები არიან ჩემი. ამათთან
 ბოდიშს არ მოვიხდი. არჩილი ხომ წინათაც
 ყოფილა ჩვენსა. ეს ხამი არ არის, და ელიზბა-
 რიც, იმედია, დღეის შემდეგ ხშირად გვეწვევა...

— მეც ელიზბარის წინაშე ვიხდი ბოდიშს.
 ძლივას გავაბედვინეთ მოსვლა, და ეხლაც ესე
 მცირე ვახშამზე. მგონი, დღეის შემდეგ სულ
 ამოიკვეთოს ფეხი!

— გინდათ, ქალბატონო, ვახშამი შევი-
ქოთ, მაგრამ არა. ეგ ისეთი მოუხეშავია, რომ
ქათინაურს ვერ მოახერხებს!.. ქირთლელია
ეგ!..

— თუ მე მკიცხავ, ჩემო არჩილ, ე მას-
პინძლებმა რაღა დაგიშავეს?! ესენიც ხომ ქართ-
ლელები არიან! — ვუპასუხე არჩილს ლიმილით.

— კარგია, ეგ მაინც მოახერხე. ესენი
კორტოხის ახლო არიან და სხივი ზრდილო-
ბისა...

— თუ ეშმაკობისა?!

— სხივი ზრდილობისა-მეთქი, — მედიდუ-
რის კილოთი განაგრძო არჩილმა, — კორტოხის
ახლო მცხოვრებთაც ეფინებათ... მგონი, — მიუ-
ბრუნდა დიასახლისს, — თქვენი მამა-პაპა კორ-
ტოხის იქიდან არიან გადმოსულნი?

— მამა-პაპისგან ეგ მე არ გამიგონია, —
ლიმილით უპასუხა დიასახლისმა.

— როგორ არა, თქვენი გვარი იმერეთი-
საა! — დაჟინებით დაიწყო დავა არჩილმა.

— კარგი, მაგრე იყოს! — უპასუხა დიასახ-
ლისმა...

მე აღარა მითქვამს-რა. მხოლოდ უჩინრად
დიასახლისს ვადევნებდი თვალ-ყურს და შევ-
ნატროდი გივის, რომ ასეთი მეუღლე შეეძინა.

ყოველ მისს მიხვრა-მოხვრას, მოძრაობას, სიტუაციას ემჩნეოდა გრძნობა, გრძნობა და გრძნობა. ძალა-უნებურად ვფიქრობდი, ძალიან სასოწარკვეთილიც რომ იყვეს გივი, უნდა გამოირკვას და ცხოვრებას სიამოვნებით მიეგებოს, როდესაც ამას დაინახავს.

დიასახლისი ჩემ გვერდით იჯდა, არჩილი იმის პირდაპირ, გივი-კი არჩილის გვერდით ჩემს პირდაპირ. მაგიდის თავსა და ბოლოს ორი ხნიერი მანდილოსანი იჯდა. არ ვიცი, რა დამოკიდებულება უნდა ჰქონოდათ გივის ოჯახთან, მაგრამ მახლობლები-კი უნდა ყოფილიყვნენ...

უბრალო ბაასით, დიასახლისის კეკლუცობით, გივის ღია გულით და მანდილოსნების სიმუნჯით ყველას სადღეგრძელო გამოვათავეთ...

თამადად გივი იყო და ღვინოს, როგორც კიდევ მასპინძელი, გვაძალებდა. ცოტა არ იყოს, გივის ღვინო გაუჯდა, აალაპარაკა. არჩილი ხომ ჩეეულებრივად ორი-სამი ჭიქის შემდეგ აცულლუტდა, თვალებმა ეშმაკურად კრკალვა დაუწყო...

— მრავალ-უამიერ, მრავალ-უამიერ!.. ეს, მეგობრებო, გაუმარჯოთ ჩვენს მოღვაწეებს!..

მრავალ-უამიერ, მრავალ-უამიერ... — წარმოსთქვა სადღეგრძელო ჩვენი მოლვაწეებისა და მრავალ-უამიერითვე განაგრძო.

არჩილმა და გივიმ მეგობრულად ხელი გადაჰვიეს ერთმანეთს და, როგორც ნალვინეებს შეჰვეროდათ, ხმა შეათანხმეს. მეც, რაკი დიასახლისთან საბაასო მასალა შემომელია, ხელი სავარძლის უკან გავაცურე, მის ზურგს მივესვენე და დაბალი, თითქმის შეუმჩნევი ბანი დავიწყე. ამავე დროს დიასახლისს თვალს არ ვაშორებდი. იგი ნიდაყვებზე დაყრდნობილი დაბლა დაიცეირებოდა და დრო-გამოშვებით სახე ვნებით უთროთოდა, მთელი ტანი უხტოდა. დაბალ ბანს ვამბობდი, და დიასახლისის ამგვარ დრო-გამოშვებით ცვლილებათ განცვიფრებაში მოვყავდი.

გივი და არჩილი-კი არ ისვენებდნენ. არჩილი ხმას ძალას ატანდა, ჯმუჯნიდა გივის და თითქმის ნახევრობამდის მაგიდის ქვეშ ჩაძრა.

დიასახლისმა სავარძელი მაგიდასთან უფრო ახლოს მიითრია და შევამჩნიე, დიასახლისიც ძირს-ძირს მიდიოდა. ალარა სცხრებიან გივი და არჩილი, სხვა-და-სხვა სიმღერებს ამბობენ, — „შაშვი-კაკაბი“, „ჩავუხდეთ“ და „ჩავუხდეთ“,

„ალაზნის პირას“ და მრავალი სხვა სიმღერა ერთი-მეორეს მოჰყვა...

სავარძელი უფრო განზე გავწიე, ამავე დროს ხელსახლცი იატაკზე დავაგდე.

არც არჩილს და არც დიასახლისს ჩემი მოძრაობა არ შეუმჩნევიათ. ჩემში აღძრულმა ცნობის მოყვარეობამ მოსვენება აღარ მომცა. მინდოდა შემეტყო, მაგიდის ქვეშ რა დრამა ხდებოდა, ისე-კი, რომ ჩემი ცნობის მოყვარეობა არ გამომჟღავნებულიყო.

ამისთვის დავაგდე ძირს ხელსახლცი და ცერად გადავიხარე ხელსახლცისაკენ და თან მაგიდის ქვეშ შევიხედე...

მთლად ავენთე. გველ-ნაკბენივით უეცრად წელში გავიმართე და რომ სახის ცვლილება არავის შეემჩნია, ორივე ხელი პირზე მივითარე და ნიდაყვზე დავეყრდე. ტანი შემისველდა, სუნთქვა, ცოტა არ იყოს, გამიძნელდა.

აღარ მეყურებოდა არჩილისა და გივის სიმღერა. თვალწინ მხოლოდ ორი წყვილი, ერთ-მანეთში ჩახლართული, არჩილისა და დიასახლისის ფეხი მითამაშებდა...

ამ სურათმა ჩემზე რად იმოქმედა ასე?! არ ვიცი. ეხლაც ვერ გამომირკვევია, ის მეწყინა, რომ არჩილს მეგობრულად გივისთვის ხე-

ლი გადაეხვია და ამავე დროს-კი მის მეუღლეს ფეხებით ეარშიყებოდა, თუ...

მაგრამ ამის გამორკვევა შორს წაგვიყვანს.

ერთ წამს დავაპირე წამოვმდგარიყავ და მიმეფურთხა არჩილისთვის. მაგრამ თავი შევიმაგრე...

— ჰუუ!.. — ჩემდა უნებურად მაგრა ამოვისუნთქე, ჭიქა წყლით ავავსე და ხარბად მოვეწაფე.

— ლვინო მიირთვით, წყალს რად მიირთმევთ! — პირველად გავიგონე მაგიდის ბოლოს მჯდომ მანდილოსნის ხმა.

არ ვიცი, რამ აიძულა მანდილოსანი, დაერლვია თავისი გულმოდგინე სიჩუმე. იქნება ჩემი აღელვების უნებური მოწამე იყო...

— რა ვქნა, ბატონო, თამადა ლვინოს ალარ გვასმევს და უიმისოდ-კი წყლის მეტს ვერას გიახლებით. — ხმა მაღლა ვუპასუხე, რომ გივის გაეგო და სიმღერა შეეწყვიტა.

— უკაცრავად, ელიზბარ, უკაცრავად! მართლაც, სიმღერას ალარ ვათავებთ და ლვინოს ვეღარა ვსვამთ. — გივი წამოდგა, ჭიქა ლვინით გაივსო და განაგრძო: — ყმაწვილებო, დავლიოთ ჩვენი ქალების სადლეგრძელო. ვუსურვოთ მათ, მოივონონ ჩვენი წარსული დედები და იმათსავით

პატიოსნურად ემსახურონ სამშობლოს და თავი-
ანთ ოჯახს!.. კაცო, რატომ არ დაცოლშვილ-
დებით?!—უეცრად მოგვიბრუნდა მე და არჩილს:
—ვერ წარმოიდგენთ, ყმაწვილებო, რა ბედნიერე-
ბაა დაცოლშვილიანება!..ღმერთს გეფიცებით,—
გულწრფელად დაითიცა, როდესაც იმის უკანას-
კნელ სიტყვებზე თავი დაბლა დავხარე, — გამოც-
დილებით გეუბნებით!..

— ქალები... ოოო... მაინც ვსვამ მათ
სადღეგრძელოს! კარგები არიან!..—თვალთა
ბზინვით დიასახლისს გადახედა და სწრაფლ ჭიქა
გამოსცალა არჩილმა...

II

ბარბაცით გავიარეთ რამდენიმე ქუჩა. ქუ-
ჩები მიყრუებული იყო, მოძრაობა სრულებით
შეწყვეტილიყო. აქა-იქ ჩვენსავით შეზარხოშე-
ბულნი ბარბაცით თუ გვხვდებოდნენ, თორემ
სხვა-კი არავინა.

მე და არჩილი გაჩუმებულები მივდიოდით.
არ ვიცი, ის რაზე ფიქრობდა და მე-კი გონე-
ბიდან რომანი მავიდის ქვეშისა არ მშორდებო-
და. რაც ორ წყვილ ჩახლაკნილ ფეხს თვალი
მოვკარი, მინდოდა არჩილისათვის როგორმე

მეგრძნობინებინა და გამეკიცხა ჯერ ვახშმის დრო-სვე, მაგრამ იქ ვერ მოვახერხე. ამისთვის ლვინოს ძალა დავატანე და კარგადაც შევზარხოშდი.

აი, ახლა რამდენი ხანია მარტონი მოვ-დივართ, ყოველ ნაბიჯზე ვემზადები და ამ მზა-დებას ბოლო აღარ ეღირსა.

აგერ, გამოვიარეთ რამდენიმე მიხვეულ-მოხვეული ქუჩა და უმთავრესს ქუჩაზე გამოვე-დით, რომლიდანაც სხვა-და-სხვა ქუჩით უნდა წავსულიყავით....

— აბა, ლამე-მშვიდობისა, ელიზბარ, — მი-თხრა და ხელი გამომიწოდა.

— არჩილ!.. — წამოვილულლულე და ხელი მაგრა დავუჭირე.

— რა იყო, რატომ მაგრე ტრაგიკულად მომაპყარ თვალნი შენნი?!?

არჩილის ამგვარმა კილომ გაბედულება მო-მიმატა და მკვახედ ვუთხარი:

— უნდა გრცხვენოდეს, რომ იმ კაცს მე-გობარს ეძახი, მეგობრულად ხელს ხვევ და ამავე დროს-კი იმის ცოლს ფეხებს ფეხებში უხლართავ და ვნებით თრთი!..

— ხა, ხა, ხა, ხა!.. — გულიანად ისე მაგ-რა გადიხარხარა, რომ ქუჩებმა ბანი მისცეს... — დაინახე?! — ხარხარითვე მკითხა არჩილმა.

— კიდევაც ხარხარებ?! — განცვიფრებით დავეკითხე.

— ეჭ, ჩემო ელიზბარ, ბალლი ყოფილ-ხარ!.. — სიცილით მიპასუხა და საჩქაროდ თავის გზას გაუდგა.

„ბალლი ყოფილხარ!“ — მწარის ღიმილით გავიმეორე არჩილის სიტყვები და თავის ქნე-ვით სახლისკენ დასაძინებლად წავედი.



„ლირსი ვარ ამისა, ლირსი!..“

(ეტიუდი)

საშინლად მინდოდა ზღვაზე მზის ამოსვ-
ლა მენახა და, მომეცა თუ არა ზღვით მოგზა-
ურობის შემთხვევა, სიხარულით წამოვიძახე:
ეხლა-კი ვნახავ!..

მთელ ლამეს კურდლელსავით მეძინა. წამ-
და-უწუმ საათს დავყურებდი და ისევე ბალიშ-
ზე მივდებდი თავს...

„დროა!“ გავიფიქრე, მეოთხე საათი რომ
დაიწყო და წყნარად წამოვდექი, რომ მეზობე-
ლი არ შემეწუხებინა, რომელიც გულიანად
ხვრინავდა, და ფეხაკრეფით გემის ბანისკენ
გავეშურე.

ჯერ ისევ ბინდ-ბუნდი იყო. ნაწყვეტ-ნაწ-
ყვეტი ლრუბლები აქა-იქ უძრავად მიჰკროდნენ
ცას და გაცრიაგებული ვარსკვლავები-კი ოდნავ-
ლა ბჟუტავდნენ.

ცოტა არ იყოს, კიდევაც ციოდა და ამის
გამო პალტო შემოვიჭუჭკე, ხელები სახელოებ-
ში დავმალე და პირდაპირ გემის ცხვირისკენ-

გავწიე, რადგანაც პირი აღმოსავლეთისაკენ ჰქონდა.

„ოპო, ჩემს მეტს, სხვასაც სდომნია მზის ამოსვლის ნახვა,“ უსიტყვოდ წამოვიძახე, როდესაც თვალი მოვკარ გემის ცხვირთან ყმაშვილს.

გაიგო თუ არა ჩემი მისვლა, არ ვიცი. გაშტერებით სივრცეს გასცეროდა. ჩემს მისვლაზე არც-კი განძრეულა. კიდევაც გამიკვირდა, რომ ამ სიცივეში პალტო-გადაღელილი იყო და შუბლიც ცივი რკინის ბოძისთვის მიებჯინა. იმის ახლო დახვეულ თოკზედ ჩამოვჯექი. ერთი კიდევ შევხედე უცნობს და მეც ფიქრებმა გამიტაცეს.

„რა არსებაა აღამიანი, — ვეკითხებოდი ჩემ თავს: — რომ ამისთანა უფსკრულს ებრძვის, უშიშრად ენდობა თავისგან მოგონილ მანქანას, რომელიც ასე გულადად, უდარდელად მიარღვევს ზღვის ტალღებს და უდარდელადვე ქვითქვით-ვიშვიშებს?!..“

მაკვირვებდა აღამიანის გონება, გამჭრიანობა, მაგრამ...

„ოხ, რა შესაბრალისია იგივე მედიდური გონება აღამიანისა ბუნების სიღიადესთან შედარებით!.. რა სიმკირეს, არარაობას და მასხა-

რაობას წარმოადგენს ეს მედიდურება, ამაყობა ადამიანისა!.. ხომ საკმარისია სულ ერთი წამი, რომ მიფუნიტოს, მილეჭოს ეს ამაყად მიმცურავი და ზღვის ტალღების მიმარტვეველი გემი და...

„განქრა ადამიანის ოცნება, ამაყობა და მედიდურება!..

„რაღაც მღილი, რაღაც საცოდავი მატლი, რომელსაც ადამიანი ეწოდება... ეწოდება... ეწოდება... ე...“

უცნაური ამბავი დამემართა: აზრთა მიმღინარეობა შემიწყდა, მხოლოდ სიტყვა „ეწოდება“-ლა დაცურავდა ჩემს გონებაში და ისიც კვალს ვერა სტოვებდა. გული, აქნობამდის ბოლმით ავსილი, უნებურად შეზიავდა სიამოვნებით და, ბოლოს, სულ სარკესავით. გადამეწმინდა, ტუჩები-კი ლიმად, ვარდივით, გადამეშალნენ...

განქრნენ, მიიფანტნენ მწარე ფიქრები და...

ახ, მეც განვიბნიე, დავკნინდი, ჩემი არსება დანაწილდა, გაეთეროვანდა და შეუერთდა იმ ბურთს, რომელსაც ცა და ზღვა, კიდევბით ერთმანეთს მიწებებულნი, წარმოადგენდნენ... გავფართოვდი. ჩემი პიროვნება აღარ არსებობდა. მე ბუნებამ ჩამნთქა და მე კიდევ —

ბუნება, რომელსაც სიმხიარულე შეპარვოდა
და სულ უნებურად ჩემი არსებაც აეყოლია.

ცა და ზღვა ერთმანეთს ეცილებოდნენ.
ჭევით და ქვევით ნაწყვეტ-ნაწყვეტად მოფან-
ტულ ღრუბლებს და მათს გარსს ცელქად ეც-
ვლებოდათ ფერი და ეს ფერი, თითქო საპნის
ბურთიაო, ისე გამოკრთოდა. აგერ, პირველი
ნაპერწყალიც ამოვარდა ზღვიდან! პირველს
მეორე მოჰყვა, მეორეს—მესამე და სულ შეუმ-
ჩნევლად ის ადგილი, საიდანაც ნაპერწყალი
ამოვარდა, ცეცხლად აინთო. ბურთს ფერი უფ-
რო გაუსპეტაკდა, გაუნაზდა. ცეცხლი-კი უფრო
და უფრო დიდ ადგილს იჭერდა, ცეცხლის გარ-
სი თავისი ფერსა ჰქარგავდა, ცისფერს უერთ-
დებოდა. და ამ დროს მზემაც ზღვიდან თავი ამოჰ-
ყო, ამოიჭუუმპალავა, წინწკლები ისევ ზღვას
უბრუნდებოდნენ და...

ფერადიანი ბურთიც გასკდა. ცამა და
ზღვამ თავისი ფერი მიიღო და მეც...

— ააახ! — შემომესმა შესაზარი ხმა ამ დროს
და ტანი შემითამაშდა.

მივიხედე იქით, საიდანაც ხმა შემომესმა, და...

— თვალებს აკვესებდა, თითებს იკვნეტდა და
ფეხს აბრაგუნებდა ის ახალგაზდა ყმაწვილი,
რომელიც მზის ამოსვლამდის ვნახე.

შემეშინდა. ისე შესაზარი სახე ჰქონდა, რომ ტანში ურუანტელმა გამირბინა.

— მაფურთხონ, მაფურთხონ, მაა-ფურთხონ!.. — წამოიხრანტალა საცოდავად და ქვითინი მორთო...

— ყმაწვილო, ყმაწვილო! — ტანის თრთოლვით ვანძრევდი, რომ გამომერკვია. მაგრამ ის მაინც ქვითინებდა და უაზროდ გაიძახდა:

— მაფურთხონ, მაფურთხონ, ღირსი ვარ!..

— გამოერკვიეთ, გეყურებათ?! — დავუყვირე და ხელები ძირს მაგრა ჩამოკვრით ჩამოვგლიჯე.

— ჰაა!.. ვინა ხართ, რა გინდათ?! — დაბნევით მიპასუხა და მოელვარე თვალები წელში გამართულმა მომაპყრო.

მე ვერ გავუძელ იმის თვალების მზერას და შევკრთი. ცოტა არ იყოს, დავიბენ.

— რა უნდა მინდოდეს? — ცოტა ხნის შემდეგ ვუპასუხე, როდესაც გონება მოვიკრიბე: — თქვენი სასოწარკვეთილებითი ხმა შემომესმა და მე ჩემი თავი მოვალედ ვცან, თუ-კი რითიმე შემეძლება, სამსახური გავიწიოთ.

— თქვენ?!.. ხა, ხა, ხა!.. თქვენ გინდათ სამსახური გამიწიოთ?!.. ხა, ხა, ხა!.. თქვენც გინდათ მაფურთხოთ?!.. გამშორდით!..

— ყმაწვილო, ვინც თქვენი ამ უკანასკნელი წამების მოწამე იყო, არა მგონია, იმას მოფურთხება შეეძლოს...

— რის მოწამე?!.

— თქვენის სულის-კვეთებისა, ზნეობრივად ტანჯვისა...

— მე ვიტანჯები?!

— მგონი...

— მართალს ამბობ, უცნობო, მართალს ამბობ.— ცოტა ხნის სიჩუმის შემდეგ მიპასუხა:— მართალს ამბობ, მე ვიტანჯები და მინდოდა კიდევაც გავქცევოდი ამ ტანჯვას. სულ რამდენისამე წამის წინ მინდოდა გამოვსალმებოდი ტანჯვას, სამუდამოდ მომეშორებინა თავიდან, მაგრამ... ყმაწვილო, ხომ სიმხდალეა თავის მოკვლა?! არა?..

— თავის მოკვლას სხვა-და-სხვა მიზეზი იწვევს. ზოგი მიზეზი შესაწყნარებელია და ზოგი...

— ეეე!.. რა მიზეზიც უნდა იყოს?! აბა გაარჩიეთ: მე განვიზრახე თავის მოკვლა იმის-თვის, რომ საზოგადოებამ მიცნო, რა კაციც ვიყავი, და ამისთვის შევზიზლდი, ფურთხება დამიწყო...

— თქვენ მაგითი მაინც ვერა გამაგებინეთ-რა.

— აახ!.. რად არის აღამიანი ისეთი, რომ უთუოდ ყველაფერი უნდა გაიგოს?

— თუ ყველაფერი არ შეიტყო, თავის მსჯავრს ვერ იქონიებს.— ვუპასუხე მე და იმის მთრთოლარე სახეს დავაცქერდი.

— მსჯავრი, მსჯავრი... ხა, ხა, ხა!...— გადიხარხარა ხელის ჩაქნევით და საჩქაროდ გამშორდა.

თვალი გავაყოლე. მთვრალივით მირაცრა-
ცებდა და თან ხელებს იქნევდა. ცოტა ხნო-
ბით გემის ბანის მოაჯირს მიეყრდნო და ზღვას
დაშტერდა.

შემეშინდა. მართლა თავი არ დაიხრ-
ჩოს-მეთქი, გავიფიქრე და განვიზრახე მიპარ-
ვა, რომ შემძლებოდა დაჭერა, თუ ვინიცობაა,
ზღვაში ჩავარდნას მოისურვებდა. მაგრამ ყმაწ-
ვილი მოტრიალდა და ისევ აჩქარებული ნაბი-
ჯით ჩემკენ წამოვიდა.

— ყმაწვილო!— მომმართა მწუხარე სახით,
როდესაც მოვიდა ჩემთან და მკლავში ხელი
წამავლო:— ნუ მკითხავთ, ვინა ვარ. ეს ხომ
სულ ერთია თქვენთვის!..

— მართალს ამბობთ და არცა მსურს გა-
ვიგო თქვენი ვინაობა.

— მაშ ყური დამიგდეთ. რა მხეციც გინ-

და აიღოთ, რა ცხოველიც უნდა იყოს, რა სულ-
დგმულიც უნდა დასახელოთ, ყველა თავის
თავს ემსგავსება ყოველთვის. მგელი კრავობას
ვერ გასწევს, დათვი ძალლობას და ღორი კი-
დევ მტრედობას. ადამიანი-კი წარმომადგენე-
ლია ყოველგვარის ცხოველისა. მასში ყოველ-
გვარი მხეცია მოთავსებული და შეუძლიან ყო-
ველგვარი მხეცობა, სისაძაგლე ჩაიდინოს. რა
მხეცს დამისახელებთ, რომ ადამიანი, თუ-კი გა-
რემოება ნებას აძლევს, არ დაემსგავსოს?! არა?!
ჰა!..—აღზნებული თვალები თვალებში გამი-
ყარა და მკლავზე ისე მომიჭირა ხელი, რომ
მინდოდა ხელი გამეშვებინებინა, მაგრამ თავი
შევიმაგრე და პასუხად თავი დავუქნიე.—ჰო-
და მაშ რა არის ადამიანი?.. მხეცთა მხე-
ცი... მაგრამ ამ მხეცთა მხეცობას, თავის სი-
საძაგლეს მალავს, კმუჭნის და უფრთხილ-
დება ამის გამომუღავნებას, როგორც თვალის
სინათლეს, თვალის ჩინს... თვალის ჩინს კი
არა... რა გითხრათ?.. რას დავადარო?.. თით-
ქო წმიდათა-წმიდას შეადგენდესო, ისე უფთხილ-
დება ამ საიდუმლოთა საიდუმლოებას... ბევრ
სისაძაგლეს, ბევრ საზიზღრობას ჩაიდენს, მოი-
მოქმედებს კაცი, რომლის მოწამეც მხოლოდ
თითონ არის და სხვა არავინ... შეიძლება, თა-

ვის ცხოვრებაში. არავითარი სისაძაგლე ჩა-
ედინოს, მაგრამ განზრახვით-კი, მერწმუნე,
ბევრი სისაძაგლე განუზრახავს, და ეს ხომ სულ
ერთია! აბა ერთ წამს ჩახედეთ თქვენს გულს
და... მგონი, შეგეშინდეთ კიდევაც!..

— ყმაწვილო, შეურაცხყოფის ნება არა
გაქვთ! — წყრომით მივმართე და ხელი გავაშვე-
ბინე.

— აახ!.. განა თქვენზე ვამბობ?.. მე
სრულებით თქვენ არა მყავდით სახეში... მაგ-
რამ თქვენი წყრომა-კი იმას მიმტკიცებს, რომ
ადამიანი საშინლად უფრთხის იმის გამომჟღავ-
ნებას, რის მოწამეც მხოლოდ თითონ არის...

მინდოდა კიდევ მეპასუხნა, მაგრამ თავი შე-
ვიმაგრე, რომ არ გამეჯავრებინა და თავისი
ლაპარაკი არ შეეწყვიტნა.

— ნუ-კი იფიქრებთ, — განაგრძო, — ვითომ
კარგი რისამე მოწამე იყოს?!.. არა. კარგს ისე
არას მოიმოქმედებს, რომ სხვა მოწმად არ და-
ისწროს, ან კიდევ არას განიზრახავს, რომ ქვე-
ყანა არ შეპყაროს. არა. მხოლოდ სისაძაგლეს
უფრთხილდება, მხოლოდ თავის მხეცობის გა-
მომჟღავნებას უფრთხის და არა სხვა რასმე...
აბა ახლა თქვენ აიღეთ და რომელიმე ადამიანი
გადმოაბრუნეთ, ფქვილის ტომარასავით გამო-


ბერტყეთ, ყოველი მისი საიდუმლოთა საიდუმლო გამოამჟღავნეთ და მაშინ, მერწმუნეთ, არა-სასიამოვნო სურათს დაინახავთ... არა-სასიამოვნოს, არა, საზიზღარს, შესაზარს!..

„მე საზოგადოება პატიოსან კაცად მი-
ცნობდა. მეც ვაფასებდი ამას და ვცდილობდი,
რომ ეს სახელი შემრჩენოდა. თუ-კი რაიმე
მხეცობა ჩემში არსებობდა, ვმალავდი; მეშინო-
და, რომ არ გამომჟღავნებულიყო და პატიო-
სანი ადამიანის სახელი არ შემებლალა, მაგრამ
ფეხი გადამიბრუნდა; სულ უბრალო შემთხვე-
ვამ გადმომაბრუნა, და ყოველივე ჩემი დაფა-
რული გამომჟღავნდა. რაც-კი მხოლოდ მე უნ-
და მცოდნოდა, ყველამ შეიტყო ცქერა; თითით სა-
ჩვენებელი გავხდი... ხა, ხა, ხა!.. აღარც ერთი
ხელს არ მაწვდიდა და იმანაც-კი, გეყურებათ,
იმანაც-კი, რომელსაც თაყვანს ვსცემდი, ვა-
ღმეროებდი, რომელიც მარწმუნებდა, მიყვარ-
ხარო, აღარ მიმიღო! ხა, ხა, ხა, გეყურე-
ბათ, აღარ მიმიღო!.. სულ უმნიშვნელო ჩემი
მოქმედება და განზრახვაც-კი გადიდდა, მთად
გარდიქმნა, და საზოგადოებამ ყიუინა დამცა...
იყიუინე!.. მაფურთხე!.. ჩამქოლე!.. მაგრამ ერთ
წამს შენი ზიზღი შეაჩერე და ოდნავ თვალი

გადაავლე შენს ჯურლმულს! შენც, უმანკოების ღვთაებავ, აგრე მოიქეცი და მხოლოდ მაშინ, თუ უცოდველი ხარ, ჩამქოლე... ხა, ხა, ხა!.. განა მაგას გაპბედავ?!.. არა მეონია!..

„მაგრამ რაებსა ვძოდავ?!.. არ გეგონოთ, ყმაწვილო, ვითომც მე ამითი თავის გამართლება მინდოდეს. არა. საზოგადოება მართალია. ლირსეულად მაფურთხებს, მიყიუინებს და ზიზლით მექცევა. სხვას რომ ჩემი საქმე დამართოდა, პირველად მე ვესროდი ქვას და ყიუიას დავცემდი, თუმცა-კი, შეიძლება, იმაზე უარესი ვყოფილვიყავი. ყველასაც უნდა უყიუინონ, თუ-კი შეატყეს ვისმე. ყველა ლირსი იქნება ამ სასჯელისა. ამ სასჯელს არავინ უნდა გაექცეს. მე-კი გაქცევას ვაპირებდი. აი, ხომ მხედავ, ეხლა ზღვით ვმოგზაურობ, იმ საზოგადოებას მოვშორდი, რომელმაც გამკიცხა სამართლიანად. თავის მოკვლაც განვიზრახე. მინდოდა სამუდამოთ მოვშორებოდი, გავქცეოდი ტანჯვას, მაგრამ ამ მშვენიერმა დილამ გონს მომიყვანა და დამანახვა ჩემი სიმხდალე. დამნაშავე ვარ და ამისთვის, რა სასტიკი სასჯელიც უნდა იყოს, მოვალე ვარ ავიტანო და არა ვცდილობდე იმის თავიდან აცილებას. განა გამამართლებს თავის მოკვლა?!.. არა. ეგ უფრო

გამამტყუნებს, ჩემს სიმხდალეს დამტკიცებს. დამნაშავედ ვცნობ ჩემ თავს და ამისთვის სას-ჯელის ატანაც უნდა შევსძლო... მე საზოგა-დოებაში ვცხოვრობდი, იმის აზრს ვაფასებდი, მინდოდა იმ საზოგადოებაში პატიოსანი კაცის სახელი მეტარებინა და ამავე დროს-კი, გეყუ-რებათ, უპატიოსნოდ ვმოქმედებდი, სიკეთეს სათვალსაჩინოდ ვაკეთებდი და იმას, რაც პა-ტიოსანი კაცის სახელს შებღალავს, ვმალავდი. ეს ხომ უპატიოსნობაა, არა?!.. სულითა და გულით უნდა პატიოსანი ვყოფილვიყავი, დაფა-რული არა უნდა მქონოდა-რა, ჩემი ყოველივე უნდა ცხადი ყოფილიყო ყველასთვის და მაშინ ეს აღარ დამემართებოდა. ამისთვის, ღირსი ვარ სასჯელისა. დე, მაფურთხოს საზოგადოებამ, მიყიუინოს საზოგადოებამ!.. ღირსი ვარ!.. მე უკანვე დავბრუნდები!.. უკანვე დავუბრუნდები იმავე საზოგადოებას, აი, ამ ნავთსადგურში მო-ვუცდი მეორე გემს და უკანვე დავბრუნდები, რომ ყოველ ნაბიჯზე მაფურთხოს, მიყიუინოს ამ საზოგადოებამ. ღირსი ვარ ამისა, ღირსი!..



„...სულ ერთია!...“

(ეტიუდი)

I

— თეკლე!... — დაბნევით შესძახა კიკომ
და თეკლეს ორივე ხელი თავისკენ მიიზიდა.

— კიკო!... — თეკლემაც იმავე კილოთი
უპასუხა და კიკოს გულს მიესვენა.

წისქვილის ბორბალი-კი სჩეფდა, წყალს
არლვევდა, ანაწილებდა, აქაფებდა და საამურად
უმღერდა შეყვარებულებს...

— მაშ გიყვარვარ, გიყვარვარ, ჩემო, ჩემო?!
ჩვენ სამუდამოდ ერთმანეთისა ვიქნებით!... —
ხმის კანკალით ჩასძახოდა კიკო და თან თეკ-
ლეს გულზე იკრავდა.

— მე... შენ... ჰო... — კვნესით, მეტის-
მეტი ალელვებისაგან მისუსტებული ხმით გაი-
ძახოდა უაზროდ თეკლე, და თვალები ელუ-
ლებოდა.

„უყვარხარ!.. უ...ყვარ...ხარ!..“ ემოწ-
მებოდა წისქვილის ქვა ბორბლის შხუილთან
ერთად.

— ოხ, რა ბედნიერი ვარ!.. — გულამოს-კვნით წამოიძახა კიკომ და თავდავიწყებით შეუ-ერთა თავისი ტუჩები თეკლეს მხურვალე, ფუნ-ჩულა მარწყვისფერ ტუჩებს.

თეკლემ ტუჩები თავის უნებურად სიამოვ-ნებით შეაჩუჩნა და, თითქოს მთლად სულში ჩაძვრენა უნდაო, უნებურადვე კბილებამდის პირში შეუწოდა...

„ახ, რა კარგია!.. ახ... რა... კარგია!.. ახ-რა-კარ-გია!..“ — წისქვილის ქვა და ბორბალი გაიძახოდნენ ერთად და ამცნობდნენ არეს ამ ნეტარ წამს. მთვარეც, მუდმივი მოწამე შე-ჟვარებულთა, ალერსით დასცეკროდა თეკლეს და კიკოს ზევიდან და თითქოს ცოტათი კიდე-ვაც შურდა იმათი ბედნიერება...

წისქვილის ახლოს ორი არსება ერთ არ-სებად გარდაქცეულიყო და ეს-კი ზევიდან, ეულად, ყოველთვის მარტოდ, — ოხ, რა ძნე-ლია, რა მწარეა! — მოცურავი დასცეკროდა... რა ვუყოთ, რომ მნათობია?! ოხ, რა დიდის სიამოვნებით სამუდამოდ დაუთმობდა თავის მნათობობას, თუ-კი ვინმე ერთ წამს დაავიწ-ყებდა თავის მარტონბას და მეორე არსებას შეუერთებდა!.. მაში თეკლესი და კიკოს ეს წა-მი არ შეშურდებოდა?!

— ჩემო თეკლე!.. ჩემო კარგო, ხომ სა-
მუდამოდ ასე ბეღნიერები ვიქნებით?!

— ჰა?!.. კიკო, შენ?!.— თეკლე შეკრთა
კიკოს ხმის გაგონებაზედ და ხელიდან გაუსხლტა.

— თეკლე, გონს მოდი!.. რა დაგემართა?!.
განა არ გიყვარვარ?!— განცვიფრებით დაეკითხა
კიკო და მიუახლოვდა.

— მე შენი?!. არა... წავიდეთ შინ!.. მე-
რე... მერე!..— არეულად უპასუხა თეკლემა და
სახლისკენ პირი იბრუნა.

კიკოც დაუმხარდამხარდა და გაჩუმებული,
დალვრემილი გაჰყა...

II

„... წავიდა!.. დალონებული წავიდა!...
ოხ, რა გულ-ნატკენი გამომემშვიდობა!“— გა-
იძახოდა თეკლე და აზრი აზრისათვის ვერ დაე-
კავშირებინა.

რამდენი ხანია, რაც თეკლემ თავის საწოლი
ოთახის კარი შეიხურა... თითქმის მაშინვე, კი-
კო რომ სახლის კარებთან გამომშვიდობებისას
დაეკითხა, რას მიპასუხებო. აგერ, შეა ლამე
თითქმის გადავიდა, სულ ამ პასუხს ეძებს და
ეხლაც ვერა მოუგვანებია-რა...

„ლმერთო!..“ — ლმერთს-და შეევედრა, რომ
იმას მაინც ჩაეგონებინა პასუხი, რაკი თავის
გონებით ვერა მოეხერხებინა-რა და გარედ გა-
ვიდა.

გაიარა ერთი ხეივანი, მეორე, მესამე. აჩრ-
დილივით მიაბიჯებდა და თავის საყვარელ აღ-
გილს მიადგა. რამდენჯერ უოცნებნია ამ ხევის
პირას, დიდ ქვასთან და ეხლაც უნებურად იქ
მივიდა...

ახ, რა ტკბილად მოსთქვამდა ხევი... რა
სასიამოვნოდ უღვიძებდა გრძნობებს წყლის
ჩანჩქარი!.. ეხლა?..

ახ, ის მთვარეც დასცემერის!.. წყალიც
ისევ-ისე მოჩანჩქარებს და, ლმერთო, წისქვილის
ხმაც მოისმის!..

— კიკო, კიკო, მიყვარხარ!.. — ლმობიე-
რად წამოიძახა თეკლემ და თავი მოგონებას
მისცა...

წყალი-კი მოჩანჩქარებს, ტკბილს, სასია-
მოვნო ხმებს ასმენს; მთვარე ხომ აფრთოვანებს,
და თეკლეც...

კიკოს ეხვევა, ფიანდაზად ეგება...

— ლმერთო, ხომ მიყვარს და მაშ რატომ
მაშინვე არ ვუპასუხე: „შენი ვარ... სამუდამოთ
ასე ვიქნებით“, როდესაც ის ჩამჩურჩულებდა: ხომ

სამუდამოთ ბეღნიერები ვიქმნებითო... რამ და-
მიშალა მაშინვე „ჰო“ მეთქვა? ან ეხლა რა-
ტომ არ მინდა გადავწყვიტო, რომ მე იმისი
ვიყვე, რატომ, რატომ?!.. ხომ მიყვარს და მაშ
რაღა მიშლის ხელს?!.. მამა-ჩემი მეწინააღმდე-
გება?!.. ახ, რა სისულელეა!.. დეე, იყოს წი-
ნააღმდეგი!.. მე...

აგერ თეკლე თავის გრძნობას თავდავიწ-
ყებით მიეცა. მამას და ყველასაც ეწინააღმდეგა
და კიკოს გაჰყვა.

ის კიკოსია და კიკო ამისა... ცხოვრობენ...
კიკო ისევ ის კიკოა. დრო არა სცვლის. უყვარს
თეკლე, გაგიუებით უყვარს, უფრო ძლიერად,
ვიდრე პირველში. ბევრი ისეთი კარგი თვისე-
ბა გამოიჩინა შემდეგში, რაც პირველად თეკ-
ლეს ვერ შეემჩნია. თეკლესაც უყვარს კიკო.
თითქმის თაყვანსა სცემს, მაგრამ,—ოხ, ღმერ-
თო,—მაინც კმაყოფილი არ არის!.. რა ემარ-
თება?!.. რატომ კმაყოფილი არ არის, როდე-
საც კიკო ხეველის მეუღლეა?!.. იმ კაცის მეუ-
ღლეა, რომელიც უყვარს, რომელსაც თითქმის
თაყვანსა სცემს?!.. კიკო ხეველის მეუღლე?!..
ოხ, რა უცნაური გვარია!.. ხეველი... ხევე-
ლი... ახ, რატომ ეს გვარიც ისე ბრწყინვალე-
ბით არ არის შემოსილი, როგორც მისი მამი-

სა!.. რანაირი პატივით ექცეოდნენ, როდესაც
 თეკლე ხეველის მეუღლე არ იყო!.. ეხლა?!..
 ეხლა-კი, ღმერთო, ზედაც არავინ უცქერის.
 ყველა ტუჩის აშვერით ყურში აგონებს: თა-
 ვადიშვილის ქალი ვიღაც ხეველს, უბრალო მას-
 წავლებელს, გაჰყვა ცოლადაო! ესეც იმალება,
 აღარავის უნდა ეჩვენოს. რცხვენიან თავის გვა-
 რისა. მდიდარი მაინც იყვეს, რომ თავის სიმ-
 დიდრით ჩააჩუმოს, ყველანი ალაგმოს... მაგრამ,
 ოხ, სიმდიდრეც არა აქვს!...

— კიკო, კიკო! დამიხსენ!.. — გულის სა-
 კლავად შეევედრა კიკოს და ცრემლების ფრქვე-
 ვით ყელზე ჩამოეკიდა...

— თეკლე, ჩემო, ჩემო, მითხარ, რა გა-
 წუხებს, რომ თავს შემოგევლო და გიშველო
 რამ, რომ ცრემლები შეგიშრო... იქნება ჩემ
 სიყვარულში დარწმუნებული არა ხარ, ეჭვი
 გაქვს რამე... ოხ, თეკლე, მითხარ, მითხარ,
 რაც გინდა დამისახელე, რითი გინდა დაგიმტ-
 კიცო ჩემი სიყვარული?!

— კიკო, კიკო! — გაიძახოდა თეკლე და
 ქვითინებდა.

— ჩემო კარგო, მითხარი, მითხარი რითი
 დაგიმტკიცო ჩემი სიყვარული და...

— სიყვარული!.. სიყვარული!.. მარტო

სიყვ...

— იპოვნე?!.— ამ დროს მკაფიოდ ჩამოსძახა ჭოტმა და სიტყვა შეაწყვეტინა თეკლეს.

— ვერა!... — შემოესმა შორიდან მეორე ჭოტის ხმაც.

— ჰა?!.— ტანის ურჯოლით აქეთ-იქით მიიხედა და... ისევ იმ წყლის ტკბილი ჩანჩქარი, წისქვილის საამური ხმა შემოესმა...

— ღმერთო!.. — სამადლობელი კილოთი წამოიძახა და თვალის ქუთუთოები ლმობიერად ზევით ასწია. თითქოს ის დიდი ქვა, რომელზედაც თითონ იყო მისვენებული, გულზე დასწოლოდა და სუნთქვას უხუთავდა, მოსწყდაო, ისეთი შვება იგრძნო, როდესაც გამოერკვია, და ამისათვის ღმერთს მადლობა შესწირა, რომ ყოველივე ოცნების ნაყოფი იყო და არა სინამდვილე.

ხედავს თეკლე, რომ ისევ ის წყალი მოჩანჩქარებს, ისევ ის წისქვილის ხმა მოისმის; ისევ თავის მამის ბალშია და არა კიკოს პატარა, სულის შემხუთავ ოთახში... ისევ თავის მამის გვარი აქვს და არა კიკო ხეველისა. უხარიან თეკლეს!.. თავისუფლად სუნთქვავს, რომ ყველაფერი ისევ ისეა, როგორც ამ რამდენისამე წუთის

წინად... მხოლოდ ერთი რამე აღონებს. ეს
ის, რომ მთვარე, თითქოს თვალს არიდებს
თეკლეს და მთის იქით დასამალავად მიეჩარება.

III.

„... ლმერთო!..“ — შედგა ოთახის შუა კი-
კო და შუბლი ისე ძლიერად შეიჭმუხნა, რომ
თმა და წარბები ერთმანეთთან მიიტანა, მხრები-
კი ყურებამდის აიწურა. უნდოდა ამ მოქმედე-
ბით თავიდან ყოველივე აზრი გამოედევნა, რომ
ერთ წამს მაინც სულ არაფერი ეფიქრნა, ერთ
წამს მაინც თეკლეს სახე მოეშორებინა, მაგრამ...

„ლმერთო, ლმერთო?!“ — თითქმის ტირილით
გაიძახოდა ასე შუბლ-შეკმუხვნილი და მხრებ-
აწურული თითებს იმტვრევდა...

„რამ გავაკადნიერა ისე, შე სულელო ჩე-
მო თავო, რომ... ხა, ხა, ხა!.. რომ სიყვარუ-
ლი გამოუცხადე!..“ — მწარედ გადიხარხარა და
აწურული მხრები ჩამოეშალა, თმა და წარბები
ერთმანეთს დაშორდნენ, და კიკო ისე გაიშალა
ტანში, ისეთი სისუსტე იგრძნო, რომ ძლივე-
ლა მიბარბაცდა სავარძლამდის და მოწყვეტით
დაეშო...“

„რად მოვაწერინე ეს, რად?..“ — შესძახა

გულ-ამომჯდარმა კარგა ხნის შემდეგ და ტანში საშინელი ჩევლეტა იგრძნო...

„...ისე გავკადნიერდი, რომ ხვევნა-კოცნაც დავუწყე... ხა, ხა, ხა!.. ცოლადაც მინდოდა... ცოლობის პირობასაც ვსთხოვდი, მინდოდა სიტყვა დამეტყუვნა... სადამდის მივიდა ჩემი თავ-ხედობა!..“ — დარცხვენით იძახდა და თავის თავს მჩვარში ხვევდა.

„...ოხ, თეკლე, თეკლე, ასეთი სათნოიანი სიტყვების ხმარებას ის არა სჯობდა, გაგელან-ძლე, თავზე ლაფი დაგესხა ჩემთვის!.. მაგრამ ისე კარგი, ზრდილობიანი ხარ, რომ...“

„ჩემო კიკო,—დაიწყო თითქმის ეს მეათედ თეკლეს წერილის კითხვა: — მე ჩავუკვირდი ჩემს თავს, ჩემს გრძნობას და, ვფიცავ ზეცას“...

— რად ჰუციცავ, რად, წმინდა თეკლევ!.. განა დაუფიცებლად კი არ დაგიჯერებდი?!.— შეწყვიტა წერილის კითხვა და ხელი თვალებ-ზე მიიჭარა.

„...ვფიცავ ზეცას,—განაგრძო ცოტა ხნის სიჩრდის შემდეგ კითხვა: — მთელ ლამეს არა მძინებია. სულ ჩემ გულს ვუკვირდებოდი. მინ-დოდა წამიერი გულის-თქმა ძლიერ გრძნობად გარდამექმნა, რომ შენ უკანასკნელ კითხვაზე „ჰო, შენი ვარ სამუღამოდ“ მეთქვა, მაგრამ...

„დაივიწყე, ჩემოკიკო, ყველაფერი, რაც
ჩვენს შორის მოხდა და ჩვენ ისევ ისე კარგი
მეგობრები ვიყვნეთ...“

„ჩვენ ისევ ისე კარგი მეგობრები ვი-
ყვნეთ...“ განიშეორა უკანასკნელი სიტყვები
და თავის ქნევით მწარედ ჩაიღიმა...

„მე ლირსი არა ვარ შენი მეგობრობისა,
წმიდათა წმიდავ, უმანკო თეკლევ... სად მე და
სად კიდევ შენ!.. მე...“ — შეწყვიტა უეცრად
სიტყვა და წერილის კუდად მონაწერი სიტყვები
ამოიკითხა: „ეს წერილი, გთხოვ, უკანვე გამო-
მიგზავნო, თუ შესაძლებელი იყვეს შენთვის...
კი არა იფიქრო-რა...“

„ფუი, ამდენი ხანია, ხელში მიჭირავს
და ეს მცირედი თხოვნაც ვერ ავუსრულე. კარ-
გი თვალით რად უნდა მიყურებდეს!..“ — გა-
დააფურთხა და მაშინვე კონვერტი აიღო ხელ-
ში...

„მშვიდობით, მშვიდობით!.. შენს მაგივ-
რად წერილს ვემშვიდობები...“ მაგრად, მაგ-
რად აკოცა წერილს, კოცნის დროს რამდენიმე
ცრემლი ზედ დააგდო და შემდეგ, თითქოს სა-
ჟვარელ არსებას მარხავდესო, ცრემლის ფრქვე-
ვით დაკრძალა კონვერტში...

IV

— დღეს მოვა და ჯერ თეკლესთვის-კი
არა მითქვამს-რა,—ჩაილაპარაკა ვახტანგმა და
თეკლეს ოთახისკენ გასწია.

— სად არის თეკლე? — დაეკითხა ვახტანგი
გოგოს, რომელიც წინ შეეფეთა, როდესაც
თეკლეს ოთახისკენ მიღიოდა.

— ჯერ ისევ სძინავს...

— აქნობამდის? .. საცაა საღილად დავსხდე-
ბით და...

— მგონი, წუხელის არა სძინებია... ღი-
ლას განთიადისას გამაღვიძა, წერილი გაღმომცა
და მითხრა: „კარგად რომ მომზევდეს, ეს წე-
რილი კიკოს წაულე. მე-კი დავიძინებ ეხლა
და სანამ მე არ გავიღვიძო, ნუ გამაღვიძებთო...“

— მერე წაულე წერილი? ..

— ღიას, ბატონო.

— არა გითხრა-რა? ..

— ვინა?

— ვინა და კიკომ.

— არა. ისევ ეძინა, რომ მივუტანე.

— მაშ ვის მიეცი?

„რას მისწერდა? — უსიტყვოდ დაეკითხა
თავის თავს და ოთახისკენ წავიდა. — კი არა

იყოს-რა?!.. იქნება დაგვიანდა და საქმე კი-
დევაც გაათავეს!.. ეს შეუძლებელია!.. მე
თეკლეს ნებას არ მივცემ, რომ იმ ვიღაც
მასწავლებელს, კიკო ჰევიან თუ მიკო, მის-
თხოვდეს. ეს...“—უეცრად აზრები შეუწყდა.
სულ ერთიანად განებნივნენ, როდესაც კარი
შეალო და მძინარე თეკლე დაინახა.

კარგა ხანს იდგა კარებში. ლმობიერად
გულზე ხელი დაიკრიფა, თითქოს წმინდანის
წინ სდგასო სალოცველად, და მზერა დაუწყო
თავის ქალს, თავის ერთად-ერთ ასულს, თა-
ვის შვენებას, რომელიც გულალმა იწვა ოდ-
ნავ წაფარებული ფარჩის საბნის ქვეშ. საბანი არ
ფარავდა მის გამოქანდაკებულ მკერდს, ყელს,
მკლავებს. ვინ იტყოდა, რომ ამ ოთახში, ამ
საბნის ქვეშ მოთავსებულა ამ ქვეყნის ასული
და არა ციური?!

ვახტანგი იდგა კარებში და ეშინოდა გან-
ძრეულიყო, რომ მძინარის ნაზი სუნთქვა არ
აეშფოთებინა...

„ლმერთო!—ვაიძახოდა უსიტყვოდ ვახტან-
გი:—სად ვიყავი აქნობამდის, რომ არ ვიცო-
დი, თუ ამისთანა მშვენიერი იყო თეკლე?!.
ჩემი თეკლე, ჩემი სისხლ-ხორცი!..“—სიამაყით
აევსო გული, რომ მისი სისხლ-ხორცი ასეთი

მშვენიერი იყო, და ვეღარ მოითმინა: ფეხ-აკ-რეფით მივიღა საწოლთან და გვერდით მიუჯდა.

„თეკლე, ჩემო თეკლე!.. შენი ადგილი დედოფლის ტახტია... შენ უნდა სკიპტრა გე-ჭიროს ხელთ და განაგებდე სამეფოს... და არა ვიღაც უგვარტომო კიკო ხეველის ცოლობა... ყოველ ღონეს ვიხმარ, რომ ეგ არ მოხდეს, არა და არა... ჯერ შენ გამოუცდელი ხარ, ჩემო კარგო, და მე უნდა საფრთხეს აგაცდი-ნო...“ — გადაწყვეტით წარმოსთქვა ვახტანგმა უკანასკნელი სიტყვები ხმა-მალლა და სასოებით ტუჩები თეკლეს მკერდისკენ საკოცნელად წა-ილო...

— ჰა?!.. — უეცრად შეფორთხიალდა თეკლე, როდესაც ვახტანგი იმის მკერდს ტუჩებით შეე-ხო, და იმისი ლაწვების ნაზ სპეტაკ ფერს მორ-ცხვობის აღმულმა გაჰკრა...

— ნუ გეშინიან, მე ვარ, შვილო!..

V

— მართალს ამბობ, მამი, კარგი ცხოვრე-ბა აქვს, კარგი გვარიც აქვს, თავადიშვილობით, ჩამომავლობით საქართველოს თავადებში თით-

ქმის პირველი ადგილი უჭირავს, მაგრამ, რა ვქნა, თითონ არჩილი სულელია, უშნო, ულამაზო...—ღიმილით ეუბნებოდა თეკლე სა-დილ შემდეგ მამას და თვალს არ აშორებდა ვახტანგის სახის მოძრაობას...

— შვილო, — დაიწყო ვახტანგმა ცოტა ხნის სიჩუმის შემდეგ:—გონიერი ხარ, შენ თითონ მიხვდები ჩემი რჩევის სიკეთეს. თორემ შენი ნებაა, მე ძალას არ დაგატან. იქნება, შენ კი-დევაც ამორჩეული გყავს ვინმე...—უკანასკნე-ლი სიტყვები გაგრძელებით წარმოსთქვა და თე-კლეს თვალი თვალში გაუყარა.

— მამი, არა გრცხვენიან, რომ მაგას მეუ-ბნები!.. ამორჩეული რომ მყვანდეს ვინმე, განა შენ არ გეტყოდი?!..—საყვედურით უპასუხა და თავი ძირს დახარა.

— რა ვიცი, შვილო, ეხლანდელ დროში...

— კიკოს გამოუგზავნია ეს წერილი!..—ამ დროს შემოვიდა გოგო წერილით და ვახტანგს ლაპარაკი შეაწყვეტინა.

— შენთან იქნება!—შუბლ-შეჭმუხვნით მი-მართა ვახტანგმა თეკლეს.

— ჰო, ჩემთანაა!—უპასუხა თეკლემ და მაშინვე კონვერტს თავი გაუხია, საიდანაც წე-რილი ამოილო.

საჩქაროდ გადაატრიალ-გადმოატრიალა, ხან
თავს დახედა და ხან კიდევ ბოლოს, მაგრამ...
— ერთი სიტყვა მაინც დაეწერა ზედ!... —
ამოიძახა სასოწარკვეთილებით და მკლავები ჩა-
მოსცვივდა.

— რა მოგივიდა, შეილო? — თანაგრძნო-
ბით დაეკითხა ვახტანგი და ხელი მოჰკიდა...

— არაფერი, არაფერი!.. — შუბლზე ხელი
გადისო და ისევ ისე გონება მოიკრიბა.

— რა იყო?! თუ არა ყოფილიყოს-რა,
ფერი მაგრე რად წაგივიდოდა?!

— აი, თუ გინდა, წაიკითხე!.. — წამოდგა
და წერილი მიაწოდა...

ვახტანგმა წერილის კითხვა დაიწყო. თე-
კლე-კი ოთახში დადიოდა ამ დროს.

— მამა არ წამიწყდება, ვერა გამიგია-რა!..
ეს წერილი შენია.

— ეგრეა, მამა-ჩემო! ეგ წერილი ჩემია და,
როგორც ბოლოში ამოიკითხავდი, მე ვთხოვ
უკანვე დაბრუნებას, იმასაც ჩემი თხოვნა შეუ-
სრულებია და, აი, უკანვე მომივიდა.

— ეგ ყველაფერი კარგი, მაგრამ მე მაინც
ვერა გამიგია-რა...

— ეხ, მამა-ჩემო, მაგას რა დიდი გაგება
უნდა. აი, საქმე რაშია. — მიუჯდა გვერდით

და წინა-დღის ამბავი ყოველივე უტყუცრად უაშბო.

— როგორც გატყობ, კიკო გიყვარს და ძალიანაც, — უთხრა ვახტანგმა, როდესაც თეკლემ თავისი საუბარი დააბოლოვა.

— მიყვარს და მაგრე!? არ ვიცი, ესე შეეძლება ვისმე კაცი შეიყვაროს, როგორც მე კიკო მიყვარს!...

— მაშ რას ნიშნავს შენი წერილი? ან უარი რად უთხარი, ან კიდევ რად ატყუებ, არ მიყვარხარო?

— როგორც გატყობ, მამა-ჩემო, შენ ბავ-შვი ყოფილხარ, ჩემზე გამოუცდელი. „არ მიყვარხარ“ იმისთვის მივწერე, რომ უარის თქმა მინდოდა. რომ მიმეწერა: „მიყვარხარ, მაგრამ მაინც ცოლად ვერ გამოგყები,“ მაშინ კიკო ხომ შემიზიზლებდა, შემიძულებდა?... რას იფიქ-რებდა?.. ის-კი არ მინდოდა, რომ კიკოს შევ-ძულებოდი და ჩემზე ცუდი აზრი შეეყენებინა. ცოლად-კი, თუმცა მიყვარს კიკო, რატომ არ მინდა გავყვე, ამაზე, არ ვიცი, რა გიპასუხო. იქმნება იმიტომ, რომ შენი ქალი ვარ და... მამა-ჩემო, რა დაგემართა?!.— უეცრად შესწყვიტა ლაპარაკი და მამას მოეხვია, როდესაც თვალი შეასწრო, რომ მისი ლაპარაკის ღროს ვახ-

ტანგი მთლად გაფითრებულიყო და გამოშტერებული თავის ქალს შესცეკეროდა...

— ჰო!.. არაფერი... განაგრძე... ცოტა წყალი-კი დამალევინე!.. — შუბლზე ხელი გადისო და გრძლად ჩაისუნთქ-ამოისუნთქა. თეკლე-კი წყლისთვის გაიჭუა.

სულ რამდენისამე საათის წინად ამაყობდა თეკლეთი. თავი მოჰქონდა, რომ თეკლე მისი სისხლ-ხორცი იყო. ეხლა-კი, როცა თეკლე უამბობდა თავის სიყვარელზე, თითქმის გულიდან მოიგლიჯა. ძნელი იყო იმისთვის დარწმუნებულიყო, რომ თეკლე უმწიკვლო არ არის, რომ ვისაც შეიყვარებს, თავდავიწყებით არ მიეცემა, მაგრამ, დახე, თურმე თეკლე რანაირად მოქმედებს!

„კიუ შეუყვარდა, — ფიქრობდა ვახტანგი და თან მწარედ იღიმებოდა: — არ ვიცი, ესე შეეძლება ვისმე კაცი შეიყვაროს, როგორც მე კიკო მიყვარსო, იძახის და თან უარსაც ეუბნება!.. არ მოველოდი ამასა, არა!.. არ მეგონა, თუ თეკლე ასე მოიქცევოდა და თავისს გრძნობას შებლალავდა! — წამოიძახა ვახტანგმა და წამოდგა. — მართალია, მე ვეწინააღმდეგებოდი, ძალას დავატანდი, რომ კიკოს არ შეულებოდა, მაგრამ, ოხ, რა ბედნიერი მამა ვიქ-

ნებოდი, რომ მე... ჩამეფუშა ეგ ქორწინება და
 არა თითონ თეკლეს. მაშინ თეკლე... ღმერთო,
 რა დღე დაგვიდგა, რომ აღარც გრძნობა, აღარც
 გულწრფელობა არსებობს!..“ — მწარედ წამოი-
 ძახა და ცრემლებიც-კი ჩამოუგორდა ჭალარა
 წვერზე...

— მამი, რა მოგდის?! სტირი კიდევაც?!..
 აჲა წყალი!... — გაოცებით დაეკითხა თეკლე,
 რომელმაც ამ დროს ჭიქით წყალი შემოიტანა
 და ძალად დაალევინა.

— ხომ მხედავ, მამი, მე შენი წინააღმდე-
 გი არა ვარ?! ხომ არა გაწყენინე-რა? რადა ხარ
 მაგრე დალონებული, ეგ ცრემლები რას ნიშ-
 ნავს?! — ალერსით უთხრა თეკლემ და ხვევნა
 დაუწყო მამას.

ვახტანგმაც ვერ გაუძლო ჭალის ალერსს,
 თითონაც მაგრად, მაგრად ჩაიკრა თეკლე გულ-
 ში და ქვითინით მხურვალედ ეხვეოდა. ცრემ-
 ლები-კი ღაპა-ღუპით ჩამოსდიოდა და თეკლეს
 ლოყებს ეწვეთებოდა...

უნდოდა ვახტანგს დილანდელი თეკლე
 დაებრუნებინა, უკანასკნელი დავიწყებოდა,
 მაგრამ თეკლეს წყეული სიტყვები: „მიყვარს,
 მაგრამ უარს ვეუბნები“ საჭრეთელივით ტვინს

უხვრეტავდა და ერთ წამსაც არ შორდე-
ბოდა...

— ეს სიხარულის ცრემლია, შვილო, რომ
შენ მაგისთანა ჭიკვიანი, გონიერი ქალი მყევხარ,
— უთხრა ვახტანგმა ცივად, როდესაც გონს მო-
ვიდა და დარწმუნდა, წინანდელი თეკლე სამუ-
დამოდ დაკარგა.

ეხლა ერთი-ლა აწუხებდა: რაც შეიძლება,
მაღვე მოეშორებინა თავიდან...

— მგონი, სამგზავრო მატარებელი ჩქარა
მოვა. წადი, ეტლი შეაბმევინე და გაგზავნე,
რომ არჩილს იქ ცდა არ მოუხდეს.

— ეხლავე...

— თქმა იღარ გინდა, როგორც უნდა მო-
ექცე არჩილს...

— ნახავ, მამა, შენს არჩილს ი სულელ
თავს როგორ გამოვუსულელებ!.. მგონი, ამა-
ლამვე ნიშნობა მოვასდინო... — ლიმილით უპა-
სუხა თეკლემ.

— კიკოსაც დაუძიხე!... — ეშმაკურად უთ-
ხრა ვახტანგმა თეკლეს, რომ წმინდა გრძნობა
მოეგონებინა, რომ ამ მოგონებით არჩილის
ცოლობაზე ცოტა ყოყმანობა მიანც გამოეწ-
ვია და შეესყიდა თეკლეს თავისი საქციელი,
მაგრამ...

— კიკო ქალაქს უკვე წასულა! გოგომ
მითხრა, კიკო წელან ცხენით სადგურისკენ
მიღიოდაო...

VI

— რაო, რაო?! აღარ გაბედოთ მაგის გა-
მეორება, თორემ!...—გული ყელში მოებჯინა,
სიბრაზით ნერწყვი შეუშრა და ველარ განაგრძო
ლაპარაკი ალექსიმ.

— გავბედავ-კი არა, დაგიმტკიცებთ ყოველ-
სავე ჩემ სიტყვას და ცხადად დაგანახვებთ, რა
ზნეობის ადამიანია იგი!—უფრო ბეჯითად წა-
მოიძახა ნიკომ და თვალები სულ აენთო.

— უი, უი!.. თქვენ ილიაზე ამბობთ,
ბატონო ნიკო, მაგას?!.. ვანოს მომხრეებს-კი
ხმა არ ამოელებათ ზნეობაზე!..—გადაწყვე-
ტით მიუგო ქ-მა ქეთევანმა ნიკოს.

— დადიან და ავრცელებენ ტყუილ ხმებს,
ხან რას იგონებენ და ხან რას?!

— ვინ, ვინ?!..—თითქო დასაკრავად მიღი-
სო, ისე წაეტანა ალექსის გაბრო და გონება-
დაბნეული გაიძახოდა:—ვინ, ვინ?.

— ეს რა კაცობაა, რომ ჯერ უარი გა-
ნაცხადა, ისე მედიდურად გამოგორდა და დაი-

ძახა: აღარ მინდა, აღარ შემიძლიან ბანკში სამსახურით, და მეორე დღესვე-კი შესკუპდა და ისევ ისე განავებდა! — ზიზღით წარმოსთქვა მიშომ.

— გაგიხარდებოდათ კია, რომ მართლა გასულიყო და ვანო დედა-ბუდიანად ბანკში და-სახლებულიყო!.. ხა, ხა, ხა!.. თავმჯდომარემ როგორ მაშინვე დაურიგა ადგილები!.. „შენ, როგორც მოადგილე, დირექტორების თავ-მჯდომარედ იქნები, შენ კიდევ მეორე დირექ-ტორად და შენ კიდევ“... ხა, ხა, ხა!.. სასა-ცილო არ არის ამისთანა საჭმე! — ისე ცოცხ-ლად გააჯავრა თავმჯდომარეს ანდრომ, რომ თ. ილიას მომხრეებმა სიცილი ასტეხეს, თ. ვა-ნის მომხრეებს-კი ბრაზი მოერიათ და...

კაცი ვერც თავს გაუგებდა და ვერც ბო-ლოს. სიტყვებს აღარ ზოგავდნენ, აღარაფერს და აღარავის ერიდებოდნენ, ლანძღავდნენ ერთმანეთს უშვერი სიტყვებით. ჭალი და კაცი ერთმანეთს აჭარბებდა...

კიკომ საათს დახედა და თავი გაიქნია. შუაღამე გამხდარიყო. „საჭველ-მოქმედო გან-ზრახვით შეიყარნენ აქ, უნდოდათ რაღაც საჭმე გამოერკვიათ და ესენი-კი რას გაებნენ!“ — გაიფიქრა კიკომ და წასვლა დააპირა.

პირველად იყო კიკო ამ სახლში. მთელ საღამოს ხმა არ ამოუღია და თავსა და ბედს იწყევლიდა, რომ ამ დღეს აქ მოვიდა. აგერ ორი წელიწადი გავიდა, რაც თეკლეს წერილი მიიღო და მას შემდეგ სულ იმის მეცადინეობაში იყო, რომ თეკლეს პირდაპირ არსად შეხვედრიყო. ბანკის კრებაზედაც-კი არ დადიოდა, რადგანაც ფიქრობდა: „თეკლე უთუოდ ესწრება და წინ რომ შევეფეთო, მაშინ...“ „ვერიდებოდი ღოლოსა, დამხვდა ორლობის ბოლოსაო“, სწორედ ეს დაემართა კიკოს. სადაც არ მოელოდა, იქ შეხვდა. ამ საღამოს ლევანი შეხვდა და უთხრა: „უეპველად უნდა წამოხვიდე. მეც იქ მივდივარ. ლარიბ სტუდენტების ფონდზე იქნება ლაპარაკი. ამაღამ უეპველად უნდა დავაბოლოვოთ, თორემ მეტის-მეტად გაჭიანურდაო“.

კიკოს არ უნდოდა, მაგრამ უარი ველარ უთხრა. დანიშნულ იდგილს მივიღნენ. ჯერ რამდენიმე კაცი მოსულიყო. დიასახლისმა კიკოს გააცნო, ვინც არ იცნობდა, და შემდეგ ისევ სხვებთან ბაასი განაგრძო.

არ გასულა ნახევარი საათი, რომ თითქმის ყველანი მოვიღნენ და ყველაზე ბოლოს თეკლემ შემოაღო კარი. დიასახლისი მიეგება და

სათითაოდ უველანი გააცნო, ვისაც-კი არ იცნობდა...

— ღმერთო! — უსიტყვოდ შესძახა კიკომდა ჭირის ოფლმა დაასხა.

უნდოდა დამალულიყო, მაგრამ როგორ, როდესაც თეკლე დიასახლისმა იმასთან უკვე მიიყვანა.

— კიკო ხეველი! — უთხრა დიასახლისმა თეკლეს...

— ძლიერ სასიამოვნოა ჩემთვის თქვენი გაცნობა. ბევრი კარგი გამიგონია თქვენზე!... — უთხრა თეკლემ და ხელი გაუწიოდა.

კიკომ თავი დახარა, რომ მღელვარება არავის შეემჩნია და თეკლეს გამოწვდილ ხელს ხელი მიაგება...

ხელი დაეწო. ტანში ჟრუანტელმა დაურბინა და მუხლები მოეკეცა.

თეკლეს გაბრუნებას ვეღარც-კი მოუცადა, რომ მოდუნებული სავარძელზე დაეშვა...

— რატომ მაგრე ჩაფიქრებულხართ და ამ გაცხარებულ ბაასში მონაწილეობას არ იღებთ?! — დაეკითხა დიასახლისი კიკოს და გვერდით მიუჯდა.

— მე?.. არ ვიცი! — დაბნევით უპასუხა და იმისკენ მიბრუნდა.

— თეკლეს სიმშვენიერებ ხომ არ გაგიტა-
ცათ, რომ სულ იმას უცქეროდით?

— аг?..

— მე შეგამჩნიეთ, უარს ნუ ამბობთ!.. სა-
შინელი მღელვარებაც შეგეტყოთ, ხელი რომ
ჩამოგართოთ...

— ვის არ ააღელვებს მაგრავი. სიმშვენიერება!.. — ძალ-დატანებულის ლიმილით უპასუხა მხოლოდ იმისთვის, რომ ეპასუხნა რამ.

— თქვენ არ იცნობთ მაგას, რანაირი კე-
თილი და, ამასთან, ხომ ხედავთ, რა მშვენიე-
რიც არის! მაგრამ, საწყალს, ქმარი მეტის-მეტი
უზნეო და სულელი გამოადგა. — უკანასკნელი
სიტყვები წუწუნით წარმოსთქვა დიასახლისშა.

— მგონი, მაგისი ქმარი, ვიდრე. მაგის ქმრად გახდებოდა, მაშინაც სულელი და უზნეო იყო. ამისთვის აქ „გამოადგას“ ადგილი არა აქვს. უთუოდ იცოდა, როგორიც იყო არჩილი და ამისთვის ეხლა აღარ უნდა ინანოს.

— რა ვიცი, იცოდა თუ არა, და გინდაც
სცოდნოდა, რას იზამდა, როდესაც მამამ მო-
ისურვა! ერთად-ერთი ლირსება მაგის ქმარს ისა
აქვს, რომ ძალიან მდიდარია და, ამასთან, გა-
მოჩენილი თავადიშვილის გვარისაა. ხომ კარგად
იცით, ჩვენი მამები რანაირ ყურადღებას

აქცევენ ამ ლირსებას?!.. ოკულემაც რაკი დედის-
ერთა იყო, ალარ აწყენინა და მამას თავისი თა-
ვი მსხვერპლად შესწირა...

— გმირობა ჩაუდენია!..

— თქვენ იცინით და მე-კი მაგას სწორედ
გმირობას ვუწოდებ... .

— გეფიცებით, სიცილის გუნებაზე სრუ-
ლებით არა ვარ!..

— მაინც რაღაცნაირი კილოთი სთქვით.

— მე, აკი მოგანსენებთ...

— ქალბატონო, პატარა ხანს აქ მობძან-
დით! — მიმართა დიასახლისს მოსამსახურე გო-
გომ, რომელიც, ის-ის იყო, შემოვიდა და კი-
კოს სიტყვა გააწყვეტინა.

— ახ! — სიამოვნებით ამოისუნთქა, დია-
სახლისი რომ წავიდა, და კუთხე დაიჭირა, სა-
დაც სხვა ვეღარავინ მოთავსდებოდა. დიდხანს
ელოდა: ან ეხლა დაიწყებენ „დარიბი სტუდენ-
ტების ფონდზე“ მსჯელობას, ან ეხლაო, მაგრამ
სტუდენტები ვიდას მოაგონდებოდა ამისთანა
გამწვავებული ბაასის დროს. როდესაც ბაასმა
უკიდურესობამდის მიაღწია და საათმა, შუა-
ლამე უკვე შესრულდაო, უთხრა, კიკო წამო-
დგა. დიასახლისს თვალი მოჰკრა, მივიდა და
ხმა-დაბლა გამოემშვიდობა.

— გაპარვა გინდათ, ბატონო კიკო, აკი
დამპირდით, გაგაცილებთო?!.

— аյ?!

— დიახ, თქვენ!.. ოხ, რანაირი გულმა-
ვიწყი ყოფილხართ!.. — ღიმილით უთხრა კიკოს
თეკლემ და დიასახლისს გამოსამშვიდობებლად
ხელი გაუწოდა.


— თუ დაგვირდით, დიდის სიამოვნებით!.. — წამოიძახა და მთლად გაწითლდა.

— აა, თეკლე, დიდი ეშმაკი ხარ!.. შენ
წასვლა გინდოდა და, კიკო რომ მიდის, გინდა
ისარგებლო...

— დღეს ხომ ვერ მოვასწარით ფონდზე
ლაპარაკი და გაშ როდისლა შევიკრიბნეთ? —
დაეკითხა დიასახლისი თეკლეს და კიკოს.

— მგონი, ამ ორიოდ-სამ დღეში ვინც აქ
არის, ყველა სოფელში წავა და, არ ვიცი, ენ-
კენისთვემდის კრების დანიშვნა მოსახერხებე-
ლია თუ არა.—უპასუხა კიკომ და კარიბჭეში
გავიდა.

— ეს რა უბედურებაა, ამ საქმეს ბოლო



ვერ მოვუდეთ?! ეხლა რომ გაგვეთავებინა, ამ ზაფხულს სოფლებში ბევრ ფულს შეაგროვებდა ყველა ჩვენგანი, — დალონებულის კილოთი წარმოსთქვა დიასახლისმა და თეკლეს საგამომშვიდობისოდ აკოცა.

— განა არ შეიძლება, ფული ამ ზაფხულს მაინც შეიკრიფოს. — უპასუხა კიკომ და მაშინვე დაუმატა: — დამე მშვიდობისათ!..

— რასაკვირველია!.. არ დაგვივიწყოთ. მოდით ხოლმე, სოფლიდან რომ დაბრუნდეთ.

— ვეცდები!..

VII

— კიკო, ნუ თუ არ გინდა დავიწყო ჩემი ამბავი?! — ხმის კანკალით შეევედრა თეკლე და ახლოს მიუჯდა.

— წმინდათ შევასრულე თქვენი თხოვნა: დავივიწყე ყველაფერი, რაც ჩვენს შორის მოხდა.

— კიკო, გენაცვა, დაანებე თავი მაგ კილოთი ლაპარაკს!.. მოიგონე ის ლამე!.. ლმერთო, ერთხელ მაინც კიდევ გამაგონე ის ნაზი გრძნობით სავსე ხმა და მითხარ: „სამუდამოდ“...

— კმარა, თეკლე... რაც იყო, ის აღარ

დაბრუნდება... შენი წერილი რომ მივიღე, კი-
 ნალამ გავგიუდი... ისე შემძულდა ჩემი თავი,
 რომ კინალამ თავი მოვიკალ. გიუივით ვიძახდი:
 ისე როგორ გავკადნიერდი, რომ თეკლეს, ცი-
 ურ არსებას, ჩემის ჭუჭყიანი ხელით შევეხე.
 რამდენადაც ჩემ თავს ვამცირებდი, იმდენად
 შენ გამალლებდი. მაგრამ, ოხ, ღმერთო, რად
 მოხდა ეს?! ნეტავი, სულ ისე ყოფილიყო:
 ჩემი თავი საძაგლად მეცნო და შენ-კი.... ისევ
 ის თეკლე ყოფილიყავი ჩემს წარმოდგენაში!...
 მაგრამ, იმას ვამბობდი, სურათი შეიცვალა,
 როდესაც შევიტყე, რომ შენ არჩილის, იმ სუ-
 ლელისა და, უკაცრავად, ბრიყვის მეუღლე გა-
 ხდი... ჩემს წარმოდგენაში შენ ჩემი აღვილი დაი-
 კირე და მე კიდევ— შენი. შენ დაეცი ჩემ თვალ-
 ში და მე-კი ავმალლდი... ოხ, ნეტავი სხვა,
 ჭკვიანი, შენი ღირსი შეგერთო ვინმე! მაშინ მე
 ისევ შენი თაყვანის-მცემელი ვიჭმნებოდი... ეხ-
 ლა-კი...

— კიკო, მაკმარე!... გეფიცები, ძალა
 იხმარ...

— გაჩუმდი, გაჩუმდი!... სხვა რომ მოატ-
 ყუო, მე ვერ მომატყუებ... შენ სრულის შე-
 ნი ნებით და, ამასთან, სიხარულითაც მისთხო-
 ვდი! შენ შელახე შენი წმინდა გრძნობა, შე-

ნი ადამიანობა და სიმდიდრეს და გვარიშვილო-
ბას მიჰყიდე.

— კიკო, გევედრები, მაპატივე! მე თითონ
ვიტანჯები. ვგრძნობ, რა საზიზლარი ნაბიჯი
გადავდგი, როდესაც შენ წერილი მოგწერე.
ის არ მოგწერე, რასაც გული მეუბნებოდა.
გონებას დავემორჩილე... წმინდა გრძნობა სიმ-
დიდრეზე, პატივის-ცემაზე გავცვალე. ამას მარ-
თალს ამბობ. მაშინ მარტო გრძნობა არ მაკმა-
ყოფილებდა. მეგონა, გრძნობა შორს ვერ წა-
მიყვანს-მეთქი. მაგრამ ეხლა-კი ვხედავ, ჩემო
კიკო, რა შეცდომა, რა დანაშაულობა ჩავიდი-
ნე. რაც ჯვარი დავიწერე, ერთი წამიც არა მქო-
ნია ტკბილი ცხოვრება. გებრალებოდე, კიკო,
ხომ ერთხელ მაინც გიყვარდი! ეხლა სიმდიდრე,
პატივისცემა, დიდი გვარის რძლობა მაქვს, რა-
საც ჩემი გრძნობა ვანაცვალე, მაგრამ, ოხ,
ღმერთო, თანაგრძნობა აღარა მაქვს! სიმდიდრე-
სთან გულის სიღატაკე, სიცალიერე, მარტოო-
ბა შევიძინე... კიკო, ვერ წარმოიდგენ, რა მტან-
ჯველი, მქენჯნავი ყოფილა მარტოობა, გულის
სიცალიერე! — გულ-ამოსკვნით წამოიძახა და
ქვითინი მორთო.

— სააქაოსვე ჯოჯოხეთი, — განაგრძო თე-
კლემ ქვითინით, — გავიჩინე მე უბედურმა!.. და

შენც... კიკო, კიკო, ნიშნს მიგებ!.. არ მე-
გონე... აჲა, დასტკბი ჩემი ტანჯვით!..

— თეკლე, გენაცვა, დაჩუმდი! — ცრემ-
ლებმა მოულბო გული და ხვევნა დაუწყო...
— თეკლე, ჩემო კარგო, დაჩუმდი!.. — თითქ-
მის ტირილით უთხრა და გულში ჩაიხუტა...

— კიკო, კიკო, კიდევ გამაგონე ეგ ხმა!..
ახ, რა ბედნიერი ვარ!.. რა ტკბილია ეს წამი...
თბილი, ნეტარი!.. — აღტაცებით გაიძახდა თეკ-
ლე და თან კიკოს ახლა თითონ იკრავდა გულ-
ში, თავზე, შუბლზე ჰქოცნიდა... — ჩემო კიკო,
ჩემო, ჩემო, ხომ სამუდამოდ ასე ვიქნებით?!
ბედნიერები... კიკო, კიკო!.. — ჩასჩურჩულებდა
ნიავსავით კოცნის დროს თეკლე. კიკო-კი მო-
დუნდა, მოიქანცა და პასუხის მიცემის თავი
აღარა ჰქონდა...

— ჰო!.. თეკლე!.. ჩემო... — აკვნესდა
კიკო ძალა-გამოცლილი...

— კიკო, კიკო!.. ჩემი ხარ, განა?! ჩემი,
ჩემი, ჩემი!..

— ჰა?!. შენი?!.. ჰო!.. არა!.. მერე!.. —
უეცრად მოიკრიფა ძალა და ზეზე წამოდგა.

— წავიდეთ!..

— მოიცა, კიკო, რატომ მაგრე შეიცვა-
ლე? ხომ ჩემი ხარ?!.

— მერე!.. მერე!.. წავიდეთ ეხლა!.. — უპა-
სუხა გადაწყვეტით და კარებთან ელექტრონის
ზარის ლილს თითო დააჭირა. — ორ საათზე კე-
ტავენ „პურ-ლვინოს“. ეხლა-კი, აი, მესამეც,
ჩქარა შესრულდება, — უთხრა კიკომ და საათი
აჩვენა.

— მოხუცო, რა გერგება!? — დაეკითხა კი-
კო მოსამსახურეს, რომელიც ზარის დარეკაზე
საჩქაროდ კაბინეტში გაჩნდა.

— ორი მანეთი.

— აი, აქეთ მობძანდით, იქით კარი და-
კეტილია! — მოახსენა მოსამსახურემ და ეზოსკენ
გასავალი კარი მარდად გაულო.

VIII

— ეეებ!.. — გაახილა თვალები თუ არა,
თეკლეს გულის სილრმიდან აღმოხდა ეს ხმა.

რად?.. თითონაც არ იცის. გრძნობს,
რო ძალიან იქენჯნება, გული დახურული, და-
ბეჭდილი აქვს; ტანი მოშლილი, გონება და-
ბუნდოვებული და სული ხომ...

— ეეებ!.. — კიდევ ამოხდა გულიდან
თეკლეს და თვალები წყლით აევსო.

განძრევა უნდოდა. თუმცა ერთი წყვილი
ცრემლიც გადმოვარდა, პირველ წყვილს მეო-

რეც მოჰყვა, მაგრამ ჩუჩუნიც არ მოიღო; ხელის აღებაც ეზარება, რომ თვალები მოიწმინდოს, თითქოს მთელი ტანი დადამლავებული ჰქონდეს, ისეა ლოგინში მოლეშილი...

რადა?...

არ იცის. ეხლა თეკლე ისეთ მდგომარეობაშია, რომ არავითარი აზრი თავში არ ებადება: არც წარსული, არც აწმყო იმისთვის არ არსებობს და არც რამ ახსოვს...

რად?..

არ იცის. პასუხის მოცება არ შეუძლიან. ან-კი როგორ მოგცემს პასუხს, როდესაც გონება დაჩლუნგებული, დადუნებული აქვს?!

გრძნობს მხოლოდ ერთს: სხეული, გონება, გული, სული მოდამლავებული აქვს და...

— ღმერთო, ღმერთო!.. ერთი წვეთი მაინც!.. ერთად-ერთი წვეთი! — მთელი სხეულის მოკუმშვით წამოიძახა თეკლემ და მდუღარება გადმოხეთქა.

გონება გადაეწმინდა და სხეულიც მოძრაობაში მოუვიდა. ეხლა-კი შეუძლიან პასუხის მოცემა. „ერთი წვეთი მაინც!“ — აი, პასუხი.

„ერთი წვეთი მაინც“ თანაგრძნობისა რომ იყოს, მაშინ თეკლეს სული და სხეული გადიშლებოდა, აღფრთოვანდებოდა და...

— კიკო, კიკო, ნუ-თუ ჩემს შეცდომას
არ მაპატივებ?! — ლოგინში წამოჯდა და, თით-
ქოს წინ უდგას ვინმეო, ისე შეევედრა.

მოაგონდა წინანდელი ღამე. მოაგონდა,
როგორ ივახშია კიკოსთან ერთად „პურ-ლვი-
ნოში“ და იგრძნო კიდევაც, რომ ის, თუმცა
ბოლოს დროს ეხვევოდა, ეალერსებოდა, გულ-
წრფელი არ იყო.

— იქნება მართლა კიკომ მაპატივა და ისევ
დაუბრუნდა ჩემი სიყვარული?! — წამოიძახა და
ზარი დაურეკა მოსამსახურე გოგოს.

— რა გნებავს, ქალბატონო?!.

რისთვის დაურეკა ზარი, რისთვის დაუბა-
ხა გოგოს?! არ იცოდა. დაიბნა მოსამსახურის
კითხვაზე.

— რა მნებავს?! რა ვიცი, რა მნებავს?!.
ჰო, მართლა, არჩილი შინ არის?!.

— არა. წუხელის არ მოსულა.

— წუხელის არ მოსულა... ჰო... მართლა,
რა დროა?

— ათი საათი გახლავსთ.

— ეხლა-კი მომაგონდა, რისთვის დაგიძახე:
წერილი ხომ არავის მოუტანია?! — დაეკითხა
თეკლე და ლოგინიდან იატაკზე ჩამოვიდა.

— როგორ არა, ქალბატონო, ვიღაც ბი-

ჭმა მოიტანა და სთქვა: ქალბატონ კნეინას გარდაეციო...

— მოიტა ჩქარა, ჩქარა!.. — დაბნევით უთხრა და თითქმის კისრის კვრით გააბრუნა მოსამსახურე გოგო...

— კიკოსაგან იქნება, კიკოსაგან!.. წუხელის მითხრა: მერე, მერეო. ღმერთო, რას მომწერდა?!.. იქნება დაუბრუნდა უწინდებური სიყვარული და... ღმერთო, ღმერთო!.. ვუყვარვარ ისევ კიკოს, მე იმისი ვიქნები და ის კიდევ ჩემი!.. — ნაწყვეტად გაიძახოდა და ოთახში პერანგა, ფეხ-შიშველა დარბოდა... — ოხ, რა ბედნიერი ვიქნები!..

— აი!.. — შემოიტანა ამ დროს მოსამსახურე გოგომ წერილი და გაუწოდა...

— კარგი, წალი!.. — კონვერტი გამოგლივა ხელიდან და გოგო დაითხოვა.

,ჩემო თეკლე, — დაიწყო წერილის კითხვა ტანის კანკალით: — მე ჩავუკვირდი ჩემ თავს, ჩემ გრძნობას და, ვფიცავ ზეცას, მთელ ღამეს არა მძინებია. სულ ჩემ გულს ვუკვირდებოდი. მინდოდა, წამიერი გულისთქმა ძლიერ გრძნობად გარდამექმნა, რომ შენს უკანასკნელ კითხვაზე „ჰო, შენი ვარ სამუდამოდ“ მეთქვა, მაგრამ...

„დაივიწყე, ჩემო თეკლე, ყველაფერი,
რაც ჩვენ შორის...“

თვალთ აუქრელდა, თითები მოუდუნდა,
და წერილი ხელიდან გავარდა.

— ჩემი წერილი... რაც მე მივწერე... კიკო,
კიკო! — კვნესით წამოიძახა და ორსავე მხარეს
ჩამოშლილ გიშრისფერ ხშირ-ხუჭუჭა თმას, რაც
ძალი და ლონე პქონდა, დაეჯაჯგურა.

— დუდუკის ხმა!... ეტლი ჩვენ კარებთან
შედგა!.. ვინ... ზარის ხმაც! — ნაწყვეტად გაი-
იძახდა თეკლე, როდესაც დუდუკის ხმა შემო-
ესმა და რამდენიმე ეტლი იმათ კარებთან შე-
დგა.

სარჯმლიდან უნდოდა გადაეხედნა, მაგრამ
ამ დროს შემოესმა კიბეებიდან ფეხის ხმა და
„ჩაპბერე, კიკლი, ჩაპბერე“-ს ძახილი და...

— არჩილი, არჩილი! — წამიოძახა და სასო-
წარკვეთილი იქვე ჩაეხვია.

— ლეკური, ლეკური! — დაიღრიალა არ-
ჩილმა, როდესაც ბრახა-ბრუხით, კარების შე-
მოჯახუნებით შემოვიდა ზალაში, და თითონ-კი
თეკლეს ოთახისკენ წამოვიდა.

მედუდუკეთ ლეკური გააჩაღეს. არჩილმა-
კი ორივე ხელი თეკლეს ოთახის კარებს ზედ-
მიწყვეტით მაგრა ჰკრა.

კარის ორივე ნახევარი უეცრად შეიღო და..

— არჩილ! — შეპყვირა ზიზღით, ფეხზე წა-
მოჭრით თეკლემ, როდესაც კარებში გალეშილი
არჩილი გამოეცხადა, და გაქცევა დააპირა.

— ოხ, ჩემი თეკლე, ჯერ არ ჩაგიცვამს?!
ჰა?! ოხ, რა მშვენიერი ფეხები გქონია! — ნერწყვ-
მორეულმა წამოიძახა და ხელი წაატანა თეკლეს
ფეხს. დაკუზვის დროს პირქვე დაეცა, მაგრამ
ფეხში მაინც სწვდა და მაგრა დაიჭირა.

— არჩილ, რას შვრები! — შეუტია და მაგ-
რა გამოსწია ფეხს, მაგრამ ვერას გახდა.

მდუღარე გადაესხა, დაიფუფქა. უნდოდა,
იატაკი ჩანგრეულიყო და შიგ ჩავარდნილიყო,
რომ სხვას მაინც არ დაენახა ეს სურათი, მაგ-
რამ იმისი სურვილი არ ასრულდა: იატაკი არ
გასქდა, არ ჩაინგრა და არჩილის ამქრებიც
ლრეჭით შემოიცეირებოდნენ. არჩილი-კი ენა-
დაბნევით გაიძახდა: რა ფეხებია, რა ფეხებია
და ლოშნიდა თეკლეს ფეხს.


კიდევ შეეცადა ფეხის წართმევას, გამოს-
წია ფეხს, მაგრამ ლონე-მიხდილი იქვე სავარ-
დელს მიესვენა...

— სულ ერთია!... — ამოკვნესით წამოიძა-
ხა და ჭირისოფლი შუბლიდან ხელის გადას-
მით გადაიწმინდა.

ეხლა სულ-ერთი იყო იმისთვის. ესე პე-
რანგაც რომ გამოეტანათ შეუადრესი და ეთრი-
ათ, ამასაც გულ-გრილად, უგრძნობლად გა-
დაიტანდა.

9 მაისი—97 წ.

საღ. ვაზიანი.



„ ე ჰ ! ..“

(სურათი)

აღარა ახსოვს-რა გეგესა. გაშმაგებული გა-
 მორბის ტყიდან პირდაპირ ვენახისკენ. თი-
 თქოს თავის იქ ყოფნით კალთას გადააფარებდა
 და თავს ააცდენდა განადგურებას...

კივის მიდამო. დედამიწა შეძრწუნდა. კვნე-
 სა, ტირილი, ხარხარი მიდამოსი აირია. თავზარ-
 დამცემი გრგვინვა-ლა მოისმის. გეგე მაინც გარ-
 ბის. ჩოხის ძველა შემოუკალთავებია, ფეხ-ში-
 შველა, დახვრეტილ შავ პაჭიჭებუ, მთლად გა-
 ხუნზლული, ოდნავ წელში მოხრილი მირბის.
 მას არა ეყურება-რა. შეჭალარავებულ თმასა და
 წვერ-ულვაშებიდან წყვილი მისი თვალი გამოა-
 კვესებს, და მხოლოდ ერთი სურვილის ამოკი-
 თხვა-ლა შეგიძლიანთ: დროით, დროით მივი-
 დეს თავის ვენახთან...

უეცარი გრიგალი უეცრდავე მოისპო. დამ-
 შვიდდა მიდამო. ოდნავ ფოთლის შრიალი-ლა
 მოისმოდა და მცენარეებიდან ჩამონადენი წვე-
 თების წკაპა-წკუპი...

სწორედ ამ დროს მიირბინა თავის ვენახთან. მარგილის თავს ხელი წაავლო და ფეხი შეაღერა გადასახტომად, მაგრამ სხეული სულ მოუდუნდა და ქარაფა ძეძვის ლობეს მოწყვეტით გულით მიეყრდო. ორივე ხელით დაყრდობილი, პირ-გამშრალი გადასცეროდა თავის ვენახს და ერთ-წამს მოსაზრება შეუდგა...

სჩველეტავდა-ლა ქარაფი?! არა გრძნობდა. მის თვალშინ გადაშლილმა სურათმა შებოჭა გრძნობა და მოსაზრება მისი... მხოლოდ სარები (ჭიგოები), მხოლოდ სარები და გაროკილი ხეები-ლა იყო ვენახში. დანარჩენი ყოველივე: ვაზი, ხის ტოტები ფოთლითურთ, სეტყვის კაკლები ერთმანეთში იყო ალუფხული და აქაიქა მოგროვილი! ბალახიც-კი განადგურებულიყო, თორემ სხვას ხომ სიკეთე არ დაჰყრია...

„ვაიმე, ვაიმე!..“ — ტუჩების ოდნავ ცმაცუნით მოსისინებდა მისი ხმა. მეტის თქმა აღარ შეეძლო. ყოველივე ამ უნებლივ ამოკვნესაში იხატებოდა.

ვენახი იყო მისი მასაზრდოვებელი. ყოველი მცენარე, ბალახიც-კი ნაცნობი იყო, ყოველივეზე დიდი ამაგი ჰქონდა. მას უვლიდა, თავს ევლებოდა და იმისგანვე ცხოვრებას მოელოდა. მთელი წლის სარჩოს ვენახი აძლევდა.

მტერსაც, მოყვარესაც ვენახი უსტუმრებდა.
ეხლა?!


გზირი, მამასახლისი, მეველე, მენახირე,
მეჯოგე, ჩაფრები, ბოქაული, მღვდელი, რო-
მელთაც აკმაყოფილებდა ამ ვენახის შემოსავ-
ლით, მის თვალწინ აირივნენ. ეხლა ჩარეგვი-
ლი ვენახი-კი არაა გადაშლილი, იგინი ირევიან.
ცხადად ხედავს იმათ მრისხანე სახეებს, იმათ მო-
ძრაობას, სახრეებს, მათრახებს, იმათი ხმა მკა-
ფიოდ მოესმის... ოხ, ოხ, რამდენი ლანძლვა,
გინება, დამცირება... ღმერთო!..

აგერ, მისი დაწიოკებული ცოლ-შვილი თავ-
ზარ-დაცემული მას შესცქერის და იმისგან მოე-
ლის შველას, მაგრამ...

ისევ ვენახი გადაეჭიმა. ისევ მხოლოდ გა-
როკილი ხეები და სარები დაინახა და სასოწარ-
კვეთილებით წამოიძახა:

— ღმერთო!.. — და ზეცას მიაპყრო მორ-
ლვეული თვალები. მხოლოდ ღვთისგან-ლა ელო-
და შველას. სასოებით მას მიმართა და...

სწორედ ამ დროს დაგლეჯილი ღრუბლე-
ბიდან მზემ ღრეჯით გამოუჭყვიტინა. მწუხარე
გეგეს მზე მხიარულიად მიეგება, და ამ გარე-
მოებამ იგი სულ დაამცირა. ზეციდან-ლა მოე-
ლოდა თანაგრძნობას და ზეცამაც იგი მასხარად



აიგდო. მთლად განადგურებული, ისე, როგორც
მისი ვენახი, იქავე უნუგეშოდ ჩაეხვია და ლო-
ბის ძირას მიგროვილ სეტყვის კაკლების გროვას
მიესვენა.

მზის ლრეჯაზე დედამიწამაც ლრეჯა დაი-
წყო: იქა-იქ გუბეები, სეტყვის კაკლების გროვა
ბჟყვრიალებდა, თვალს უჭრიდა თვალთა მქონეთ.
ფერდობებიდან კიდევ ნიალვრის წყალი ტკბი-
ლად, თითქოს რამდენიმე წუთის წინად არავი-
თარი ვნება არავის მისდგომიაო, ჩამოჩერიალე-
ბდა და მოელვარებდა...

— ეპ!...—ამ სურათმა უნებურად ხელის
ჩაქნევით გულის სილრმიდან ამოათქმევინა.

რას მოასწავებდა მისი „ეპ!“, რომ გეკი-
თხათ, ვერ აგიხსნიდათ. იგი განრისხებული
სწრაფლ წამოდგა და საჩქაროდ თავის გარეგვილ
ვენახს მოშორდა...



„ბედნიერება მზოღოდ მაშინ ვიგრძენ!..“

I

...—იცი, ჩემო მეგობარო, — დაიწყო
 ერასტიმ, როდესაც ჩვენ შემთხვევით შევხვდით
 კარგა ხნის უნახავები და ერთმანეთს ავ-კარგი
 გამოვკითხეთ:—ბევრჯერ, ძალიან ბევრჯერ უთ-
 ქვამთ ჩემ მშობლებს და ნათესავებს, სხვებსაც:
 ლმერთმა გაგაბედნიეროსო, და მეც გულში
 მსიამოვნებია... ბევრჯერ, ძალიან ბევრჯერ სმის
 დროს სავსე ჭიქით მოუმართავთ ჩემთვის და
 უთქვამთ, შენც-კი რამდენჯერმე გითქვამს: შენ
 საბედოს გაუმარჯოსო... გამხარებია და გუ-
 ლის ფანცქალით ოვალ-ყური მიდევნებია: ვინ
 გამოსცლიდა სავსე ჭიქას ამ საღლეგრძელოს
 დროს და ვინ არა. რა სიამოვნებით გიახლე-
 ბოდი სამაღლობელს მის მაგივრად!.. გაბედ-
 ნიერება ჩვენში, ხომ იცი, რასაც მოასწავებს?!
 მეც ასევე მეგონა. მოუთმენლად ველოდი,
 როდის იჩენდა თავს ჩემი საბედო, რომ გავბედ-
 ნიერებულვიყავ. აკი ერთხელ, ამ სამი წლის
 წინად შევხვდი ერთს ასულს, რომელიც პირ-
 ველ, გაცნობაზედვე თვალში მომივიდა. ერთი

ორჯერ კიდევ ვნახე და უფრო მომეწონა. მო-
წონება სარჩულად სიყვარულის ედება ხოლმე,
და მეც ასე დამემართა. მშვიდი, წყნარი, გულ-
კეთილი და ამასთან მარილიანიც, კაცი ვერ იტ-
ყოდა, გასაგიუებელი სილამაზისააო, და ვერც
წინააღმდეგს, ესე იგი, ულამაზოაო. მოკლედ
რომ გითხრა, ჩვენი დროის სილამაზისა იყო.
მაგრამ გარეგნობას ვინ აქცევდა ყურადღებას?..
სული, სული და სული!.. აი, ჩემო ელიზბარ,
რამ წარმიტაცა. კრავი იყო, კრავი...

„...ასაკში მოსულმა, საცოლედ ყელ-მო-
ლერებულმა უსიტყვოდ წამოვიძახე: აი, ჩემი
საბედო-მეთქი, და საბედო ბედათაც გადავაქ-
ციე. ჩქარა მისი მშობლები გავიცანი და ჩქა-
რაც ყოველივე ჩემი გარდაწყვეტილება მათ გა-
ვაგებინე. უფრო ჩქარა მე და ჩემი ელისაბედი
დაცოლქმარებულნი ამავე დღეს ჩემ მამა-პაპეულ
მამულში გავემგზავრეთ...

„...ქ. ქუთაისში რომ ვყოფილვიყავ და
იქაური ქალი მეთხოვა, ჯვარის დაწერამდის
უკვე ყველაფერი მეცოდინებოდა უსახელო
წერილებით ჩემი მიჯნურის შესახებ. მაგრამ,
ჩემდა საუბედუროდ, ყოველივე ეს ტფილისში
მოხდა და მეც სწორედ ტფილისისებურად ფი-
ლოსოფიურად ხელი ჩავიქნიე და ორც-კი ვა-

გრძნობინე, თუ ყოველივე შევიტყე. „იქნება უმსგავსის, საზიზღარი არსების მსხვერპლია და, ნუ თუ, მე,—ვფიქრობდი მაშინ,—ამისთვის უსაბედო მსხვერპლს ხელი უნდა ვკრა?..“ არც ის ჩაეთვლება დანაშაულად, რომ ჯვრის წერამდის არა მითხრა-რა, რადგანაც ჩემი ელისაბედი მეტის-მეტად კდემით მოსილია და ვერ გამიბედავდა-მეთქი... მაგრამ, წარმოიდგინე, ჩემო ელიზბარ, ამ ჩემ ფილოსოფიურ ხელის ჩაქნევას არა ფილოსოფიური შედევი მოჰყვა...“

„მე ხომ არაფერი ვაგრძნობინე, სამაგიეროდ ალერსს უფრო ვუმატე, მაგრამ ჩემი ელისაბედი; ეს კრავი, წყნარი და მშვიდი ზღარბად გარდაიქცა: რამდენადაც ალერსს ვუმატებდი, ის უფრო ეკალს უშვებდა და მაშინებდა მასთან მიახლოვება...“

II

„... ჩემო ელიზბარ, ნურას დროს ნუ გეგონება, ვითომც გასათხოვარი ქალის ხასიათი გაიგე. ქალის ხასიათს მხოლოდ მაშინ გაიგებ, როდესაც ცოლად შეირთავ. მეც მეგონა, ელილისაბედს კარგად ვიცნობ-მეთქი, მაგრამ, როდესაც მასთან სამუდამო კავშირით შევერთდი, მხოლოდ მაშინ ვიცანი ნამდვილი ელისაბედი,

მხოლოდ მაშინ შევიტყე, რაც იყო ნამდვილად ელისაბედი, რა ხასიათების პატრონიც იგი იყო...

„დღე დღეს მისდევდა, კვირა კვირას და მე და ელისაბედი კიდევ ერთმანეთში სიძულვილს ვუმატებდით. მაგრამ, არა, არა!.. მხოლოდ ელისაბედი უმატებდა. ძმობას გეფიცები, ელიზბარ, ჩემ მხრით არავითარი მიზეზი არ იყო, რომ ელისაბედი ისე მომქცეოდა. რა ვიცი, თუ ალექსი და სიყვარული სიძულვილს დაბადებს, მაშინ მეც დამნაშავე ვყოფილვარ! მეტი დანაშაული იმის წინაშე არა მიმიძლვის-რა. ნეტავი ეთქვა ჩემთვის, რა მიზეზით შემიძულა პირველი დღიდანვე და, ვფიცავ ყოველსავე სიწმიდეს, თუ-კი რაიმე სიწმიდე არსებობს კაცობრიობაში, მე მყისვე, თუ-კი ჩემ ხელთ იქნებოდა, მოვსპობდი. მაგრამ მე ჩემი ვქმენ და იმან თავისი და არ მითხრა ყოველ ჩემ კითხვაზე, თუ რაა მიზეზი, რომ მაგრე მექცეოდა. ის მოკლედ მიპასუხებდა: თავიდან მომშორდი! რას ჩამციებიხარო. რა უნდა მეთქვა?! მეც გაჩუმებული, გულჩაწყვეტილი ვშორდებოდი და სასოწარკვეთილი... მეგობარო, მაშინ უნდა გენახე, რომ ჩემი მწუხარება ამოგეკითხნა, შემომეჩივლა შენთვის. ეხლა-კი იმდენად არც ენა მიჭრის და, თუნდაც ენა მიჭრიდეს, აღარც ის

გრძნობა ექნება, რომ მოგიყვე. წარსული ვაება ყოველთვის ცოტათი გაქარწყლებულია ხოლმე შემდეგში. ამისთვის წარსული ჩემი ტანჯვის აღწერით არ შეგაწუხებ... მაგრამ, ჩემო ელიზარ, იქნება ჩემი მოთხრობით თავი შეგაწყინე?!

— უეცრად შესწყვიტა სიტყვა და საშინალად მოწყენილი სახით დამეკითხა.

— ერასტი, თუ მაგრე გვინდია, შეწყვიტე შენი მოთხრობა!.. — გულწრფელად ვუპასუხე ერასტის.

მე და ერასტი ერთად შევიზარდენით ბავშვობიდანვე, თითქმის ერთადვე დავამთავრეთ სწავლა უცხოეთში და ამ დროს განმავლობაში ყოველთვის მეგობრებად ვითვლებოდით. მხოლოდ სწავლის დამთავრების შემდეგ დავშორდით ერთმანეთს და ერთმანეთისა აღარა ვიცოდით-რა.

ესლა რამდენიმე წლის დაშორების შემდეგ შევხვდით და ნუთუ მე გულმოდგინეთ არ მოვისმენდი ჩემი ძველი მეგობრის თავ-გადასავალს?!

ეს შემატყო ერასტიმ და თითქმის ბოდიშის მოხდით განაგრძო:

— ჴო, იმას გეუბნებოდი: მთელი წელიწადი გავიდა ჩვენი დაქორწინების შემდეგ და მე მაინც ვერ შევიტყე მი-

ზეზი იმის სიძულვილისა. რაღა დამრჩენოდა?! დავმორჩილდი ჩემ ბედს და, ხშირად რომ თვალში არ წავჩხირებოდი და სიძულვილი უფრო არ გამემწვავებინა, ვარჩიე იშვიათად შევხვედროდი. გადავწყვიტე და კიდევაც ამ გადაწყვეტილების განხორციელებას შევუდექი: მთელი კვირაობით და ორ-კვირაობით თოფით ხელში ტყესა და ველს ვაძლევდი თავს. ნუდარ მკითხავ, რანაირი ცხოვრება მქონდა ნადირობის დროს?! არ დაიჯერებ, ელიზბარ, ორი წლის განმავლობაში არც ერთხელ თოფი არ მისროლია ნადირისათვის. სანადიროდ დავდიოდი და ნადირს-კი არ ვეძებდი, ელისაბედის განშორებას....

„კვირაში თუ ორ კვირაში ერთხელ ვბრუნდებოდი სახლში და....

„— ახ, მონადირეს გაუმარჯოს! ნანადირევისათვის ურემი გავგზავნოთ?! ——ზიზლით მომესალმებოდა ხოლმე ელისაბედი....

„მე ხმა გაკმენდილი შევდიოდი ჩემ ოთახში და თავ-რეტ-დასხმული ძალლივით მივეგდებოდი. ან-კი რა უნდა მეპასუხნა?! ეხლაც რომ დავუფიქრდები და ჩემ თავს ვეკითხები: „რა უნდა მეპასუხნა. იმისთვის,“ პასუხი ვერ მომიტებნია....



„სულ გადვიკარგებოდი სადმე, მაგრამ, ეს
ოხერი ჩვენი ცხოვრება, ჩვენი ჩვეულება მაყე-
ნებდა... თითონ მეც, მართალი გითხრა, არ
მინდოდა მამა-პაპის ოჯახის, ძველი ჩვენი ოჯა-
ხის სანთელი გამექრო. მხოლოდ ეს მაკავებდა,
და ნაღირობიდანაც კვირაში თუ ორ კვირაში
ერთი-ორი დღით ვბრუნდებოდი სახლში, რომ
ბიჭებისთვის რაიმე განკარგულება მიმეტა. ცხო-
ვრება საჭირო იყო...“

„ხომ იცი, ჩემო ელიზბარ, ყოველთვის წი-
ნააღმდეგი ვიყავი მოხელედ ყოფნისა. მეტის-
მეტ შეცდომად ვთვლიდი და ვთვლი, თუ-კი
ცოტაოდენი მამული ვისმე აქვს, მოხელედ შე-
ვიდეს. ამ აზრისა ვიყავი და კიდევაც ასე ვიქ-
ცევოდი. მამა-პაპათ დამიტოვეს კარგი მამული,
მომცეს შესაფერი სწავლა და ჩემ მხრით დიდი
ცოდვა იქნებოდა აქეთ-იქით მერბინა, არ მომე-
ვლო ამ მამა-პაპეულისთვის და ჩემი ცოდნა მო-
ძმესათვის. არ გამეზიარებინა. ვიმეორებ, მხო-
ლოდ ეს მიჭირდა და არ გადავიკარგე. ერთ
ლუკმა პურს ყველგან ვიშოვნიდი საზრდოდ.
მინდოდა პირ-ნათლად გამოვსულვიყავ ჩემ წინა-
პრეზიდენტ და ლირსეულად გადამეტა...“

ერასტი საშინლად დაიჭიმუხვნა. ეტყობოდა,
რაღაც მწარე აზრი, საშინლად მწვავი მოაგონ-

და. მე გაჩუმებული თვალს ვადევნებდი მის სახის ცვლილებას...

— ჰო, ჰო, გარდავცემდი და კიდევაც გარდავცემ.—ცოტათი სახე დამშვიდებულმა განაგრძო:—მაგრამ, ელიზბარ, ელიზბარ!...—თვალ-ცრემლიანი ერასტი ნიდაყვით მაგიდას დაეყრდო და განაგრძო:—კარგი რამ არის, ელიზბარ, როდესაც... პატარა არსება... შენი სისხლი და ხორცი... ჰო!...—თავი შეარხია, თითქოს აზრების დალაგება უნდაო, წელში გაიმართა და პირდაპირ მზერა დამიწყო.—სისულელეა ამაზე ფიქრი,—რამდენიმე წუთის სიჩუმის შემდეგ დაიწყო ერასტიმ:—მე იმასა ვწუხდი, რომ შვილი არა მყავდა. ვნატრობდი, რომ შვილი გვყოლოდა. იქნება მაშინ ელისაბედი სხვანაირად მოქცეულიყო, დამტკბობოდა...

„ყოველთვის სამწუხაროდ მიმაჩნდა და მიმაჩნია, როდესაც ახალგაზდა კვდება, ქალია ეგთუ კაცი, სულ ერთია, რომელმაც თავის მსგავსი ამ ქვეყნად არ დასტოვა. და არას დროს არ შემბრალებია და არც შემებრალება ის, გინდაც სულ ახალგაზდა იყოს, რომელსაც შვილი ეყოლა და თავის მაგიერი დასტოვა ამ ქვეყნად. თითქოს მაშინ ცხვრებას მეტი აზრი ეძლევა, ცხოვრება შენი, როგორც მამისა, მიზ-

ნიანდება... მაგრამ ამას ძალიან შორს მოვეკი-
დე და ამის გაყოლია ჩემს ამბავს გაუთავებელს
გახდის...

„ასე იყო, თუ ისე, მე ვერც შვილით გა-
ვიხარე, — დაიწყო ერასტიმ რამდენისამე წამის
სიჩუმის შემდეგ: — სამი წელიწადი ვიცხოვრე
იმასთან და, არ დაიჯერებ, სამჯერ რიგიანად,
ტკბილად არ შემოუხედნია. ნეტავი შენა, ელიზ-
ბარ, რომ ჯერ ცოლი არ შეგირთავს და...

— მოიცა, ბიძიავ, — სიტყვა გავაწყვეტინე, ცოტა არ იყოს, წყრომით: — შენი ელისაბედი ხორც-შესხმული ტარტაროზი ყოფილა და რატომ გვინდა, ყველა ქალი ელისაბედს ემსგავსება?! ელისაბედისთანა ქალები ძალიან იშვიათნი არიან და სწორედ მებრალები, რომ შენ შეგხვედრია ელისაბედი...

— ღმერთმა ნუ ქნას, ყველა ქალი ელი-
საბედს ემსგავსებოდეს!.. მაგრამ არც ისე ცო-
ტანი არიან, როგორც შენა გვინია.

— სწორედ შენი ელისაბედის თანას არ
შევხვედრივარ და არცა მგონია, შევხვდუ.

— აკი. წელანა ვთქვი: ქალის ხასიათებს
მხოლოდ ქმარი გაიცნობს-მეთქი. შენ ჯერ
ქმარი არა ყოფილხარ და ამისთვის...

— თუ მე ქმარი არ ვყოფილვარ, სხვები

ხომ არიან, სხვებს ვხედავ, როგორ ტკბილად
ცხოვრობენ.

— ეჭ, ჩემო ელიზბარ, ერთს-კი გეტუვი:
ყველა ქმარმა რომ ჩემსავით გულ-ახდით გიამ-
ბოს, იქნება ათასში ხუთიც არ იყოს ქმაყოფი-
ლი თავის მეუღლისა.

მინდოდა მეწინააღმდეგნა, მაგრამ თავი
შევიმაგრე, რადგანაც, ვშიშობდი, კამათი გაგ-
ვაბამს და ერასტი ელისაბედის შესახებ აღარას
მიამბობს...

III

— ხვალ,—ვფიქრობდი ველად გასული
სანადიროდ: — სამი წელიწადი შესრულდება,
რაც მე და ელისაბედი დავქორწილდით. ხვა-
ლინდელმა დღემ იქნება: გავლენა იქონიოს და
შემირიგდეს, თუმცა-კი მე არასდროს არ გავ-
წყრომივარ...

„გადავწყვიტე დილა ადრიანად სახლში
მისვლა, ელისაბედთან მხიარულად მისალმება
და ჩვენი ჯვრის-წერის დღის მოგონება...

„გადავსყვიტე და იმ წამს სახლისკენ გა-
მოვწიე.

„ჩვენი სახლის ახლო, სულ ხუთი ვერსის

მანძილზე, მშვენიერი მთიანი ტყეა. ძალიან მიყვარდა და მიყვარს კიდევაც ეს ტყე. იგია ჩემი ბავშვობის ბეღნიერი დღის მოწამე და დიდობის უბედურებისაც. ხშირად, ხშირად ტყის ბასისთვის შემიერთებია უმშიკვლო ბავშვური კისკასი და დიდობისას გულის კვნესა. სწორედ ამ ტყის პირას გადავწყვიტე ლამის თევა და დილით შინ დაბრუნება....

„ის იყო სულდგმულთ ხმაურობა მისწყდა და პირდაპირ მთის მწერვალიც ოდნავ გაშუქდა, რომ მე მივედი იმ ტყესთან და განაპირას მდგომის ას-წლოვანი ვერხვის ახლოს მწვანეზე, გულაღმა დავწექი. თოფი გვერდით მოვიდე, ხელები თავ-ქვეშ ამოვიწყე და ჩემი გონება პირდაპირ მთის მწვერვალმა, რომელსაც თანდათან შუქი ეპარებოდა, ჩანთქა.

„ნაზი სინათლე ცაში გაფანტულ ლრუბლებს მიეშუქა და ააფერადა, ოდნავ მბეჭუტავ აქა-იქ ვარსკვლავთ ბჟყვრიალება მოაკლდათ და ჩქარა, სულ ჩქარა სხივიერობა დაჳკარგეს, როდესაც მთის წვერიდან მძიმედ ამოცურდა მთვარე და დედოფლურის ლიმილით არემარეს თვალი გადაავლ-გადმოავლო, რამაც ყოველივე გააოცნება და ააფრთვანა, გარდა ვარსკვლავთა, რომელნიც შურის თვალით შორით უჭვრეტ-

დნენ... ტყე ოდნავ ახმაურდა დედოფლის გამოჩენაზე და მიესალმა. მეც დედოფლის მისალმებასთან ერთად ჩემს ელისაბედს მივესალმე; გული გადვუშალე და იმანაც სამაგიერო მომიწყო. ეს მისალმება დაედო ჩემ ოცნებას სარჩულად და მერე სად და როგორ მომევლო, რა ნეტარება გამოიარა, ამის ამოკითხვა შენთვის მომინდვია...

„კარგია ხოლმე ხანდისხან ოცნებით გატაცება. ყოველივე ისე მოძრაობს, როგორც შენ გინდა, გსურს, და წამს გვონია, ვითომ სინამდვილეა; ვითომ ყოველივე იმას ოცნება კი არ ამოქმედებს, ცხოვრების ჩარხი, და შენც სიამოვნების ოფლი გასველებს...

„ჩემმა გონებამაც შემოფარგლა დიდი, დიდი წრე; ბევრგან, და თითქმის ყველგანაც, ისე შეუხამა მოქმედებანი, რომ ყოველთვის მეგამარჯვებული დავრჩი, ყოველივე ჩემ სასიამოვნოდ მოეწყო და ბოლოს საიდანაც დაიწყო, ელისაბედი დამისკუპდა თვალწინ ყოველივე მისი ღირსებით, და მეც გონს მოვედი. უეცრად ელისაბედის მოგონებაზე ტანში ურუანტელმა დამირბინა და თვალი არემარეს მივავლ-მოვავლე, რომ გონებიდან არა სასიამოვნო სინამდვილე გამედევნა. არემარე ისევ ისე ფანტას-

ტიური იყო: მთები ტყით შემოსილნი, თითქოს ერთი-ერთმანეთისკენ მიივლტოდნენ სიყვარულით გადასახვევად და ღელეებში ჩახვეულნი ტკბილად, ტკბილად ეალერსებოდნენ ერთმანეთს. აგერ, თითქოს მათი ტკბილი ალერსი კიდევაც მოისმის, მეტის-მეტი ალელვებისაგან ხმა მისუსტებიათ და რდნავ ძლივს-ლა სისინობენ...

„დედოფალი?!

„დედოფალი კიდევ ცის შუა გულიდან დაჰყურებს და აცხოველებს მათ სიყვარულს; იგი თავის სხივებთან ერთად აწვეთებს სიყვარულს, რომ არემარე მთლიად სიყვარულად გარდაქმნას, და მეც, უბალრუკს, მომხვდა რამდენიმე წვეთი დედოფლისა და, ვაი, ცრემლიად გადმოვატრქვიე...

„მივიხედ-მოვიხედე და მარტოდ ვიგრძენ თავი. გეყურება, ელიზბარ, მარტოდ-მეთქი?! და ამ გარემოებამ ამიჩუყა გული. ჯერ ჩქარი სუნთქვა ამივარდა, მერე სულ შემიდგა სუნქვა, და, როდესაც სუნთქვა დავიწყე, სუნთქვასთან ერთად ცრემლი გადმომსკდა ნაკადულად...

„მაგრამ გონებამ ელისაბედი თავისი მკაცრი სახით ისევ წინ წამომიყენა და უეცრად ცრემლი გამიშრა. ვუმზერდი ეხლა ელისაბედს.

თანდათან მისი მკაცრი სახე იფერებოდა; იგი ჩქარა დაიფერა და ვითა ეთერი თავს მევლებოდა. მეც გული მომეწმინდა. სიმწვავე, რომელმაც ცრემლი მაღინა, გამიქარწყლდა და ეთერთან ერთად ნავარდობა დავიწყე…

IV

„ღმერთო ჩემო! — წამოვიძახე გონება და-
ბნევით, როდესაც პირდაპირ მთის მწვერვალს
თვალი მოვკარ, რომელსაც თანდათან შუქი
ეპარებოდა: — მე კარგად მახსოვს ეს სურათი! —
ვიძახდი უსიტყვოდ: — ნუ-თუ ჯერ... მაგრამ
მთვარე ცის შუა გულში ვნახე და... აგერ ნაგ-
ლეჯი ღრუბლებიც! ... ეგენიც.. — წამოვჯეჭ და
თვალი მივავლ-მოვავლე.

„შემომესმა ტყიდან განუწყვეტლივი დია-
დი ჟივილი ფრინველთა. მხოლოდ ამ ხმამ გა-
მომარკვია, რომ უკვე თენდებოდა, და ჩემგნით
ნანახი სურათი — მთვარის ამოსვლა — სინამდვილე
იყო. ეხლა-კი დიდებული ცის მნათობი ამო-
დიოდა... ხელმეორედ მივავლ-მოვავლე თვალი
ცას და ვიგრძენ განსხვავება ფერებისა, რომლი-
თაც დიდებული მნათობი აყვავებდა არემარეს.

„მე ჩამძინებოდა და ეს ამისთვის დამე-

მართა. მაგრამ, ელიზბარ, მკონი შენ კიდევაც
მოიწყინე?!—უეცრად დამეკითხა ერასტი და
ისევ, არც-კი მაცალა ხმის ამოლება, თითონ
განაგრძო:—ახლა ჩქარა მოვრჩები ჩემ ამბავს.
ბარემ სულ დავათავებ, რაკი დავიწყე...

— თუ ძმა ხარ, ნუ შეამოკლებ, ყველა-
ფერი დაწვრილებით მიამბე! — შევევედრე მე.

— რაც უნდა ძალიან გავაჭიანურო, ჩქა-
რა მოელება ამ ამბავს ბოლო...

„ჰა!...—რამდენიმე წუთის სიჩუმის შემ-
დეგ დაიწყო ერასტიმ:—იმას ვამბობდი: რაწამს
გამოვერკვიე, ისიც მომაგონდა, რა განზრახვი-
თაც დავუახლოვდი ჩემ სახლს, და მაშინვე
შინისკენ გავემგზავრე...“

„სოფელში რომ შევედი და მეზობელი გლე-
ხები საღამს მაძლევდნენ, ცოტა არ იყოს, მათ-
მა ლიმილმა შემაფიქრიანა და ჩემ იმედებს
ცოტათი ფრთხები შეაკვეცა... მივედი სახლში.
მოჯამაგირეები და დედაკაციც იმავე ლიმილით
დამხვდნენ. მე ვითომ მათ ლიმილს არ ვამჩნევ,
პირდაპირ ჩემი ოთახისკენ წავედი. ელისაბედის
ამ დროს შეხვედრას არ მოველოდი, რადგანაც
იგი გვიან ილვიძებდა. ამისთვის გადავწყვიტე:
როდესაც გოგოს დაუძახებს, მეც მაშინ შევალ-
მეთქი და....

,,შევეღი ჩემ ოთახში. ოთახი, როგორც
 დავტოვე, ისე დამხვდა. მაგიდას მოვუჯექ და
 უეცრად იქ აყუდებულ წერილს თვალი მოვ-
 კარ...“

,,ხშირად მოსულა წერილები ჩემ შინ არ
 ყოფნის დროს, მაგრამ ეგრე არ დამხვედრია.

,,წერილები ყოველთვის მარჯვნივ ეწყო
 ხოლმე და ასე აყუდებული კი არას დროს
 არ დამხვედრია თვალში წასაჩეირავად. მაშინვე
 იმ წერილს თავი გადვუხიე ხელების კანკალით
 და გადაშლის უმალ ჩემი სახელი ამოვიკითხე:

„ერასტი! — ასე იწყებოდა წერილი, — მე შენი
 საქციელის გაძლება აღარ შემიძლიან...“

,,ხელები უფრო ამიკანკალდა ბრაზისა-
 გან... ჩემდა უნებურად წერილი დავსრისე,
 დავსრისე და მინდოდა სარკმლიდან მესროლნა,
 მაგრამ თავი შევიმაგრე. ცნობის მოყვარეობა ალ-
 მეძრა. მინდოდა შემეტყო, ჩემი ელისაბედი კი-
 დევ რას მომწერდა, რომ მომზადებული დავხვე-
 დროდი, როდესაც იგი თავის ოთახიდან გამო-
 ვიდოდა. წერილი ისევ გავშალე, ნაოჭები გავუს-
 წორე და კითხვა დავიწყე:

„შენ ხელში ერთი დღე კარგი არ მინახავს.
 მომეწყინა ამდენი ტანჯვა და ამისთვის ვარჩიე
 მოგშორებოდი...“

„ჩემ თვალებს არ ვუჯერებდი. ეს სიტყვები კიდევ, კიდევ და კიდევ გადავიკითხე. ღმერთო, ღმერთო!.. ნუ-თუ ელისაბედი მომშორდა?! გავიძახდი ხმა-მაღლა და ოთახში დაწრბოდი.

„წერილი კიდევ გადავშალე და თავიდან ბოლომდის ჩავიკითხე. წერილის ბოლოს მწერდა:

„ერთი ეს თხოვნა მაინც ამისრულე და გამომიგზავნე ნება თავისუფლად ცხოვრებისა ამ აღრესით: ქ. №...“

„უთუოდ მემასხრება-მეთქი,—გავითიქრე და მაშინვე ელისაბედის ოთახისკენ გავექანე. კარი ყუნწამდის გაღებული დამხვდა. იქაურობა აწეწილ-დაწეწილი იყო, საჩქაროდ გამოვბრუნდი, ახლა სხვა ოთახებში ძებნა დავუწყე. უეცრად გოგო წინ შემეფეთა...

„— სოფო, ქალბატონი სად არის? — ქაქანით დავეკითხე და მკლავი მაგრა დავუჭირე.

„— რა მოგახსენო, ერთი კვირაა, რაც სადღაც წაბრძანდა. — გულ-მტკიცნეულობით მიპასუხა გოგომ.

„— არა სტყუი?!.

„— ზიარების მაღლმა, მართალს მოგახსენებ!

„— მაშ წავიდა, წავიდა?! — ატაცებით ჩავე-

კითხე სოფოს და პასუხი აღარ ვაცალე, მაშინ-
ვე გარედ გამოვვარდი.

„— ბიჭო, ალექსი, ცხენი დროით მომიმ-
ზადე! — გადავჭიროლე და მოუთმენლად ველო-
დი ცხენის მომზადებას.

„ამ ლოდინის დროს იქავე სახლის კუთ-
ხიდან ოდნავი ტუტუნი შემომესმა. მორიდებით
გავიხედე იქით და დავინახე, სოფოს გარს შე-
მოხვევოდნენ სოფლის დედაკაცები და გაფა-
ციცებით უსმენდნენ. რასაკვირველია, სალა-
პარაკოდ მე ვეყოლებოდი და ამისთვის ყუ-
რი არ ვათხოვე...

„უეცრად ცნობის-მოყვარეობამ შემიპყრო
და სოფო მოვიხმე.

„— შენ აქ იყავ, როდესაც ქალბატონი
წავიდა?

„— აქ გახლდით, ბატონო!

„— მაშ გეცოდინება, მარტოკა წავიდა, თუ
ერთად ვისთანმე?!

„— აქედან მარტოკა წავიდა და მერე
კი არ ვიცი....

„— კარგი.

„შეკაზმული ცხენიც მოიყვანეს, საჩქაროდ
მოვახტი ცხენს და სწორედ კარგ დროს მივე-
დი სამაზრო ქალაქ № — ში. მაზრის სამმართვე-


ლოში მოხელენი ჯერ ისევ იქ იყვნენ. საჩქაროდ, მიცნობდნენ, დამიმზადეს სამუდამოდ საკუთრად ცხოვრების, სადაც-კი ენება, საბუთები, და მაშინვე ფოსტაში გავაჭანე...

,,როდესაც ელისაბედთან გასაგზავნი საბუთები ჩავაბარე ფოსტაში, ბეღნიერება მხოლოდ მაშინ ვიგრძენ. ერთი ეს-ლა აჩრდილება, ჩემო ელიზბარ, ჩემ ბეღნიერებას, კიდევ არ დამიბრუნდეს ელისაბედი...

გაჩუმდა ერასტი. მეც გაჩუმებული ძირს ჩავიცემირებოდი და არ ვიცოდი, სიჩუმე რანაირად დამერლვია. სწორედ ამ დროს, ჩემ გასახარად, ჩემი მეგობარი ვახუშტი თავს წამოგვადგა და მხარზე ხელის დარტყმით ჩამომძახა:

— ცხვირი რა ძირს ჩაგიკიდნია, კაცო, ქვეყნის ვალები ხომ შენ არ დაგაკისრეს?!

— ააა, ვახუშტი, ასე უეცრად საიდან გაჩნდი? — დავეკითხე მე და შემდეგ სულ სხვა საგანზე დავიწყე ბაასი...



თრი მკურნალი

დღეს თხუთმეტია აპრილისა. თხუთმეტი
დღე-ლა დარჩა, თხუთმეტი! მერე მაისი... ოხ,
რა ცოტა დრო-ლა დარჩა!.. თხუთმეტი დღე-
ლა უძევს წინ. მერე-კი... „თუ ნიკაში არ წა-
ხვედი, მაისს ვეღარ დაესწრები.“ ხომ ასე
უთხრა შალვას მკურნალმა?! და, აი, ეს წყე-
ული სიტყვები მოსვენებას აღარ აძლევენ. მა-
გრად, მაგრად ჩაჰსმიან თავში შალვას და ნე-
ლა, ნელ-ნელა ტვინს უღრნიან. გულის სიღ-
რმემდისაც სწვდება ეს ღრღნა. იქაც სიმწვავით
ულიზიანებენ, საშინელის სიმწვავით! ახ, რა
რა ძნელია!.. დღე-მუდამ ეს ერთი წინადაღე-
ბა უჩუჩუნებს თავში. თითქოს ამის მეტს ად-
გილი აღარასა აქვსო. ეს მესამე თვეა, რაც
მკურნალმა უთხრა და მას შემდეგ, ჯერ მესამე
დღე-კი არა, მესამე წამი არ გასულა, რომ ამ
სიტყვების ადგილი სხვა სიტყვებს დაეჭიროს...

„თუ ნიკაში არ წახვედი, მაისს ვეღარ
დაესწრები.“ ცოცხლად ხედავს მკურნალს, და
ეს წყეული სიტყვები ყურში ნელა ეწვეთება.

მაშინვე ელდა ეცა. არსება მოუშხამა და მოშხამული არსებით ნიცას მაგივრად თავის სოფლისკენ, თავის დედისკენ, მოხუცებული დედისკენ გამოეშურა. ხმის ამოუღებლად მოსვლის უმაღლ სარკმლის გვერდით ლოგინი გაიშალა და...

„თუ ნიცაში არ წახვედი, მაისს ვეღარ დაესწრები.“ ეწვეთეთ, ეწვეთეთ!.. მშვენივრად მოქმედებს თქვენი ძალა: ყოველ დღე სიცოცხლე აკლდება. რა იყო წინად, ამ სამი თვის წინად, ვიდრე წვეთობლივ დაიწყებდა თქვენი შხამის მიღებას?!

მაშინ კიდევაც დადიოდა, ფერიც კარგი ჰქონდა, მხიარულებდა კიდეც...

ეხლა?..

ჩამომხმარი, ტანში ჩარჩეული-ლაა საბანში გახვეული. მორლვეული, მუდამ ნალველით სავსე თვალები და ოდნავი სუნთქვა-ლა ამხელენ, რომ კიდევ ცოცხალია, თორემ სხვა არაფერი. ხომ მოძრაობა, სიმხიარულე მაშინვე მოესპო?! ხომ ლაპარაკის თავიც აღარა აქვს და მოხუცებული დედის კითხვებსა და ქვითინზე ხომ მარტო თვალის მოხუჭვით უპასუხებს ხოლმე?! აგერ, ეხლაც დედა ოდნავ ქვითინებს, ცდილობს ქვითინი შეიმაგროს და თავის შალვას, ერთად-ერთ ნუგეშს, არ გაავონოს, მაგრამ რა დედის გულმა

მოითმინოს და არ იქვითინოს, როდესაც ერთად-ერთი შვილი იმის თვალისწინ სანთელივით დნებოდეს და მთლად დაღნობას ყოველ დღე მოელოდეს?!

ეყურება შალვას დედის ქვითინი. გულს უკლავს ისეც მომაკვდავს. უნდა უთხრას: „დედი, ნუ სტირი, მე არ მოვკვდები!“ მაგრამ როგორ უთხრას, როდესაც ის წყეული სიტყვები ტვინს უღრღნიან, როდესაც სწამს, რომ მაისს ვერ დაესწრება, და მაისამდის ხომ სულ თხუთმეტი დღე-ლაა?! ჩვეულებისამებრ ყურებზე მოიხვია საბანი. არ უნდა დედის ქვითინი გაიგონოს. თვალებს-კი სარკმელს არ აშორებს. დღე-მუდამ ასე იყურება გარედ, განთიადიდან დაღამებამდის. რაც-კი მის სარკმლის ახლო ცვლილება ხდება ბუნებაში, ყოველსავე თვალ-ყურს ადევნებს. არა გამოპარვია-რა. ბუზიც-კი არ გაფრენილა მის სარკმელთან, რომ შეუმჩნეველი დარჩენოდეს...

გაშტერებული უმზერს ეხლაც შალვა სარკმლის ახლო მცენარეობას, ადგილს. ას, დღი-თი-დღე რა ცვლილება ეტყობა არემარეს!.. რასაც-კი აქნობამდის სიცოცხლის ნიშან-წყალი არ ეტყობოდა, ეხლა, მოძრაობაში მოსულა...

— შვილო, თბილა! გარედ გადი, გაიარე. —

მორიდებით ჩასჩურჩულებს თვალ-ცრემლიანი დედა, მაგრამ შალვას არ ეყურება.

ის თითონაც გრძნობს სითბოს. ხედავს, როგორ ეალერსებიან მზის სხივები ახლად გადაშლილ ხეებს, ველებს, როგორ ჭყუმპალაობენ იქავე ახლოს მოჩურჩუხე წყალში. ხედავს, ამ ნაზ სხივებს როგორ გამოუწვევიათ ყველა სულ-დგმული გარედ სანავარდოდ, საალერსოდ. აგრ, ბეღურებს რა ყოფა აქვთ ხეებზე, როგორ ნაზად არხევენ ფრთებს. შროშანიც სარკმლის ახლო დამჯდარა, აულია თავი მაღლა და გატა-ცებით, დაუსვენებლად ჯიღჯიღებს ნისკარტის კაპუნით, თანაც ფრთების რხევას აყოლებს და დრო-გამოშვებით ბუქნავს. აგრ, მერცხლებიც წყვილ-წყვილად როგორ ელვასავით სარკმლის ახლო გასრიალდებიან, „ჟყავ!“ დასჭივივლებენ ერთმანეთს და შორს, შორს, სადღაც იკარგებიან. ჭია-ლუა?.. მუმლი?.. ამათ ვიღა ადევნებს თვალ-ყურს!.. უხარიან, ყველას უხარიან სიცოცხლე, ყველას! ყველა...

„შენ?..—ეჩურჩულება იდუმალი ხმა:—შენ-კი სჭინები... შენ ხომ მაისს...“

—ეეეხ!..—ამოსკდა გულის სიღრმიდან და გულ-ჩათუთჭულმა თვალები მოხუჭა. „ბზუუ,“ მოესმა შალვას. ბზუილი და ამასთან ერთად

სარკმლის მინაზე ფრატუნი. გაახილა თვალები და დაინახა, როგორ ბზუილით დიდი, ბანჯლვ-ლიანი ბუზი, რომელიც გუშინ, გუშინ-წინ, ამის წინადაც სარკმლის კუთხეში ეგდო გაცივე-ბული, უსულოდ, იბრძვის გარედ გასასვლელად...

„შენ-კი გარედ გასვლას ვეღარ ეღირსე-ბი!..“ — წასჩურჩულა კიდევ იმავე იდუმალმა ხმამ.

პასუხად შალვა სიმწარით გაიკლაკნა ტანში და გვერდი იცვალა.

იმის მორღვეულ, მოელვარე თვალებს დე-დის ცრემლიანი თვალები შეხვდა. ბუზი-კი ბზუოდა, ბზუოდა და ხან სარკმლის ერთ მი-ნას დაარტყამდა თავს და ხან კიდევ მეორეს.

— დედი!.. — მიმქრალის ხმით მიმართა დედას.

— რა გინდა, გენაცვალოს დედა, შვი-ლო?!.. — ნიავსავით წამოდგა და მიუახლოვდა.

— ეს ბუზი...

— ჰო, შვილო!..

— გუშინ მკვდარი იყო და დღეს-კი, ვერა ხედავ, როგორ...

— სითბომ გამოაცოცხლა და ეხლა გარედ მიიბრძვის.

— ვიცი, ვიცი!.. რატომ მე-კი...

— შენც კარგად გახდები...

— ეეე!... — სახე მოეღმიჭა და თვალები
მოეხუჭა.

— მე მაისს ვეღარ დავესწრები!...

— რად ამბობ მაგას, გენაცვალოს დედა,
და... — ვეღარ დაათავა, გული ყელში მოებჯი-
ნა და ქვითინი მორთო.

ბუზი-კი ისევ ბზუოდა და სარქმლის მი-
ნებს ეფრატუნებოდა...

— დედი!...

— აქა ვარ, შვილო!

— ეგ ბუზი...

— რა გაგიხდა ეგ ბუზი?! აი!... — გაჯავ-
რებულმა წამოიძახა და გადაეწოდა მოსაკ-
ლავად.

— არ მოჰკლა, არა, არა!... — წამოიწია ლო-
გინიდან და ხელი დაუჭირა. — არ მოჰკლა, დე-
დი!... — შეევედრა შალვა დედას, რომელსაც
უკვე ხელში უფართხალებდა ბუზი.

— არ მოვკლავ, შვილო, არა!... დამ-
შვიდდი!...

— გაათავისუფლე, გარედ გაუშვი! — ძლივს
წარმოსთქვა აღელვებულმა და მოქანცული
ბალიშე მიესვენა... — წაიყვა!... — განუმეორა
თხოვნა და თვალები მოხუჭა...

— სსს!.. — ხელი აიღო და გარედან შე-
მოგრუნებული დედა ოთახის შუა შეაყენა.

— შვილო...

— მოიცა, მოიცა, დედი!... არ გეყურება
სამცხენას ზარების წკარუნი?!...

— არა!.. უთუოდ ყურები გიბჟუის.

— აგერ, აგერ!.. თანდათან ახლოვდება...

— მართლა. ეხლა-კი შემომესმა... უთუოდ
მკურნალი იქნება. ყვავილი საშინლად მძვინვა-
რებს. მამასახლისმა ამას წინად აცნობა და აბა
სამცხენით მეტი ვინ მოვა?!

— მკურნალი!... — გაგრძელებით წამოიძახა
შალვამ და სახე მთლად დაელმიქა.

— შვილო, ვთხოვ, რომ გნახოს!..

ამ სიტყვებზე უარესად მოელმიქა სახე და
პირისახე საბნით წაიჩულა, რომ დედის სიტყვე-
ბი აღარ გაეგონა.

დედა მიხვდა, რის ნიშანიც იყო საბნის
წახურვა და ამისთვის ხმის ამოუღებლად გულ-
ხელ დაკრეფილმა მზერა დაუწყო. საწყალს თან
ცრემლები ლაპა-ლუპით ჩამოსდიოდა.

ზარების წკარა-წკური თანდათან ახლოვდე-
ბოდა, და უეცრად ეზოდან შემოესმა მეეტლის
სმა „ტბუუ“-ო.

შალვას დედა მაშინვე გარედ გავიდა.

— ლმერთო, ნუ-თუ ის მოვიდა?... — ლმობიერად წამოიძახა, როდესაც ეტლიდან ჩამომხდარ ქალს თვალი შეასწრო და მაშინვე მისაგებებლად გაქანდა... — თქვენ...

— გატყობთ, შალვას დედა ბრძანდებით!... — სიტყვა აღარ დაათავებინა ახლად მოსულმა და მაშინვე გადაეხვია.

— მე მეგონა ჩემ წერილს არ მიიღებდი, შვილო, რას მოვიფიქრებდი, რომ წამოხვიდოდი.

— დედი, შალვა როგორ არის?

— შენი მტერი და დუშმანი იყოს, შვილო, ისე, როგორც შალვა არის!... — ტირილით უპასუხა და გულში ჩაიკრა.

— პირზედ საბანი რად წაუხურავს?... — დაეკითხა ახლად მოსული, როდესაც ოთახში შევიდნენ და საბან-წახურული შალვა დაინახა.

— ეგრე იცის, შვილო!... წაიხურავს საბანს და ქვეყანაც რომ დაინგრეს, მაშინაც ვერას გაიგებს, ისე გაერთობა ხოლმე ფიქრებში.

— ხომ არა სძინავს?

— არა!...

— მაშ შეიძლება საბანი გადავხადო?

— სწყინს, როდესაც მე გადავხდი ხოლმე და შენგან-კი, არ ვიცი, იწყენს თუ არა.

— საბანს ნუ მხდი, რა გინდა? — წყრომით

წამოიძახა და თვალებ-მოხუჭული სარქმლისკენ
გადაბრუნდა.

— შალვა!..

— ჰა?.. შენ?! ელიკო!.. ელიკო!..—
ნაწყვეტ-ნაწყვეტად გაიძახოდა შალვა და თან
გულში იკრავდა ელიკოს.—ოხ, ჩემო კარგო,
მაპატივე, მაპატივე!.. მე... მე... ვსცდე...ბო-
დი!..—ძლივს დაათავა შალვამ სიტყვა და ლონე-
მიხდილი ბალიშზე მიესვენა.

— გენაცვა, შალვა, რა დროს პატივების
თხოვნა?! განა ჩემი აქ მოსვლა იმისი თავდები
არ არის, რომ არ გემდურები?!

— ახ, შენთან რა დამნაშავე ვარ!.. ელი-
კო, სირცხვილით შემოხედვასაც ვეღარა ვბე-
დავ!..—გულამოსკვნით წამოიძახა და ცრემ-
ლები მისდა უნებურად გადმოსცვივდა.

— მაგისტვის რადა სწუხარ, შალვა?! ბედ-
ნიერად ჩავთვლი ჩემ თავს, თუ ეხლა მაინც
დარწმუნებული ხარ, რომ შენ, მხოლოდ შენ
მიყვარხარ. ხომ ეს იყო მიზეზი შენი უკანასკნე-
ლი წერილისა, რომლითაც უარი გამომიცხადე?!

— ელიკო!.. ელიკო!.. ნეტავ არ მოსუ-
ლიყავ!—ტანხა ჩხვლეტა დაუწყო, გველივით
გაიხლაკნა და მაგრად, მაგრად თვალებზე ხელი
მიიფარა.

— როგორ, შენი ავადმყოფობა შემეტყო
და არ მოვსულვიყავ?!

— ვინ შეგატყობინა?!

— ვისაც უნდა შეეტყობინებინა, ეგ ხომ
სულ ერთია!..

ელიკოს პასუხზე შალვას დედა გატრიალ-
და და ფეხ-აკრეფით გარედ გავიდა.

— დედამ ხომ არ მოგწერა?

— დედამ ხომ არა იცოდა-რა და, აბა,
როგორ მომწერდა?! ამას თავი დავანებოთ და
ის მითხარი: ეჭვი ხომ აღარა შემოგაქვს-რა? —
ჰკითხა ელიკომ და შუბლზე აკოცა.

— ელიკო, ნუ მეკარები!..

— ვითომ რატომაო?

— მე ჰლექითა ვარ ავად და შენც არ გა-
დაგედოს.

— ხა, ხა, ხა, ხა!.. ეგ მე კარგად ვიცი,
გადამედება თუ არა! — გულიანის კასკასით უთ-
ხრა და უფრო მოეხვია.

— ელიკო, მე არ გეხუმრები!.. მე...

— გაჩუმდი, გაჩუმდი, თორემ, აი!... აი!..
აი!.. — „აი, აი“-ს გაიძახდა ელიკო და თან
შალვას ტუჩებს ეკონებოდა.

შალვაც ვეღარ ეწინააღმდეგა. ელიკო გაშ-
მაგებით ჰკოცნიდა და ის-კი ამ დროს უსიტ-

ყვოლ ჰერცხავდა თავს, რომ ელიკოს, ამ ანგელოზის ხელი ჰერი და შეურაცხყოფა მიაყენა.

— ჰა!.. ჰა!.. ჰა!.. ვაიმე, ჰელექი გადამედო!.. — დაღონებულმა სამჯერ ოდნავ ძალად ჩაახველა და გულზე ხელი დაიდო.

— ელიკო, ნუ მასხარაობ!.. — ლიმილით უთხრა და ხელი ხელზე მაგრა მოუჭირა.

— მაგრა, მაგრა მომიჭირე ხელი!..

— მეტი ღონე აღარა მაქვს!

— „მეტი ღონე აღარა მაქვს!..“ — გააჯავრა ელიკომ და ხელი თითონ მოუჭირა.

„ელიკოს ღირსი არ ვიყავ და ღმერთ-მაც არ მომცა!“ — მწარედ გაურბინეს თავში ამ სიტყვებმა და ელიკოს ცრემლით სავსე თვალებით ლმობიერად შეხედა.

— შალვა, რა მოგივიდა?!

— არაფერი! — უპასუხა, და ცრემლები ლოცებზე გადმოუგორდნენ.

— ჩემო შალვა!..

— დღეს აპრილის თხუთმეტია!..

— მერე? — განცვითრებით დაეკითხს ელიკო და ცრემლები მოსწმინდა.

— მაისს ვეღარ მოვესწრები.

— ვინ გიწინასწარმეტყველა?

— მკურნალმა!..

— ხა-ხა-ხა!... — გადიკასკასა და შემდეგ უეცრად მოილრუბლა და ისევ დაიწყო: — მასის პირველისათვის შავების ჩაცმა მომინდება. ტირილით და თავში ცემით საფლავამდის მიგაცილებ და...

— ელიკო, მასხარად მიგდებ თუ რა არის?!

— მასხარად კი არა და, შალვა, იცი რა გითხრა, მე პური მომშივდა და ცოტა რამე შევჭამოთ, შენც ხომ მოგშივდა?..

— მე-კი არა მინდა-რა და შენ-კი ეხლავე ჭამე რამ. აი, დედა შემოვა და მოგიტანს.

— მინდა შენთან ლოგინში ვჭამო რამ და შენც, რასაკვირველია, ერთ ლუკმას მაინც აიღებ.

შალვას დედამ საჩქაროდ მიუტანა ელიკოს და შალვას რაც-კი რამ ებადა და სიხარულით შესცქეროდა იმათ. უხაროდა, რომ ელიკო, როგორც მტრედი თავის ხუნდს, ისე აძლევდა შალვას საჭმელს.

— ნეტავ ეს თხუთმეტი დღე თხუთმეტ წელიწადად მაინც გადაიქცეს!... — წამოიძახა შალვამ, როდესაც ჭამა გაათავეს და ელიკოს ხელი დაუკირა.

— შალვა, რა მშვენიერი სოფელი ყოფილა ეს სოფელი! ხომ აქაურ მცხოვრებად ითვლები?

— პო, აქაური ვარ!

— ჩემთვის არას დროს არ გითქვამს ეგ. — ალექსით უთხრა, თავისი თითები შალვას თმაში გახვია და ოდნავ, ოდნავ თითებს არხევდა და თავის კანს ეხებოდა.

შალვას ესიამოვნა, ესიამოვნა ძლიერ და განძრევისა ეშინოდა, რომ ელიკოს თითების ცაცუნი არ შეეყენებინა.

ელიკო მიუხვდა სიამოვნებას და დიდხანს, დიდხანს არხევდა თითებს, ვიდრე შალვას ამ სიამოვნებაში არ ჩაეძინა.

— შენ-კი გენაცვალოს დედა, შვილო!.. — დაბალის ხმით წამოიძახა და ელიკო გულში ჩაიკრა, როდასაც ის მძინარე შალვას მოშორდა. — რამდენი ხანია ძილი არ მიჰკარებია მაგის თვალს!.. — განაგრძო შალვას დედამ ისევ დაბალის ხმით: — და ეხლა შენის წყალობით, აგერ, როგორა სძინავს...

— არა უშავს-რა, დედი, შალვა ჩქარა ლოგინიდანაც აღვება.

— შენს პირს შაქარი, შვილო! დღე და ღამ სულ ბორგავდა, უაზროდ მაისს გაიძახის და...

— დედი, ჩვენ ეგ მაისი. როგორმე უნდა დავავიწყოთ.

— შენა, შვილო, შენ თუ დაავიწყებ,
 თორემ მე ვერა მომიხერხებია-რა! — თვალცრემ-
 ლიანმა წამოიძახა და აღგზნებულად ელიკო
 ისევ გულში ჩაიკრა...

* * *

გათბა, გათბა დედამიწა. სალამოს სიომ
 წამოპბერა და გაღებულ სარკმლიდან შემოუთა-
 მაშა იქავე სარკმელთან მწოლარე შალვას, რომ-
 ლისათვისაც ელიკოს. ხელი თავზე დაედო და
 ისიც შალვასავით გარედ გაიცქირებოდა. ელი-
 კოს თვალები უბრწყინავდნენ, ტუჩები სიმოვ-
 ნებით ელიმებოდნენ. შალვა-კი უეცრად მოიღ-
 რუბლა. ის წყეული სიტყვები კიდევ ჩაეწეო-
 ნენ ყურში. „მაისს ვერ მოესწრები“... შე-
 მოესმა და ტანი შეერყა...

„ნაუუ!...“ — გაისმა დიდი ზარის ხმა სამ-
 რეკლოდან და შორს, შორს ჰაერში გაიფანტა.
 შალვა გამოაფხიზლა ზარის ხმამ და ელიკოს
 დაეკითხა:

— ხეალ რაობაა, რომ ზარი დარეკეს?!

— ხეალ?.. ხვალ?.. — გახარებული წამოხ-
 ტა ელიკო და პირ-და-პირ დაუდგა...

— ელიკო, რატომ მაგრე მიცქერი?..

— შალვა, გენაცვა, იცი, ხვალ რა დღე

არის?! — ტაშის შემოკვრით წამოიძახა და შე-
მოეხვია...

— ელიკო, ვერა გამიგია-რა?!

— ხვალ შიო მღვიმელის მიცვალების
დღეა!.. — მედიდურად წამოიძახა და თავის გაქ-
ნევით თმები შეარხია.

— როგორ?.. სტყუი, ელიკო!.. ხვალ
მაისის ცხრაა?!

— დიალ, ბატონო, ხვალ მაისის ცხრაა.

ზარის დარეკას-კი უფრო მოუხშირეს და
მოუხშირეს.

— ტყუილია, ტყუილი! — წამოიძახა შალ-
ვამ და ლოგინიდან ჩამოვიდა.

— თუ არა გჯერა, ეკლესიაში წავიდეთ.

— წავიდეთ!


— «ლირსო მამაო, შიო...» — შემოესმა ეს
სიტყვები მეფსალმუნისა, როდესაც ეკლესიაში
შევიდნენ, და შალვა ყურს არ უჯერებდა. კა-
რებში შეჩერდა და დიდხანს გაშტერებული
იდგა და ადგილიდან აღარ იძვროდა.

— «ლირსო მამაო, შიო...» — შემოესმა
კვლავ მეფსალმუნის ხმა...

— ღმერთო!.. მაშ მე მაისშიაც ცოცხალი
ვარ? — თვალებზე ხელი მიიფარა და ქვითინი
მორთო. ელიკო-კი სიამოვნებით შესცემოდა

მოქვითინე შალვას და ღმერთს მადლობას სწი-
რავდა, რომ შეცდომითი რწმენის მსხვერპლი
არ შეიქმნა შალვა.

— მე აღარ მოვკვდები, ჩემო მკურნალო!
— მოურიდებლად გადაეხვია ელიკოს კარიბჭეში
და იმისი მკერდი ცრემლით დაალბო.



ი უ დ ბ

(სააღდგომო ეტიუდი)

I

— მომგვარეთ კაცი ესე, - ვითარცა
 გარდამაქცეველი ერისა. მეც განვიკითხე, მაგ-
 რამ, როგორც თქვენ თითონ ნახეთ, ბრალი
 ვერა ვპოვე-რა. ეს არას დროს არა ყოფილი
 გარდამაქცეველი ერისა. სრულებით უბრალოა.
 იროდმაც, რომელსაც ვაახელ, ვერა ჰპოვა-რა.
 ამისათვის ვაკმარებ, რაც სასჯელი მივაყენეთ
 და განვათავისუფლებ.—მაღალის ხმით ეუბნე-
 ბოდა პილიტე ბრბოს და დრო-გამოშვებით გა-
 დაჰქოდავდა ხოლმე იესოს, რომელიც მის წინ
 ღრმად ჩაფიქრებული, ფერ-მიხდილი ეკლის
 გვირგვინით იდგა და, თითქოს მის სიკვდილ-
 სიცოცხლეზე არ იყოს ცილაობაო, არავითარ
 მონაწილეობას არ იღებდა. იგი დალვრემილის
 თვალებით ძირს ჩაიკერდებოდა და ევედრებო-
 და უფალს, რომ ბრბოსთვის მიეტევებინა ეს
 სიქციელი.

ბრბო-კი მღვდელ-მთავრებისაგან წაქეზებუ-
 ლი ჰყვიროდა პილატეს საპასუხოდ:

— ეგ მაცდურია!.. ხალხსა რყვნის!.. კე-
ისრის წინააღმდეგია!..

— გაიგონეთ, ეს უბრალოა და ყოველივე
თქვენი ნამბობი ცილის წამებაა!..

— როგორც ვხედავთ, შენც კეისრის წინა-
აღმდეგი ყოფილხარ, რომ მავ მეამბოხის, ტახ-
ტის მაძიებელის განთავისუფლება მოგისურვე-
ბია!.. — წამოიძახეს აქა-იქ ბრბოდან მღვდელთა
და მღვდელ-მთავართა, რაც ბრბომ აიტაცა და
ერთ ხმად იგრიალა:

— ჰაა, შენც კეისრის წინააღმდეგი ყო-
ფილხარ!..

პილატე შეკრთა, არ მოელოდა, რომ ამგვარ
ცილს თვით მასაც შესწამებდნენ. „ეს ბრბო, —
გაიფიქრა შეშინებულმა უნებურად: — არავითარ
საშუალებას არ დაერიდება, რომ ნიშანში ამო-
ლებული კაცი დაამხოს და, შესაძლებელია, მეც
თან მიმაყოლოს.“ ამისათვის სასოწარკვეთილმა
თავი ძირს დახარა და იესოს განთავისუფლების
იმედი დაჰკარგა.

— ხალხნო! — უეცრად თავი მალლა აილო.
ცოტახნის წუხილის შემდეგ პილატემ და გა-
ბრწყინვებულის სახით ხალხს მიჰმართა: — დღესა-
სწაული მოახლოვებულია. მამა-პაპათა ჩვეულება
თხოულობს სადღესასწაულოდ ერთ-ერთი პყრო-

ბილის განთავისუფლებას. ხომ იცით, ამ უამაღ
შეპყრობილია ბარაბა, ავაზაკი, კაცი-კალია.
იმის სახელს სულ რამდენიმე დღის წინად ში-
შით და ძრწოლით ახსენებდით. ის არ ინდობ-
და არც კაცს, არც ქალს და უსუსურ ბავშვსაც-
კი. რომელი გნებავთ განვათავისუფლო: ბარაბა
თუ ეს უბრალო კაცი?

— ბარაბა, ბარაბა მოგვიტევე ჩვენ!.. —
ილრიალა ბრბომ და ეს ხმა შორს, შორს
გაისმა...

— ვინ?.. ბარაბა?.. ჩაფიქრდით, ვის გან-
თავისუფლებას თხოულობთ?.. — თავზარ-და-
ცემული პილატე ეკითხებოდა ბრბოს. მაგრამ
დაბრმავებული ბრბო მაინც თავისას გაიძა-
ხოდა:

— ბარაბა, ბარაბა მოგვიტევე ჩვენ!..

— მაშ რა ვუყო ამ კაცს, რომელსაც „მე-
ფე ურიათა“-ს უწოდებთ? — განრისხებული
პილატე დაეკითხა ბრბოს.

— ჯვარს აცვი, ჯვარს აცვი ეგე!..

პილატე მოიშალა, მოდუნდა და წყალი
მოითხოვა.

— მე უბრალო ვარ და ამ კაცის სისხლი
მე ნუ მომეთხოვების!.. — გადიბანა ხელები და
შემდეგ იესოს შოლტი გადაჰკრა იმის ნიშნად,

რომ უკვე ყოველივე გათავებული იყო და იესო
შეეძლოთ წაეყვანათ ჯვარსაცმელად *).

— ჩვენ თავს და ჩვენ შთამომავლობას
მოეთხოვოს მაგისი სისხლი!... — აღტაცებით უე-
ძახა ბრბომ და იესოს გარს შემოეხვია, რომ
კაიაფასთან **) ცემა-ტყეპით წაეყვანა.

— ხა, ხა, ხა, ხა!... — გვერდიდან მოესმა
იესოს გულის სილრმიდან ამონახეთქი შხამით
და გესლით გაუღენთილი ყრუ ხარხარი, რო-
დესაც პილატემ ბრბოს თხოვნისამებრ ჯვარცმა
მიუსაჯა.

იესომ იცნო ეს ხმა, და ცემა-გვემას, დამ-
ცირებას ისე არ უმოქმედნია, როგორც ამ ხარ-
ხარმა იმოქმედა...

გული დაეკოდა და ლმობიერად გაიხედა
იქით, საიდანაც ხარხარი შემოესმა.

წყვილი მოელვარე თვალი, რომელშიაც
გამარჯვებული გულის სილრძო იხატებოდა,
დახვდა იესოს თვალებს...

— მაცდურო, ეხლა-ლა იხსენ თავი შე-
ნი!... — ისარივით სტყორცნა იესოს ეს სიტყვე-

*) მთლად ეს ამბავი ტითქმის სიტყვა-სიტყვით მოყვა-
ნილია სახარებიდან: იხილე სახ. მათ. XXVII; მარკ. XV;
ლუკ. XIII; იოან. XIX.

**) კაიაფა უფროსი მღვდელ-მთავარი იყო.

ბი მოელვარე თვალების პატრონმა და, თით-
ქოს ემალება ვისმეო, გვერდით მდგომთ ეფა-
რებოდა და ძირიდან გამოაკვესებდა თვალებს...

იესომ არ მოარიდა თვალი. თვალი თვალ-
ში გაუყარა და უნდოდა ეთქვა რამ, მაგრამ
სიტყვის მაგივრად თავი ოდნავ ჩაიქნია და
წყვილი ცრემლი ქუთუთოებზე გაღმოეკიდა და
ფერ-მიხდილ ღაწვებზე ჩამოსაგორებლად კრთო-
მა დაიწყო.

— ხაა!... — მოპირდაპირე-კი უფრო მოი-
ხარა, გველივით თვალები შეაკვესა და უნდო-
და გამარჯვების ხარხარი მიეხალა იესოს ცრემ-
ლებისათვის, პირიც დაალო და მხოლოდ ყრუდ
„ხაა“-ლა ამოხდა, რადგანაც ვერ გაუძლო იე-
სოს თვალებს, და ხარხარი შუაზე გაუწყდა.
საჩქაროდ რიდე ჩამოიფარა და გატრიალდა.

II

— ფუი, საზიზლარი, როგორ შემომაშ-
ტერდა?! როგორ მეც შევკრთი?! ხა, ხა,
ხა!.. ბავშვივით-კი გამაჩუმა და გამომაბრუნა.
სწორედ მომჯადოვებელია, მომჯადოვებელი...
პილატეც როგორ მოუჯადოვებია... რანაირად
სცდილობდა იმის განთავისუფლებას... ისიც,

ისიც ეგრე მოაჯადოვა... ისიც... ოხ, მარიამ,
მარიამ!.. ისე როგორ მოგაჯადოვა მაგ მაც-
დურმა, რომ... რომ... მაგრამ, ზოგი ეხლა
მოაჯადოვოს, როდესაც ჯვარს აცვამენ... მა-
რიამ, მაშინ ხომ დარწმუნდები, რომ ეგ სა-
ზიზლარი მატყუარა იყო, რომ... ოხ, რანაი-
რად მეშინოდა, როცა პილატე განთავისუფლე-
ბას სცდილობდა... რო გაეთავისუფლებინა?!
არა, ეგ შეუძლებელი იყო!.. თვით ძალი ცისანიც რომ ჩამოსულიყვნენ მაგის დასახსნე-
ლად, კაიათას ბრჭყალებიდან ვერ გამოჰვლევ-
დნენ... შენ უნდა მოკვდე და მოკვდები კი-
დეც!— ასე მიბუტბუტებდა რიდე-ჩამოფარებუ-
ლი და თან ბრბოს მიარღვევდა, რომ ნაპირას
გასულიყო.

ბრბო-კი ყვიროდა, მის სიხარულს საზ-
ლვარი არა ჰქონდა. ყველა სცდილობდა, ეკლის
გვირგვინით შემოსილ იესოს მიახლოვებოდა,
რომ რაიმე შეურაცხყოფა მიეყენებინა და შეუ-
რაცხყოფის დროს, რაც შეიძლება ჰქუა-მახვი-
ლობა გამოეჩინა, რომ ბრბო გაეცინებინა. იესო-
კი ძალა-მიხდილი, ხმის ამოუღებლად მისდევდა
შეიარაღებულ ლეგიონთ, რომელთაც გზა ტაძრი-
სკენ ეჭირათ, სადაც კაიათა და სხვა მღვდელ-
მთავრები შემოსილები ელოდნენ იესოს...

ბრბომ რამდენჯერმე შეაყენა ლეგიონები. ქუჩა, ამ ქუჩის-პირა სახლების ბანები, სარკმლები მთლად მოკირწყლული იყო დიდით და პატარით, ქალით და კაცით. ლეგიონები იძულებულნი შეიქმნენ წათებისათვის მიემართნათ და იმათ საშუალებით გაეპოთ ბრბო, რომ ცოტათი მაინც ფეხი აეჩქარებინათ...

— ვის ვემალები? რა მაქვს მოსარიდებელი, რომ რიდე-ჩამოფარებული ვსდგევარ?! — ამაყად წარმოსთქვა რიდე ჩამოფარებულმა, როდესაც ბრბოს განაპირას გავიდა და თავისუფალი ადგილიდან მზერა დაუწყო ამ საოცარ ბრბოს მსვლელობას. ამ სიტყვებთან ერთად რიდე მოიგლიჯა და შორს გადასტყორცნა...

— ეს იუდაა, იესოს მოწაფე, რომელმაც მასწავლებელი გაყიდა და ეხლა, ვერა ხედავ, როგორ ურცხვად სტკბება იმის ტანჯვით! — ანიშნა ერთმა ჭაბუკმა მეორეს და ხალხში შეერია.

მეორე ჭაბუკი-კი შეფერხდა და დააშტერდა. იუდამ ვერ გაუძლო ამ ჭაბუკის მზერას. სახე დაეღრიჯა და პირი უკულმა წაილო. ჭაბუკმა-კი ზიზლით მიაფურთხა და გვერდით ჩაუარა.

გულს ლახვარი მოხვდა, როდესაც პირველმა ჭაბუკმა ანიშნა ამაზე მეორეს, და მეორეს მიფურთხებამ ხომ გული სულ გაუპო.

— ამან ოცდაათ ვერცხლად გაყიდა თავისი
მასწავლებელი.—ახლა სხვებმა წამოილაპარაკეს
და ცხვირწინ ჩაუარეს...

— ოცდაათ ვერცხლად!.. ვინ გამოამჟ-
ღავნა ეს?!—წაილუღლუღა და საჩქაროდ გან-
შორდა ამ ქუჩას.

რაკი რიდე ვეღარ იპოვა, თავი ლართით
მოიბურა და თითქმის სირბილით გასწია მისა-
ხვევ-მოსახვევი ქუჩებით...

„.... მლვდელ-მთავარნი უმაღურნი არ იქ-
მნებიან. ისინი გამიწევენ მფარველობას და ხმას
გააწყვეტინებენ ბრძოს.. უმაღურნი! იესოს სი-
კვდილი უხარიანთ და თან კიდევ მე მიკიუინე-
ბენ, მკიცხავენ. მე მივანიჭე ეგ სიხარული და,
მევე-კი მაფურთხებენ!...—მილაპარაკობდა იუდა
გზა-და-გზა და ლართით თავს უფრო და უფრო
იბურავდა.

ჩქარა გაირბინა ქუჩები. თითქმის არც-კი
ვინმე შეხვედრია. გზაში. ტაძართან მივიდა თუ
არა, მაშინვე დიდ დარბაზში შევიდა.

ლურჯათ შეღებილი და ოქროს ვარსკვ-
ლავებით მოქედილი ცა-დაქნილი, რომელიც
სამოცდაათ წმინდა პორტირის ოქროთივე მო-
ვარაყებულ სვეტებს ენაბრებოდა, ოქროსივე
ლამპრები, კანდელები და ჭალები, ოქროს ქსო-

ვილებით შემოსილი მღვდელ-მთავარნი და
მღვდლები პირველ შესვლაზე ადამიანს თვალებს
უბლატებდა. იუდასაც ეს დაემართა, ის ცოტა-
ხანს შედგა კარებში და, თვალი რომ შეაჩვია,
წარსდგა კაიაფას წინაშე.

— ამბავი, იუდავ?! — დაეკითხა კაიაფა იუ-
დას, რომელსაც სირბილისაგან გულ-ამომჯდარს
სუნთქვა თავის დონეზე არ დასდგომოდა.

— მშვიდობა!.. პილატემ იესოს ჯვარცმა
მიუსაჯა და ეხლა აქეთ მოჰყავთ.

— ეგ ჩვენც ვიცით... ხომ გახარებს, იუ-
დავ, ეს ამბავი?

— მახარებს, მაგრამ...

— მაგრამ რა?..

— მე... ხალხი გამცემს მეძახის...

— ხომ არა სტყუის?..

— ოცდაათ ვერცხლად გაჰყიდა თავისი მას-
წავლებელიო, მიყვირის...

— ეგაც ხომ მართალია?

— ზიზლით მაფურთხებენ... ურიდეოდ ვერ
გავსულვარ გარედ...

— მერე „ჩვენ და რა?..“*) ნუ ჩაიდენდი მაგ
სამარცხვინო საქმეს და არავინ გიკიუინებდა...

*) სახ. მათ. XXVII, 4—5.

— რაო?! — დაიყვირა იუდამ და თვალები გააკვესა: — თქვენ მოვალეობა შევასრულეთ.

— ჩვენ ჩვენი მოვალეობა შევასრულეთ. ოცდაათი ვერცხლი ხომ სრულად მიიღე?.. — სიტყვა გააწყვეტინა კაიაფამ და ზეზე წა-მოდგა.

— აი, თქვენი ვერცხლი!.. — ზიზღით მი-აყარა იუდამ ოცდაათი ვერცხლი მღვდელ-მთავართ და კაიაფას თითქოს საბრძოლველად იწვევსო, ისე დაუწყო ცქერა.

— იუდავ!.. წადი!..

— მე ეხლავ წავალ პილატესთან და ვეტ-ყვი, რომ თქვენ მართალი კაცის სისხლის და-ღვრა გინდათ!

— გვიან-ლაა.

— მაგრე მიხდით, ბილწებო, მაღლობას?! თქვენ მაწანწალა მატყუარა ხელთ მოგეცით და თქვენ-კი... იმაზე უარესი მაწანწალა-მას-ხარები თქვენა ყოფილხართ!.. — შეჰყვირა იუ-დამ და გამოტრიალდა...

— საზიზღარო, შენთვისაც მოვიცლით!..

— მიაძახა კაიაფამ და მძიმედ ქშენვა დაიწყო. სხვა მღვდლები-კი ამ დროს უკმაყოფილოდ თავებს იქნევდნენ.

უკანასკნელ წუთებამდის კიდევ იმედი

III

ჰქონდათ მოწაფეებს. ეგონათ, იესო მიეცა მტრებს ხელთ, თავიც მიალურსმინა იმისთვის, რომ უეცარ, თავის დახსნით ამ უკიდურესს ტან-ჯვისაგან შთაბეჭდილება ძლიერი იქნება და ამ განცვიფრების დროს მეფედ გამოცხადება ადვი-ლად შესაძლებელიო. მაგრამ იესომ სული გა-ნუტევა. დაკრძალეს კიდევაც და ეხლა...

გათავდა ყოველისფერი. მოწაფეებს იმედი გაუცრუვდათ. დაიქაქსნენ ყველანი. აღარა სწამთ-რა ადამიანისა. როგორ წარმოიდგენდნენ, რომ ის, რომელიც სამ წელიწადს მათთან სცხოვრობდა და ამ სამი წლის განმავლობაში თითის გაქნევაშიაც-კი სიცრუვე არ შეუმჩნე-ვიათ, მთელი თავისი ძლიერებით მოატყუებ-დათ?! რწმენა შეერყათ და პირველ ხანებში მკვდრებივით დადიოდნენ... ამათ სასოწარკვე-ტილებას ის უბედურებაც თავს დაატყდა, რომ მღვდელ-მთავართ მათი შეპყრობის ბრძანება გასცეს. ისიც აღარ შეეძლოთ ეხლა, რომ ერ-თად მოეყარათ თავი და აეხსნათ ერთმანეთი-სთვის ეს მოვლენა, თავიანთი აზრი ერთმანე-თისთვის გაეზიარებინათ. ესენი იძულებულნი

შეიქნენ, სათითაოდ სამალავები მოენახათ. ზოგი, ვითა ნადირი, ქალაქ გარედ უდაბნოში იმალებოდა და ზოგი კიდევ ქალაქში, ნაცნობებთან.

იოანე მოციქულიც ქალაქში მოჰყვა და იმალებოდა ვინმე მარიამთან, მეტად მშვენიერ და იესოს დიდად თაყვანის-მცემელ ქალთან. ორნივე ერთად სტიროდნენ თავიანთ დაობლებას და ემდუროდნენ ცას. მარიამის მამა-კი ამშვიდებდა ორსავე და ანუგეშებდა...

შუალამისას მოვიდა ვინმე ჭაბუკი და უთხრა იქ მცოფთ, რომ კაიაფას იოანეს აქ ყონა გაუგია და შეიძლება ამის შესაპყრობად ამაღამვე თავს დაგესხათო. ამისათვის საჭიროა, დასძინა ჭაბუკმა, ეხლავე თავს უშველოსო.

ჭაბუკმა და მარიამის მამამ მაშინვე გაიყვანეს იოანე გარედ და დასამალავად სხვაგან წაიყვანეს. მარიამმა-კი კარი ჩაიკეტა და მამას ლოდინი დაუწყო.

— ეხლა-კი დროა! — სიხარულით წამოიძახა ლართით მობურულმა და კარი დააკაკუნა.

— ვინა ხარ? — დაეკითხა მარიამი შიგნიდან.

— მე ვარ, კარი გამილე!...

— როგორ?! შენ?! აქ რამ მოგიყვანა, შეწყეულო?

— მარიამ, მარიამ!.. ნუ მწყევლი, კარი
გამიღე!.. მეც ხომ...

— წადი, წადი, შე გამცემო, შე მოღა-
ლატევ!..

— მარიამ, განა ვის ვუღალატე?! შენ ხომ
არა! ის მაცდური იყო. ხომ ნახე ეხლა, რომ
მატყუარა იყო და შენი სიყვარულის ღირ-
სი არ იყო. მარიამ... გამიღე კარი და და-
წვრილებით გიამბომ. ყველამ მაფურთხოს, გამ-
კიცხოს, ოღონდ შენ ნუ!..

— ოხ, საზიზღარო არსებავ!.. დაიღუპე,
სახლს ნუ მიბილწავ!..

— მარიამ, ჩემს გრძნობას მაინც ნუ შეუ-
რაცხყოფ!

— წყეულიმც იყოს შენი გრძნობა და შენც
მასთან!

— გააღე კარი, თორემ შემოვალ და შენ-
თვის უფრო ცუდი იქნება! — მრისხანედ შესძა-
ხა და კარებს ნჯლრევა დაუწყო.

— არ გაპედო, თორემ ფეხს შემოს-
დგამ თუ არა, მაშინვე მახვილით გულს გა-
გიპობ!..

— ვნახოთ! — წამოიყვირა და უფრო გამ-
ხეცებით დაუწყო კარებს ნჯლრევა.

— საზიზღარო!.. წყეულიმც იყოს შენი

სახელი და ზიზღით იხსენიებდეს მას ყოველი
 ერი უკუნითი უკუნისამდე!..

— ააა!...—დაიღრიალა იუდამ გარედ და
 შორს გადახტა.—რა გინდა ეხლა შენ აქ, რა?!
 ღრიალებდა იუდა და თან გარბოდა, მარიამი-კი
 განცვიფრდა და არ იცოდა, რითი აეხსნა იუ-
 დას გაჭცევა და ღრიალი.

IV

— ... მაცდურო, მატყუარავ!.. შენ ხომ
 მოგკლეს, მოგკლეს, ჯვარს გაცვეს და ლოდით
 დაგკრძალეს?!...—შეუტია იესოს, როდესაც ის
 ნატანჯის სახით, ოდნავ თავის რხევით, თვა-
 ლის ქუთუთოებზე წყვილი ცრემლით შებინ-
 დებისას წინ გამოეცხადა...

მთელი დღე უდაბნოში წოწიალობდა.
 გაუფრთხოდა ყველას. ერთი ადგილიდან მეო-
 რე ადგილას მშველის სისწრაფით გადადიოდა.
 შებინდებისას-კი აპირებდა მარიამის სახლისკენ
 წასვლას, რომ იმის ახლოს მოესვენებინა თა-
 ვისი ტანჯული სული. სწორედ ამ დროს გა-
 მოეცხადა იესო.

— ... სანამ ცოცხალი იყავ, შენი სახე

ყველაფერში ხელს მიშლიდა, მიცარავდა და
მოკვდი და ახლა სიკვდილის შემდეგაც არ გინ-
და მომასვენო?! ჰა?.. ხომ გუშინ დაგკრძა-
ლეს?.. ჰა?.. მომშორდი, მომშორდი, შე წყეუ-
ლო! — დაიღრიალა იუდამ და მახვილი იძრო...
— მომშორდი, თორემ მკვდარს ხელმეო-
რედ მოგისპობ ამ მახვილით სიცოცხლეს! —

შეუტია და რამდენიმე ნაბიჯი იესოსკენ წასდგა.
იესო-კი ისევ ისე შესცეკეროდა, ისევ ისე თავის
რხევით, და წყვილი ცრემლი ისევ ისე ლაწვეპზე
ჩამოსაგორებლად უკრთოდა თვალის ქუთუ-
თოებზე.

— ააახ, წყეულო!.. — თვალები მაგრა მოხუ-
ჭა შეყვირებასთან ერთად და მახვილი პირდაპირ
იესოსკენ სტყორცნა...

სალამოს მკრთალი ნათელი-კი მთლად სიბ-
ნელით შეიცვალა და არე-მარე დაპბურა...

„იუდავ, ამბორის ყოფითა მისცემა ძესა
კაცისასა?!“*) — ყურში ჩაეწვეთა იუდას ნაღვ-
ლით და ლმობიერებით სავსე წმი იესოსი.

— ჰა?! ხა, ხა, ხა, ხა! — თვალებ დაჭყეტი-
ლმა მიიხედ-მოიხედა და, რაკი ვერავინ დაინა-
ხა, სიხარულით ხარხარი მორთო.

*) საჩ. ლუკ. XXII, 48,

„იუდავ, ამბორის ყოფითა მისცემა ძესა კაცისასა?!“ — შემოესმა ეხლა მეორე მხრიდან ისევ ის ლმობიერი, ნაღვლით სავსე ხმა.

— ააა, მშიშარავ, მშიშარავ!.. ჩემმა მახვილმა შეგაშინა და ახლა იდუმალად მებაასები! — ხარხარით წამოიძახა და მახვილის ასაღებად წავიდა, რომ მახვილის ტყორცნითვე მოესპო იდუმალი ხმაც ისე, როგორც იესოს სახე გააქრო...

— რა გინდა?! — დაიღრიალა საცოდავად იუდამ და უკან ისე გადმოტრიალდა, რომ კინალამ წაიქცა.

ერთი ფეხი წინ-წამოდგმული დარჩა, მეორე სახსარში საშინლად მოეხარა, ტანი-კი უკან გადმოეზნიქა და ასე მუშტებ-წინ-წაწვდენილი მოელვარე თვალებით ხეის ამოუღებლად შესკეროდა იესოს, რომელიც ისევ ისე ლმობიერებით, ლრმა ნაღველით აღსავსე სახით უეცრად იმისა და მახვილის. შუა გაჩნდა.

დიდხანს არ უმჟერია იუდას. ჩქარა პირი უკუ იბრუნა და, რაც ძალი და ლონე ჰქონდა, მოკურცხლა.

სად გარბოდა იუდა?.. თითონაც არ იცოდა. ის ანგარიშ-მიუცემლად გარბოდა და უკან მოხედვისა ეშინოდა. თუნდ სულ ასე ერბინა, ოლონდ ის-კი ნულარ სჩვენებოდა.

სამი დღე-ღამის უჭმელ-უსმელობით და უძილობით ჩამომხმარი იუდა აჩრდილივით მიჰკროდა და ვიდრე თავისდა უნებურად გეთსიმანის ბალში არ შევარდა, არ შემდგარა. აქ ის მოეხვია ერთ ხეს. ხელები გარს შემოურკალა და მაგრა, მაგრა ეკვროდა ზედ. უნდოდა სახე, სახე კი არა, მთელი სხეულით შეერთებოდა ამ ხეს, რომ უკან მოხედვა აღარ შესძლებოდა, რადგანაც ის წყეული, ის მაცდური ეგონა უკან ედგა...

მაგრამ... ოხ! ხეს ეკვრის და ეგერ ხიდგანაც გამოიჭვრიტება ის... ის...

— ახ!... — სასოწარკვეთილებით ხმა აღმოხდა იუდას.

მუხლები მოუდუნდა, მოეკეცა და უგრძნობლად პირქვე დაემხო...

„იუდა, რომელი გეგულების საქმედ, ჰყავ ადრე.“ *) — გამოარკვია იუდა უგრძნობლობისაგან ამ სიტყვებმა და აწმყოს დაუბრუნა.

— ვყავ ადრე და ისე ადრე, რომ ისე ადრე არც-კი მოელოდი... შენ გინდოდა კიდევ... დედა-მიწიდანაც ამოიჭვრიტები?! ააა?!... აქ-კი ჰვეშ მიდევხარ!.. დაგგლეჯ, დაგგფლეთ!.. თუმ-

*) ითან. XIII, 27.

ცა მახვილი იქ დამრჩა, მაგრამ კბილით, ხელებით დაგხოკავ!..—მართლადაც იუდამ დედა-მიწას დაუწყო კბილებით და ხელებით ხოკვა და დიღხანს, დიღხანს ჩაპბლუოდა.

— ჰეე, ჩაგნთქე თუ არა?!

განშორდა მოჩვენება. იესო ჩანთქა. იუდა წამოდგა და წელში გაიმართა.

შავად ჩამომხმარი სახე, დასისხლიანებული პირი და ცეცხლის მფრქვეველი თვალები შესაზარ შეხედულებისას ხდიდნენ იუდას...

იუდა იდგა წელში ამართული და ჩაჟინებით სივრცეს გასცემოდა...

— დედი, დედი, რად მიცერი მაგრე სასტიკად?!.. განა შენცა მკიცხავ?! აჲ! აჲ! აჲ!..— ლართის კალთა უეცრად აიფარა თვალებზე და მუხლ-მოდრეკილმა მწარედ, მწარედ ქვითინი მორთო...

— შვილო, იწამე... ის ძე ლვთისაა! გამოეხმაურა აჩრდილი.

— როგორ?!.. შენც მაგას იძახი?!. მაშ არა ყოფილხარ დედა-ჩემი! თუ მაგისთვის შეარყიე საფლავი, ისა სჯობია, წახვიდე და მოასვენო შენი ძვლები. წადი, წადი!..— ფეხზე წამოკრით მიაძახა აჩრდილს და რამდენიმე ნაბიჯი წინ წარსდგა.

განქრა აჩრდილი. იუდამაც თავისუფლად
ამოისუნთქა. ეგონა, ეხლა-კი სულ გავიმარჯვეო,
მაგრამ ამ დროს ხმა გაისმა:

— აგერ, იუდა სად იმალება! მასწავლებე-
ლი გასცა და ეხლა-კი იმალება.

— მე ვიმალები!.. არა... არა! მე არ ვიმა-
ლები!.. მე სხვა მოწაფეებს არა ვგევარ, რომ
დავიმალო. მე აქ ვარ!.. — შელრიალა და წინ
წარსდგა.

— სხვა მოწაფეებს სდევნიან და შენ-კი,
როგორც გამცემს, არ გეშინიან!..

— მეე?..

— მაგრამ...

— რა, „მაგრამ?“

— შენც ჯვარს გაცვამენ!..

— ხა, ხა, ხა!.. მე ჯვარს მაცვამენ?! არა,
არა და არა!..

ამ დროს უეცრად შემოესმა ფეხის ხმა,
რის გამოც ფოთოლივით შეირყა და იქით გაი-
ხედა, საიდანაც შრიალი მოესმა.

— იუდა, იუდა, ეხლა-კი ვეღარსად დაი-
მალები!.. ხა, ხა, ხა!.. გეშინიან, განა?!

უცნაური ყიჟინი გაისმა იქიდანვე, და
იუდამ იმ მხარესვე შორს, შორს, ხეებს შუა მო-
მკრთალო ჩირალდნების სინათლე შენიშნა.

— აღსდექით ეხლა ჩემზე?!.. ჰააა, უმა-
 დურნო!.. მაცდური მოგეცით ხელში, მოგა-
 კვლევინეთ თქვენი მტერი და მადლობის მაგი-
 ვრად მეც გინდათ ჯვარს მაცვათ?!

ყიფინი-კი თან-და-თან ახლოვდებოდა, სი-
 ნათლე უფრო ჩაღდებოდა...

— თქვენ, თქვენ!.. ბრბოვ, ბრბოვ, საზი-
 ზლარო ბრბოვ, ვერ სცნობ მტერსა და მოყვა-
 რეს, ვერ გაგიგია, ვინ გმოკეთეობს!.. საკმარი-
 სია იმ საზიზლრებმა მღვდელ-მთავრებმა და
 ფარისევლებმა თითი მიგიშვირონ ვიზედმე, რომ
 შენც ცხვარივით ბლავილს მოჰყვე!.. მაგრამ,
 მაგრამ, ხა, ხა, ხა, ხა!.. იმ მხდალივით არ დაგ-
 ნებდები!.. — იუდამ მახვილისთვის გაივლო ქარ-
 ქაშს ხელი, მაგრამ მახვილი ალარ დახვდა. ამის-
 თვის კეტს წამოავლო ხელი და საბრძოლველად
 გაემართა...

— ხა, ხა, ხა!.. ვერ ხედავ იუდას, ოცდა-
 ათ ვერცხლად გამსყიდველს, როგორ მამაცო-
 ბას იჩენს?!.. ჯვარს ვაცოთ ეგა! — ხარხარით და-
 ახალა ყიფინა ბრბომ და თან-და-თან უფრო უახ-
 ლოვდებოდა...

— მე... მე... ოცდაათ ვერცხლად?! არა,
 არა!.. ჯვარს არ გეცმევინებით, არა?! მე საზი-
 ზლარი სიკვდილით არ მოვკვდები, არა!.. — ხრია-

ლით მიაძახა ბრბოს და საჩქაროდ ხეზე აიჭრა.

კეტი-კი ბრბოსკენ სტყორცნა.

იმავე სისწრაფით მოიხსნა სარტყელი, ხის
ტოტს მოაბა, გამოამარყუშა და...

— შშრრ!.. — ხე მთლად შეირყა და ფოთ-
ლებმა შრიალი მორთეს.

ხეზე ფრინველთ გამოეღვიძათ ამ უეცარ
შრიალზე და დაფეთიანებულები უგზო-უკვ-
ლოდ გესთიმანის ბალს მოედვნენ.

ხე-კი კარგა ხანს შრიალებდა, ტოტს ჭაჭა-
ჭუჭი გაჰქონდა, და ოდნავი დრო-გამოშვებითი
ხრიალი გამოისმოდა.

ამ დროს იესოს საფლავისკენ მიმავალთ
მარიამ მაგდალინელმა, მარიამ იაკობისამ და
სხვა მანდილოსანთა წყნარის ბაასით ნელსაცხე-
ბელით ხელში ჩაუარეს ამ ხეს გვერდით, მაგ-
რამ ხეზე ჩამოკიდული იუდა-კი ვერ შენიშნეს...

ყარა-თაფა 1897 წ.

ტბები
ტბები

ღვინის ქურდი.

(ქიზიყელებზე ქართლში გაგონილი პატარა ამბავი)

დიდი ხანია სოფელმა ა—მ მიძინა. მთვარესაც მოეწყინა ცის სივრცეზედ ხეტიალი და დასავლეთისკენ სადღაც ტყიან მთებში ჩაიბნა. მხოლოდ ვარსკვლავთ, მთვარის შემდეგ, იწყეს მეჯლიში და ოვალებ-გაბრწყინვებულნი გადმოხაროდნენ მიძინებულ სოფელს. გაუხარდათ ვარსკვლავთ მთვარის, იმ ეულის, გულცივის ჩასვლა. მისი ცივი სხივები ვარსკვლავთაც გულს უცივებდა და ოდნავ-ლა ბეუტავდნენ. ეხლა-კი, როდესაც იგი ჩაეშვა მთებს შუა, გული გაუთბათ და მხიარულება და კაშკაშიც მოემატათ...

— ბიჭო, აბრი, აქეთ მოდი, შე გამჩენ . . . ! ე ლელვს მოერიდე, თორე...

— უუუ, აუ, აუ! — სიტყვა აღარ დაათავებინა ელიბოს სახლის ახლო ხუთიოდ ტალიკ მოსაუბრე ბიჭს ლელვის ძირიდან გამოვარდნილმა ძალლმა, რომელიც აბრიას მაშინვე წვივებში სწვდა და ღრენით ღრღნა დაუწყო. ყველას, გარდა ძალლისგან დატყვევებული აბრია-

სი, ჩუმი სიცილი აუტყდა. აბრია-კი დასწვდა ძალლს ქეჩოში და უკანა ფეხებზე შეაყენა. ძალლმა შეაკვესა თვალები და გამწარებულმა ქვედა ყბა ააკაპუნა და თან ჩახლეწილი ხმა ააყოლა. აბრიამ მაშინვე ფოლადი თითები მოუ-ჭირა პირზე და ძალლს წკმუტუნი დააწყებინა...

— თქვე ვერნებო, რა გაცინებთ?! მაი-ტათ, ვისა გაქვთ დეკეულის თეძო, თორე ე-ბეხრეკი ქვეყანას შეგვიყრის! — გულმოსულმა დაბალის ხმით, მაგრამ მკვახეთ მიჰმართა მოცი-ნავე ამხანაგებს.

აბრიას სიტყვებმა ყველანი გამოარკვია. საჩქაროდ იმის გვერდით გაჩნდნენ და ლელვის ძირამდის ძალლის მითრევაში მიეშველნენ.

ლელვის ძირას წყნარად დაუშვეს ძალლი, მაშინვე პირში უშობელის თეძო მისცეს და თითონ-კი ელიბოს მარნისკენ ფეხ-აკრეფით წა-ვიდნენ.

ხორცის სუნი მიედინა თუ არა ბეხრეკს, ნერწყვი წამოუვიდა, რაღგანაც მისთვის იშ-ვიათი ხილი იყო, და თუმცა იმ სალამოს სა-ლაფავით, რაც მარინემ გეჯით თავის ხელით მიართო, გამოძლა, მაინც ხარბად დაუწყო ღრულნა.

პატრონის ერთგული იყო ბეხრეკი სიყმა-

წვილეშიაც. კიდეც ამისთვის შეინახა და დაბერა. მაგრამ ერთი სუსტი მხარე ჰქონდა. ხორცის დანახვაზე ყველაფერი ავიწყდებოდა: პატრიონიც და თავისი თავიც.

ეხლაც ისევე დაემართა. ჩაუწვა უშობელის თეძოს და თავდავიწყებით წუწნა დაუწყო, რადგანაც ღრძილებამდის მოცვეთილი კბილებით გლეჯა აღარ შეეძლო...

ტალიკმა ბიჭებმა ელიბოს დაკეტილი მარნის კარი შეაღეს და ქვევრს კიდევაც მოხადეს...

— აჲ, მირონივით არის, ღმერთმანი, მირონივით! — წამოიძახა მიხუამ, როდესაც ღვინით გუდები და ერთი კაი ტიკჭორა გაავსო, და თან სავსე ჩაფუკა წვრილად უკანვე ქვევრში ჩააჭრია.

სქელი წითელი ღვინო წმიდა სანთლის მკრთალ შუქზე მაცდურ ნაკადულად ჩადიოდა ქვევრში და ხუთი მოლიმარ შეღერებულ ბიჭს გაბრწყინვებულ თვალებს ულიზიანებდა; თან წინწკლებს გარს უხვად ისროდა, რის დანახვაზედაც მაყურებელთ პირს ნერწყვი მოსდიოდათ.

— რატო მაგრე წვნიკად ასხამ, შე ვერანავ, ბარემ ერთბაშათ ჩასხი! — წაუბუზღუნა გიომ და მხარში ხელი წაჰკრა.

— მზად არის, წავიდეთ, თორე ჩვენს ლოდინში სული ამოსძვრება ი ხალხს, — სთქვა აბრიამ, როდესაც ტიკჟორას პირი მოაკრა და იღლიაში ამოიჩარა.

— წავიდეთ!.. — სთქვა მიხუამაც და ქვევრს სარქველი დააფარა.

— იი, რა სულელები ვართ! — თითქმის კარებში დაიწყო ივანემ და უკანვე დაბრუნდა.

— რა მოგივიდა, კაცო, წამოდი! — თითქმის ყველანი მიბრუნდნენ ივანეს სიტყვებზე და ერთად დაეკითხნენ.

ეგონათ, თუ დაავიწყდათ რამე, რომ ივანე უკანვე მიბრუნდაო.

— რალა რა მომივიდა, თქვე ოხრებო, — ჩუმის ხმით დაიწყო ივანემ და სანთელი ისევ აანთო: — ქვევრის პირას ვიყავით და ლვინო-კი გემოთი არა ვნახეთ. რას გვეტყვის ი ხალხი? მასხარად აგვიგდებს...

— იი, ამოგაგდოს ქრისტემ-ყე!.. — ღრეჭით უთხრეს და ქვევრს ისევ მიეხვივნენ.

— მართლადა და, რას გვეტყოდნენ ი ვერნები! ვიღა გადურჩებოდა იმათ!.. — ღრეჭით წამოიძახა აბრიამ და სავსე ჩაფუკა ქვევრიდან ამოწუნწკლა.

— აბა, ჩქარა დალიე!... — ყველამ ერთად უთხრა და ოვალებს ბზინვა დაუწყო.

— ივანე, შენ გაცოცხლოს ღმერთმა! შენ რომ არ მოგევონებინა, ჩვენ სირცხვილით ხვალ ტოლ-ამხანაგებში ვეღარ გავერევოდით! — და-ლოცა ივანე აბრიამ და ჩაფუკა მოიყუდა.

ივანემ კმაყოფილებით წვერზე ხელი ჩამოისვა და ულვაშებში ჩაიცინა..

ყველამ ჩამოირიგა ჩაფუკა და ივანე ად-ლეგრძელა. ყველაზე ბოლოს ჩაფუკა ივანეს ერგო. ივანემ დიდი სიამოვნებით მაღლობა გა-დაუხადა ამხანაგებს და, როცა ჩაფუკა გამოცა-ლა, დაიწყო ღვინით დასველებული ულვაშების წუწნით ლაპარაკი.

— იიიი, რა ძაან ღვინოა!.. ნაწლავები სულ არ ჩამწვა!.. თუ ლუკმა არ დავაყოლეთ, ბინებამდის ვერ მივალთ. აბა ერთი მოუთარო-ვოთ, ელიბო შენახული კაცია, შესასუსნი ეჭ-მნება რამ.

— ე ღმერთ-გამწყრალი, ჰკუის კოლო-ფად არ გადიქცა!.. — სიცილით დაიძახა მიხუამ და სანთლით კუთხეში მიირბინ-მოირბინა.

ივანემ-კი ჩაფუკა ისევ ამოავსო. ისე ესი-ამოვნა წითელი ღვინო, რომ კიდევ მოუნდა. სხვებიც სული-მწარედ მოელოდნენ გამეორებას.

— ბიჭებო, ხახვი და პური რამდენიც გინდათ!..—აღტაცებით წამოიძახა მიხუამ და სწრაფად წინ დაუყარა რამდენიმე შოთი და შემჭკნარ-ფოჩებიანი ხახვის კონა.

დამშეული მგლებივით ეძგერნენ და საჩქაროდ ხახვსა და პურს სვავებივით ყლაპვა დაუწყეს...

მართლაც დამშეულები იყვნენ. ბინებიდან სოფ. ა—მდის შვიდი-რვა ვერსი იყო. სწორედ შელამებისას, როდესაც მეძროხეები ვახშამს სჭამენ ხოლმე, გადასწყვიტეს ა—ში წამოსვლა, რადგანაც მაშინ დაკლეს აბრიას დეკეული, რომელმაც უეცრად კვდომა დაიწყო. „მიწის მგელი“ გამოუვარდა, თუ რა ღმერთი გაუწყრა, აბრიას „სალ-სალამათმა“ გათქვირებულმა დეკეულმა ფეხები ფშიკა და კვდომა დაიწყო. აბა, როგორ მოჰკლავდნენ ისე უსულადოს!? მაშინვე ყელში ხანჯალი გაუყარეს და სისხლი გამოადინეს.

მეძროხეებისთვის ეს შემთხვევა დიდ მოვლენად ჩაითვლებოდა.

აბრია თუმცა მოწყენით დაჰყურებდა ყელგამოლადრულ დეკეულას, მაინც გულში ჩუმჩუმად სიამოვნობდა: უხაროდა, რომ რძე და მაწონით მობეზრებულს ხორცის ჭამა შეჰვდება...

ხორცის ჭამა უღვინოდ მეძროხეებისთვის წარმოუდგენელი იყო. ამისათვის ამოირჩიეს ოთხი მარჯვე ბიჭი, აბრიაც თან გააყოლეს და თან, რიდგანაც ერთი ორ-ჩაფიანი ტიკის მეტი არ ჰქონდათ, გუდები გაატანეს.

თითონ-კი აკაფეს უშობელი და ქვაბებით ცეცხლზე შემოდგეს. ლუკმა პურითაც არ გაინძრიეს ყბები, რომ შენაყრებულიყვენ, რადგანაც ყველა მათგანი ცდილობდა მოემშია, რომ ხორცი ბევრი შეეჭამა.

ერთი-ორი ლუკმა გადაყლაპა თუ არა, ივანემ ჩაფუკა აიღო და დაიწყო:

— ეს ღმერთმა აცოცხლოს ამ ღვინის დამყენებელი და ცოლ-შვილი უცოცხლოს!

— ქრისტეს მადლმა-ყე, ელიბო ძალიან კარგი კაცია! მაგას ამ სოფელში ტოლი არა ჰყავს. ღმერთმა დიდ ხანს აცოცხლოს! — წარმოსთქვა მიხუამ, როდესაც სავსე ჩაფუკა მიაწოდეს, და უსვენებლივ გამოცალა.

— ელიბოს მამა-პაპისა სულ არა დარჩენია-რა, — დაიწყო გიომ, როდესაც სავსე ჩაფუკა ხელთა ჰევდა: — სუ თავის მარჯვენით შეუძენია, რასაც ხედავთ.

— ამ ბნელაში რასა ვხედავთ, ე სანთელიც გვიქრება! — იოხუნჯა ივანემ.

— ეე, ივანე, ეგ-ყე ველარ მოგივიდა შე გამჩენ... — ღრეჭით შეუკურთხა გიომ და თან ღვინისაგან დასველებული ხელები გასაწმენდათ გაპოხილ საცეეთებს გაუსვ-გამოუსვა.

— რო გვიქრება-ყე, შე აჯამო, უნდა მივაშველოთ რამე თუ!... — განაგრძო ისევ გიომ და ახლა ღვინით დასველებულ ულვაშებს წმენ-და დაუწყო.

— ივანე მოგიკვდეთ, თუ ეხლავე არ გა-გაჩირალდნოთ! — ამ სიტყვებით წამოხტა ივანე, სანთლის ნამწვს ხელი დაავლო და თახჩასთან მიირბინა.

წამს თითქოს კიდევაც სულ დაბნელდა. სხვებმა პირიც-კი დააღეს, რომ გაელანდათ ივანე, რადგანაც გაჩირალდნების მაგივრად სულ დააბნელა. მაგრამ ყანყრატოში მობჯენილი ლანდვა უკანვე დაუბრუნდათ, რადგანაც სი-ნათლემ ერთი სამაღ იმატა.

ივანე თუნუქის მხრიოლავ ლამპრით უკან დაბრუნდა...

— აჰათ, ესაც სინათლე!.. — მთლად გაბ-რწყინვებულმა ივანემ დადგა ქვევრის პირას ლამპარი და იქავე ჩაიკეცა...

აქნობამდის თუ დაბალის ხმით ლაპარა-კობდნენ და ფრთხილობდნენ, ეხლა სამა-

გიეროდ, როდესაც მეოთხ-მეოთხე ჩაფუკა წითელი ღვინო ჩამოირიგეს, ცოტა არ იყოს, შებლი შეუხურდათ და სრულებით თავისუფალი ხმით დაიწყეს ლაპარაკი. ცოტა ჩვეულებრივ-ზედაც მაღლა.

— ივანე, ჰაი, ივანე, რა კარგი იქნებოდა, არა, ბიჭო, რო ცოტა სამწვადე წამოგველო?!— სინანულით ელრიჭებოდა გიო ივანეს და თან შოთს პლრლნიდა...

— კარგი იქნებოდა, მა რა?.. ეი, რა შავაშიშხინებდით ამ ქვევრი პირას!.. — ივანეს მაგივრად მიხუამ უპასუხა და მწვადების ხსენებაზე პირში ნერწყვი მოუვიდა...

ივანემ-კი გიოს სიტყვებზე თავი ჩაღუნა და ეტყობოდა, რისლაც მოგონებას ცდილობდა...

— რა მოგივიდა, ბიჭო, მეფე სოლომონობა ხომ არ მოგენიჭა, რომ მაგრე ღრმად ჩაფიქრდი?! — მუჯლუგუნის წაკვრით მიმართა აბრიამ და ჩაფუკა ამოავსო... — ეს ღმერთმა შაიწყალოს ელიბოს ოჯახში გარდაცვალებულები! — განაგრძო აბრიამ და წინწკლიანი ჩაფუკა მოიყუდა.

— ამინ, ამინ!.. — თითქმის ყველამ დაიძახა.

ივანე-კი ისევ ფიქრობდა. აბრიამ ჩაფუკა ისევ ამოავსო და მუჯლუგუნით ივანეს მიმართა:

— დალიე, ე ღვინო, რაც უნდა ბევრი
იფიქრო, ქვეყნიერობისას შენ ვერას გაიგებ!

— ხა, ხა, ხა, ხა!.. მართალს ამბობს, ქრის-
ტეს მადლმა, მართალს!.. — ხარხარი დაიწყეს აბ-
რიას სიტყვაზე სხვებმა. თითონ აბრიაც აჭყვა
იმათ ხარხარს...

— ბიჭებო, გინდათ ამ წამშივე სამწვადე
გავაჩინოთ?! - სიხარულით წამოიძახა ივანემ,
თითქოს დანარჩენების ხარხარის საპასუხოდ, უფ-
რო ხარხარი აუტყდათ ივანეს სიტყვებზე.

— რა გაცინებთ, თქვე აჯმებო, მართლა
გეუბნებით!.. — წყრომით უთხრა ივანემ.

— დაითვრა, აი, ხა, ხა, ხა, ხა!.. — ისევ ხარ-
ხარი დააყარეს ივანეს.

— თქვე აჯმებო, ი დეკეულას ბარკალი
დაგავიწყდათ, ძალლს ორ მიუგდეთ?!

— ეეე, მართლა, კაცო, ი ოროგორ დაგ-
ვავიწყდა!.. — ერთხმად წამოიძახეს და ივანეს
გაკვირვებით მზერა დაუწყეს.

— მაგანაც ჰთქვა, რალა?! — წარმოსთქვა
ცოტა სიჩუმის შემდექვ მიხუამ: — აქნობამდის
ძვლებსაც დაჰკვნეტავდა ი გამჩენ...

— ძვლებს კი არა, რკინას დაჰკვნეტავდა! —
დაცინვით სიტყვა გააწყვეტინა აბრიამ: — წელან
ე წვივს სისხლიც ვერ გამოადინა.



— მაშ, აბა, ვნახოთ!.. — დაიძახა ივანემ: — ღმერთმანი, ერთი ციცქნაც არ ექმნება დაკლებული.

თქმა და ასრულება ერთი იყო. ხუთი ბიჭი ბარბაცით გამოვიდა მარნიდან, ბნელაში მხრჩლავი ლამპრის შუქზე ლელვის ძირას ძალის წინ მწკრივად გამოიქანდაკა და შორი ახლოდან ლრეპით ძალლს მზერა დაუწყო. ძალლმა-კი ამათ დანახვაზე, მართლაც, ჯერ ისევ მთელ, მხოლოდ მტვრით მოგანგლულ დეკეულას ბარკალს წინა ტოტები გადააწყო და თვალის კვესებით კბილების ადგილას შავ ხაზ-გასმული ჩაღვიძლებული ლრძილები გამოაჩინა.

— უუუ!.. — ლრინავდა ძალლი.

— უუუ!.. — აჯავრებდა ხუთივე ლრეპით ძალლის ლრენას და ვერც ერთი მათგანი ვერ ბედავდა დეკეულას ბარკლის გამოცლას.

— აბა, აბრი, ისევ შენ!.. — მიხუამ ჰკრა ხელი აბრიას და ზედ ძალლზე-კი წააპირქვავა.

— აუ, აუ!.. — ძალლმა ერთი ალიაქოთი ასტეხა და ზედ წაწოლილ აბრიას ლრლნა დაუწყო.

აბრია ძალა უნებურად შეებრძოლა ძალლს. როგორც იყო, ყელში მარჯვენა ხელი წაავლო და მაგრა მოუჭირა.

აბრია რომ ძალლს ებრძოდა, სხვები გულიანად კისკისებდნენ...

— თქვე მამა-ოხრისანო, რა გაცინებთ-ყე?!
დროით აიღეთ ე ბარკალი და გამომწვადეთ.—
შეუტია აბრიამ და ძალლს ყანყრატოში უფრო
მოუჭირა.

ხარხარით დაითრიეს ბარკალი მარნისკენ
გამოსამწვადავად.

აბრია-კი ძალლს ებრძოდა. ილლიის ქვეშ
ამოიდო ძალლი და რაც ძალი და ლონე ჰქონ-
და აწვებოდა, თან მაგრა უჭერდა ყელში. ძალ-
ლი გამალებით წინა და უკანა ფეხებით ფხაჭნიდა
მიწას, თვალებში მტვერს აყრიდა აბრიას და
ცდილობდა განთავისუფლებას, მაგრამ ამაოდ.

თითქმის ხრიალიც შესწყვიტა ძალლმა, მი-
წასაც ისე ლონივრად ალარ ფხაჭნიდა და თან-
და-თან ყუჩდებოდა. მხოლოდ გვერდები და მუ-
ცელი ებერებოდა.

— შე ვერანავ, ე მაგრე ჭკვიანად იყო, ის
არ გირჩევნია! — დამშვიდებით წამოიძახა აბრიამ,
როდესაც ძალლმა მოძრაობა შესწყვიტა და თა-
ვისუფლად ამოისუნთქა, თუმცა ძალლის ყელში
წაჭერილი ხელისთვის არ უფონია.

— ე ძვალი აქვე მომიტანეთ, თორემ ძალლს
თავს გავანებებ და ქვეყანას შეგვიყრის! — დაუ-

ძახა ამხანაგებს, როდესაც მოეწყინა ძაღლთან ერთად მხარ-თეძოზე წოლა.

— ეხლავე, ეხლავე! — გამოსძახეს მარნიდან და მიხუამ გამომწვადული ბარკალი მოურბენინა.

აბრიას არსებობა კიდევაც დაავიწყდათ ამხანაგებს. იმათ გამომწვადეს და ძვალი იქ დააგდეს. თითონ-კი სახრეებისაგან შამფურები გააკეთეს და წვრილად დაჭრილ ხორცის ზედ აგება დაიწყეს.

როცა აბრიამ დაუძახა, მაშინ-ლა მოაგონდათ, რომ აბრია ძაღლს ებრძვის, და თრიკინი აუტყდათ.

— აქ მომე, პირში მივცე, თორემ მომვარდება! — ჩამოართვა ძვალი და ძაღლს დაღებულ პირში ჩაუდო.

მხოლოდ ეხლა-ლა გაანთავისუფლა ძაღლის ყანყრატო.

— ვერანას, როგორ ესიამოვნა! არც-კი ინძრევა!..

II

— ბიჭო, ბიჭო, დაჰკათ ტაში!

— გოგონა, გოგონა!..

— გოგონა და გოგონა, გოგონა, ბიჭებო!..

„გოგომ სთქვა, ჩემმა ნალამა:
ბიჭმა ვერ გადმიგორაო,
ვერცა გამიხსნა სარტყელი,
ვერცა-რა მომიგონაო!“

— დედაკაცო, ჰა, შე ვერანო, დაჰყურუვ-
დი თუ?!.. არ გეყურება!! — პერანგა ელიბო კა-
რებიდან უტევდა თავის ცოლს, როდესაც მა-
რანში სარკმლიდან შეიხედა და უკანვე ჯაბ-
რუნდა.

— რა დაგემართა, კაცო, რა იყო?! — შეუ-
შნით დაეკითხა ირინე.

— ღმერთმა რო არ იცის შენი თავი და
ტანი, ის ღმემართა!.. აბა, მარანში შეიხედე,
რა ამბავია!..

„გადაგიხტი, გადმოგიხტი,
გაგიკეთე ფანჩატური;
შენი ფეხი, ჩემი ფეხი
ერთმანეთში ჩახლართული!“

— არალე და არალე!

— იჸ, ეს სადა მღერიან?!: — გაკვირვებით
დაეკითხა ირინე და ლოგინში წამოჯდა.

— გამოდი-მეთქი, არ გეყურება?!

ხმის ამოუღებლივ ირინე ამოუდგა ქმარს
მხარში.

მწვადის ოშეივრით გაუღენთილი ბოლი უხ-

ვად გამოდიოდა სარკმლიდან და იქ მდგომთ—
ირინეს და ელიბოს—ბურავდა...

— დედაკაცო, ჩვენია ე მარანი თუ?!

— აბა რა ვიცი, ჩვენი რო იყოს, ხომ
ეგენი აღარ იტლინკებდნენ!..

— აბა, მიხო, ე შამფურიც გაიტანე და
გავათავოთ!..—უთხრა აბრიამ, როდესაც თამა-
შობის შემდეგ მიხუა დასაჯდომად დაიხარა.

ყველამ ითამაშა. ყველა თავ-დავიწყებით
თამაშობდა გოგონაზე. ყველამ კარგად იცოდა
სიმღერა და ამისთვის ერთი ერთმანეთს სცვლი-
დნენ.

მიხუამ უკანასკნელი ხის შამფური მწვა-
დით მოიტანა, და საჩქაროდ მწვადი...

— ეს ღმერთმა აცხონოს და შეიწყალოს
ჩვენი მიცვალებულები!..—წაუქცია თავი პურ-
ზე ჩაფუკას აბრიამ და მოიყუდა.

— ამინ!—ყველამ ერთხმად დაიხახა.

— დედაკაცო, რაღას ჩერჩეტობ, ჩვენია,
მა ვისია ე მარანი?!

— თუ ჩვენია, მა ისენი რას აკეთებენ აქ?!

ქვევრის პირას მსხდომთ-ყურები ცქვიტეს.
მკაფიოდ შეესმათ ელიბოს და ირინეს ლაპარაკი...

ყბებსაც-კი აღარ ანძრევდნენ, სულ სმე-
ნად გარდიქცნენ.

— დედაკაცო, ერთი ი ჩოხა გამამიტანე!..
ირინე მაშინვე გატრიალდა.

აბრია-კი მაშინვე გარედ გამოვარდა და
სარკმელთან მდგომს კისერში სწვდა.

— ბიჭებო, ე ვიღაც ოხერია, ღვინის მო-
საპარავად თუ მოვიდა?!

ელიბო შეეჭიდა და ყვირილი მორთო.
დანარჩენი ბიჭებიც გამოცვივდნენ. საჩქაროდ
ასწიეს ელიბო და მარანში შეიტანეს.

— კარგია კიდევ ჩვენ აქ ვიყავით, თორე ხომ
ღვინოს მაიპარავდა!.. — ძლივას-ლა აგნებდა ენას
მიხუა.

— არა, ბუზის ტოლას ვეღარ გვამჩნევდი,
შე ქრისტე..., რო მოპდიოდი ღვინის მოსა-
პარავად?!.. — ჩაეკითხა ელიბოს აბრია, როდესაც
ხელ-ფეხ შეკრული ელიბო კუთხეში მიაგდეს...

— აბრი, ერთი ჩაფუკა ღვინო მაინც და-
ალევინე, ვინ იცის, ღვინისთვის რანაირად სუ-
ლი მიჰდის! — ღრეჭით მიმართა ივანემ, როდე-
საც აბრიამ ჩაფუკა ისევ ამოავსო...

ელიბო-კი გონს ვერ მოსულიყო, თუ ეს
რა დაემართა. გაჩუმებული ათვალიერებდა მა-
რანს, თითქო ეცნობებოდა კიდევაც მარანი და
არც ეცნობებოდა. მაგრამ ეს-კი კარგად იცო-
და, ღვინის მოსაპარავად არ მოვიდა.

„მაშ რადა მწამებენ ღვინის ქურდობას?!“ — შეეკითხა თავის თავს ელიბო და პასუხი-კი ვერ მისცა...

— ღვინოს-კი არა, ჭირს დავალევინებ! — წამოიძახა აბრიამ და შემდეგ ხელ-ფეხ გაკრულ ელიბოს მიმართა:

— არა, ავი კაცის მამისა და დედის სულიცა, ე ღვინის მოსაპარავად რო მოდიხარ, ქრისტე აღარა გწამს?!

ირინეს კაბა გადაეცვა. გამოვიდა ქმრის ჩოხით გარედ და მიათვალიერ-მოათვალიერა ქმარი და, რაკი ის ვეღარ დაინახა სარქმელთან, სახლშივე შებრუნდა.

— იჰ, სადღაც წასულა!.. — კაბა ისევ გაიძრო და ლოგინში ჩაგორდა: — ჩოხა თუ უნდა, თითონვე გაიტანოს, — დაუმატა, ლოყის ქვეშ მარცხენა ხელის გული ამოიდო, მარჯვენა ხელი კიდევ მარცხენა ილლიაში ჩააცურა და დასაძინებლად თვალები მიხუჭა...

— ბიჭებო, წავიდეთ, თორე ბინაზე აღარ მიგვიშვებენ!.. — დაიძახა გიომ და ბარბაცით ღვინით საფსე გუდა ზურგზე მოიგდო.

— ყველა წმიდა იყოს შამწე... კარგა დავლიეთ, აი!.. შენ-კი, ეი, ვიღაც ღვინის ქურდი ხარ, ხვალ პატრონი თითონ გაგცემს პა-

სუხს!.. — თან ბარბაცებდა ივანე და ძლივას ლა-
პარაკობდა.

— აბა, ახლა-კი წავიდეთ, შიგ ხო არ ჩა-
ვიღორჩებით!..


— წავიდეთ? — ერთხმად დაიძახა ყველამ
და თავიანთი გუდები და ტიკები აიღეს.


— ლვინის ქურდობა კარგი არ არის, ხვალ
თავლაფს დაგასხმენ! — თითქმის ყველამ მო-
ვალედ ჩათვალა თავისი თავი, რომ ელი-
ბოსათვის ეს სიტყვები ეთქვა, როდესაც ბარ-
ბაცით გარედ გადიოდა.

ელიბო-კი ამ სიტყვებზე მწარედ იტან-
ჯებოდა.

„დახე, ჩემ სიცოცხლეში ქურდობა არ
ჩამიდენია და ამ სიბერის დროს რა თავი მეჭ-
რება!“. — თითქმის ტირილით უსიტყვოდ გა-
იძახოდა და სირცხვილით თვალებს-ლა მაგრა
ჰეუჭავდა.

ს. ქვემო-ჭალა.





გვ.

1)	შატარა შესტელა	3
2)	ბუნების მეფენი.	9
3) ✓	„მიწა!“	18
4) ✓	„ჩემი სამშობლო ჩემი გულა!“	36
5)	ერჩის გოდება	60
6) ✓	„ბალდი ყოფილხარ!..“	72
7)	„დარსი გარ ამისა, დირსი!“	81
8) ✓	„სულ ერთია!“	93
9)	„ქა!“	130
10)	„ბედნიერება მსოფლიდ შაშინ ვიგრძენ!“	134
11)	ორი მკურნალი	153
12)	იუდა	169
13)	დვინის ქურდი	190



კარლაგანის ეროვნული ბიბლიოთეკა



K 62.644/2

საქართველოს
ეროვნული
ბიბლიოთეკა